

原

富

原富部甲下

英倫斯密亞丹原本

侯官嚴復幾道翻譯

篇十

論業異而庸贏不同之故

夫苟聽民之自己而不加攔塞驅繫於其間則一國之中民生諸業凡所以致其力而役其財者將苦樂利不利相若都邑錯處風氣棣通使一業之獨腴則民將自趨使一業之獨瘠則民將自抑趨之者多則轉而不腴矣抑之者衆則俄而不瘠矣民將各審其內外之分而自爲其最宜以與其所居之群相得不必爲其上者爲之焦勤也惟爲其上者爲之焦勤而後民失其自由而業之不齊以著故曰民如水自趨平又曰國助不如民自助

夫歐羅巴者天下之業場也或役財焉或勞力焉孜孜振振其贏與庸莫有同者此

其異烏由起乎。本業殊致。喜嗜不倫。或利微而所甘。或利優而所苦。起於其業而異者。一也。國異政。鄉殊俗。附離約束。不平以生。起於政令規約而異者。二也。是故吾論庸贏之異也。亦可別而二之焉。一曰業品之殊。次曰政約之異。

以下論業品之殊。

業之優絀不同。其所抑揚損益。使之平均者。一者五。一曰本業之可欣可厭。汙潔休劇榮辱。二曰學操之甘苦廉費。三曰售業之恆不恆。四曰執業者責任之重輕。五曰所業期成之可恃不可恃。

所謂異生於本業之可欣可厭。汙潔休劇榮辱者。如當都會之地。凡縫紉之工。通一年之所得。劣於織紡之工。縫紉休而織紡劇也。織紡之工。劣於冶鑄之工。織紡休而冶鑄劇而垢也。冶鑄之工。六時之所得。不及采煤者之四時。冶鑄者之於采煤。事潔而不殆也。夫榮辱之分。生於人意。而其業之酬。乃以大異。榮業所得。大抵常微鼓刀而屠。海處也。而其業之取庸以厚。刑人之隸。通國之所憎。使非厚廩。則莫有爲之。

者矣。

改漁之事。居極樸之世。則生事所必資。進而文明。則爲好樂游戲之娛。而倚此爲業者。皆窮極矣。漁之業。微自希臘上古而已。然而英國今日之獵戶。例貧子。以其事之根性而易操。是故爲之者衆。數獲入市。所得者常不足以贖其動。而其業遂至細矣。此不僅使庸之數異也。贏率不均。有由此者。市酤酒肆之主人。與傭保雜作。往往爲醉人所捶罵。業之煩薄者也。然而斥性少而贏得多者。一閱之市。酒壚往往稱最。所謂異生於學操之甘苦。廉費者。其事得以機器明之。製造之廠。設一機器。爲費甚奢。故其責償於此機也。及其未毀。最此機之所出。必與機價相敵。而尙有贏焉。夫而後其機用也。人之學爲一業也。其技巧習給。必勞力需時。而後能。故責償於其業也。納製造者之於機。課其所獲。必常庸而外。更有以酬前者之勞費。計母爲子。尙有餘焉。夫而後其業可學也。且以人比機。則機之長短可豫知。而人之壽夭至難測。人生一世之中。能治生者。率三十餘年止耳。故其取償又以重也。是故業有尋常之別。專

業受庸與常工異者。致由此耳。歐洲常法。以梓匠金玉諸作。與凡製造之家。爲巧工。爲專業。而田野山澤之事。則爲常傭。故各國律令。操前業者。必自從師。爲學徒。始徒有徒限。寬苛之制。隨業不同。徒限之中。徒之力役。皆其主若師之所全有。徒之衣食。取其於所親。或如學子然。行束脩而後授業也。設其家貧不辦此。則書券展徒限。爲之傭以養之。其所爲於徒。則多損。而於其師。亦未必利也。蓋展限之中。多傭徒。至於農升山林之事。則人以爲不學可能。乃無爲徒從師之事。今如田傭。當其受雇之時。即其學操之日。計力受庸。稍足自養。以是不同。故歐洲專業之工。傭廩皆較常傭爲厚。而在編民之伍。流品亦緣是而稍高。以日庸而計之。如麻枲。如木棉。所受者以比常傭。爲優盜微。而通一年爲計。則以受雇之較恆。其積則比常傭多也。第其所多。每不敵其學。爲是業之所前費者。至於精詣之業。事資學問。尤邇久而難成。則售技之。極彌厚不倫焉。此如繪塑之工。如律師如醫士是已。

案農升之業。不需爲徒從師。特當斯密時如此。今大異矣。

至於斥母立業其贏得之上下則未嘗以學成之難易廉賤論也若專以役財治生之事而言則諸業之難易相若或土著之貿易抑四國之通商任舉一途皆不能此繁而彼簡其爲業既相似其贏得宜略同也故課母責贏而優絀不由斯而起

所謂異生於售業之恆不恆者如製造廠局之工都會賃工之傭當一身無疾病皆得勞其力以受食獨至築垣疊石之工嚴霜淫雨皆可輟業又必俟雇者之呼於其門而後能奏其勛也是故一年之內坐以待雇者半之則其受庸也不僅資當日之養必有以均其作輟且務償其望工之苦與其不或必得之虞此所以常傭之日廩石工圩者常加半抑倍之矣使其地常傭七日之廩爲四五先令則斯二工必七或八前者六七則後者九十前者九十則後者十五或十八焉此皆驗之於吾英倫敦與各部之庸率者也且此庸獨大非以他故而然也天下易能之事莫築垣疊石若倫敦甃几之匠夏則爲石工圩者以取優冬則執倚甃之業以補闕知其事夫人能爲也此以知其庸之獨異起於售業之無恆而非由他故也

且徒以技巧而言則梓人之業固比之石工圩者勝矣然而都市之中梓人之受庸往往比石工圩者爲遜蓋其業不以寒燠雨暘爲殊其有待於雇者之招邀亦不若石工圩者之已甚此其庸所以反遜也歟

又如有操業者在他所則常得僦而獨於一所不然則其庸亦比例而大今如倫敦之俗凡手藝之工主家雇之隨時可令之去與他所之短工同是以在倫其庸獨大常傭日十八便士者彼則三十之如倫敦縫紉之工休業者常以旬計夏日尤甚故其事如此此在他所往往所得以比常庸尙微劣也

假其售業無恆與其業之煩溥勞苦合則可使極蠱之工售庸過於精業也蘇格蘭之紐喀所及他諸部其中煤工業短雇者所庸常倍或三於常傭之率此起於煩溥勞苦者爲多而由於無恆者少蓋彼自苦之而不願長勤也獨至達眉河濱卸煤之傭其煩溥勞苦誠無以異於入山采煤者然以煤船到步之不常是以其業多作輟而取庸獨優常倍或三於常傭之率平情論之雖至四五不爲奢也數歲之前吾嘗

親考其事。知此種傭民其所受者。常日六先令至十先令不等。但以六先令言。則於常庸已四倍矣。常庸日十八便士者也。此其庸雖驟視爲甚優。究則傭市供求相劑之自爲。而非人之所能設也。使此率爲優。不止償其煩苦與無恆。將來者日多。其庸自然減矣。烏得準以爲厚利耶。

至於母財贏率之進退。未嘗以售業之恆否爲差。蓋母財之行滯在人。而於業固無與也。

所謂異生於執業者。責任之重輕者。如冶鑄黃金之匠。琢磨玉石之工。雖精巧不必過他工。且有時而遜之。顧其計日受庸。常比他巧匠過者。無他。爲付託之重而已。故醫療之工。病者性命精力之所託也。律例之師。訟者身名財產之所託也。其所託之重如此。此不可以付諸卑賤人甚明。故其得權責酬之厚。必使若人有以自尊其流品。流品尊而後廉節重。節廉重而後有以受重託而不驚。必然之理也。況之二者爲業。事資學問。操業難。二因既合。而醫士律師之庸。有非常工所敢望者矣。

至於贏利之不同。又未嘗有待於此矣。人役已財以治生。則無所謂付託者。而其人爲市廛所信否。又不在業也。視其人之財產聲譽才具。於時人意中爲何如。是故業異而贏率不同。勢不能起於付託之重輕也。

所謂異生於所業。則成之可恃。不可恃者。一羣之中。民各有業。皆童而習之。然而成否之數。業之爲異至多。大抵勞力粗下之業。幾夫人可成。而勞心名貴之業。則成否至無定也。生子而使之業爲履。其長而食於是業也。若操券焉。生子而使之業爲律師。則其長而食於是業也。二十得一而已。故其事如占圖焉。二十人共爲圖。十九失而一得。則此一得者。收十九之所失者。而獨享之。至公之道也。夫人業爲律。稽古而誼。今年幾四十矣。而後收其報。世但知其精厚也。而不知動一世而不得稽者。外有十九人焉。且合而計之。彼一人之所收。終不敵此十九人之所費。今使取一邑勞力之業。如爲履者。織屨者。總其同業之所費。與其同業之所收。則所收之財。常逾其所費者。至於業律之家。則最館著諸公之所得。常不敵其同業所歲耗者。斷可識矣。故

其事不能如占國之公得與失常相敵也。律之爲業固然矣。而他勞心之業仿此。食於其群。雖若甚優。而其實則得不償失也。

其業之得不償勞如此。然而一國之秀民。尙爭趨而勸爲之者。有二故焉。天下惟名可以勝利業。精則名品貴。舉爲名高。一也。人之自詭常過其實。微倖情勝。以爲必成二也。

夫與衆共脩一業。不企其中平而不能。而我乃能爲其至者。此所謂豪傑願異者矣。故樂爲勞心名貴之業者。其所收不僅在厚利也。其半亦爲名高。而名之上下。亦與其能之上下相副。名卽爲其所取償者矣。此在醫業已然。律業或過。至於學爲文詞。名理格致之學者。幾於皆名而無所利矣。

度越賣偶。魁倫冠能。人情之所歆羨者也。獨至用此以弋利干祿。則人情或以爲汙。惟人情以爲汙。故其所得不僅取償其前學之勞費。必且有以酬其業處之汙。今夫俳優歌舞。當不求利。皆爲名流。及其自售風斯下矣。其索賴也。常若邱山。何則。能獨

而處汙故也。不知者疑其流品之下。而索賴之優。不悟其索賴之所以優。乃即在流品之下之故。今使人情忽變。而不以術技自鬻爲汙。則其業之流品升。而樂爲其事者將衆。衆斯競。競斯微。其利入不能如是之厚矣。且俳優歌舞者。固有待於天資。然不必如是之罕遇。世固有獨具精能而恥以牟利者。使其業不爲世所鄙夷。則所謂度越曹偶者。固不必如是之寥寥也。

至自詭過實。而每懷微幸。尤爲人情之至常。其求事自試。常過於其才之所克肩者。古之知人情者。言之詳且盡矣。獨至幸成譴敗之心。則尙未深發其蘊也。世之傾覆顛沛。坐此者至多。蓋常人方血氣之未衰。其計事也。往往於成得之數。自與則甚多。於敗亡之數。自切則甚少。此其心之用事。觀於圖博。俗呼彩票。一保險二事而可知。今夫圖博者。天下姦利之一也。而售此者所在致富。蓋人所爭趨。彼之所收。必大溢於其所與。此其所以利也。使爲公道。而收於與平。其事將廢。故每圖之。真值十常賦其二三。以至於四者有之。其事之不公不廉如是。然而人方爭購之者。微倖之心。

勝常自詭於可得也。執數金之貲而覬萬億之獲。雖有智者。未嘗以爲誕也。且也其標愈大。其得之數愈微。而人愈樂趨之。使其標小而得之數多。則相顧而不屑。甚則以求得之殷而多購之。不知數學之理。時圖彌多。其去得彌遠。設其盡購。則百失無一得者矣。其自與於成得者。過未嘗考之以數。而求其實也。若夫人情之諱敗而過則保險者。其事與圖博相反。其得利亦與之背馳者也。保險亦數術之一事。今使其業能存。而斯民之室家舟車。免夫水火之厄。則通所收保險之費。不僅有以償禍敗之常率。將必有餘饒。以爲治其事者之俸養。與夫一切之經費。夫而後事可久也。故使保險者之所收。無過乎此數。則人之所出。與其所保者。正相抵而無贏。天下至公之業也。乃今觀之。則業此者。雖有微贏。未嘗以富。卽此爲論。知其業之不盛。而其業之所以不盛。以人樂鋌走。而預爲善敗之計者希也。今者合一國而言之。則以屋廬保火險者。百不過一二焉。至於舟行之險。以禍災之可畏。保者較多。然卽至戰爭之頃。風颶之時。空行不保之舟。尙至衆也。或謂鉅商之家。連檣接舳。多者數十百艘。勢

已自相爲保。節其保費。足救禍災。故其不爲。尙非失計。獨船少之商。不保者乃爲愚耳。然其所爲。未必生於計數。大抵事不經心。而以天幸爲可常已耳。

案此言自斯密氏時如此耳。至今日。則保險之業大旺。而國博稍稍衰。獨吾中國通商諸步。其民情乃與此合。呂宋國票。售於吾國者最多。較而論之。足以覘民智之高下進退矣。

人之擇術。多在弱冠之年。而輕藐險巇。自詭必濟之情。此時爲甚。其擇術多疏。而終受其敝者。固其所矣。常人慮難之情。常不敢其幸成之意。觀於從軍少年。與行海新賈。尤可見也。鋒銳奮發。義不留撓。不屑恆靜寬閑之業。而慕倏來驟至之功名。編伍從軍。英制用召募。不由徵賦。月糧微薄。殆劣常備。而艱險勞動。不翅倍之。乃每當戰事新起之秋。輒藻鷺趨爭求入伍。雖其人材力了不異人。皆盛氣高步。若時事方殷。封侯食肉。俯拾地芥也者。雖以此橫尸疆場。不暇計也。至於浮海之業。以此從軍。因不若是之失多而得少。故少年浮海。多慕其父命以來。至於從軍。未嘗如是。然而少

年人尤樂從軍。從陸軍又過於從海軍。蓋海之提督其爲俗所欣羨不及陸之將軍。海戰而勝其所收之名利亦不若勝於陸者之優隆。海之中必丹雖例得與陸之略納樂比肩。而世俗之情終輕彼而軒此。此其事如圖博然大標少則小標多。陸軍多大標。故所欲甚難得。海軍多小標。故其願稍易償。若由此而論之。彼擇業於斯二者之間。當亦知所從事矣。雖然。浮海之優於從軍亦僅耳。海軍之兵其技擊趨捷。悉優於城市之傭作。且畢生所爲皆動劬危殆之烈。課所爲酬。毫無所獲。不過逞其賈勇喜事之雄心。與履險如夷之可樂耳。其月所廩給與近地之常傭無以遠過。舟所出入地多。故不如地著之傭。勢常以地爲隔。而略有重輕。大抵常以聚船最多之步之庸率爲之。倫敦常傭月之所獲。前於西曆一千八百五十年。英之水手比之於蘇之水手多者不外月三四先令止耳。平時倫敦商船水手月二十一先令至二十七先令不等。而常庸之率乃四十至四十五先令。其不同而劣如此。雖水手月廩之外尙有膳食。然所廩者不足以敵其差。即或過之猶無益耳。舟中之餽賜固不能與妻孥共享之也。

故危殆艱險者。非豪壯少年之所懼。往往緣其如是。喜功好名之子。轉勸爲之。是故
貧母之慈子也。遣兒學書計。避海濱之學館。恐其濡染飲羨而樂遠遊也。夫血氣方
剛之人。樂蹈危機如此。故海船雖有風波之險。不足以優水手之庸也。擇事而欲庸
優。必辛苦而其事煩溥。不利養生。或損神而常致疾。而後如此。此旣已前論之矣。
案不憚艱險而樂從軍走海上者。歐洲之民。大抵如此。而國敦日耳曼之種尤然。
此其風氣與中國所甚異而絕不同者也。歐羅巴能雄視五洲。以此支那常恐爲
其所逼。齟而終不足自存者。其端亦在此。觀於斯密之論。斥爲鹵莽之愚。可以知
其根於性習者至深。而非由樂道而誇大之者矣。嗚呼。用詩書禮樂之教。獎柔良
謹畏之民。期於長治久安也。而末流之弊。乃幾不能自存。此豈立治擾民者之所
前知者耶。

至於贏率。亦以所業成濟之難。易爲差。內賈收利。可必之數。過於外商。且同外商也。
利之必收與否。又以地而異。北美之商業。責事課贏。比其南島雅墨嘉之經營爲穩。

固矣。是故贏得之厚薄與其業之危否。若正比例。事愈無定。則偶贏之爲數愈多。第通而計之。則得也常不如其失。此且作夕僥倖。倒荒商業之所以滋也。貪得情熾。謀取幸成。而計失之數不精。且人俱慕羶。驚之者多。故其利遂減。偷漏征稅。開出關入邊關者。姦利而至難恃者也。使天幸可常。則朝暮可以致巨富。然而仆者何多也。無他。得失之數。既不相彌。通而覈之。反比他業之常贏爲絀。雖間有厚利。其業終不足以久長矣。

業品互殊。庸之參差者五。而所以致贏率之異。僅有二焉。曰本業之可厭可欣。曰期成之有難有易。然自其前而論。則其例之行甚狹。贏以之異者少。贏之從同者多。自其後而言。則暫得雖饒。通而課之。其得終不償失也。是故合五事而觀之。一鄉一國之中。雖勞力役財。業之分殊至衆。究之庸之爲異或懸。贏之爲異不相遠也。以理擬之如此。以事核之亦然。掃除之棘。所廩至微。醫士律師。常收厚糈。才地既懸。則其庸不可同日而語矣。至商賈之廢居殖貨。贏得之率。質論皆同。即有時兩家贏利。有若

相懸實則吾人觀物不審往往混庸贏而一之非真贏也

市之賣藥者其贏得之不倫殆爲市廛之口實雖然此贏也其實庸也其別驗製合之務精過於常工者不待論即其責任之重去爲醫者特一間耳貧者之疾無論重輕所求診者不離藥肆富人微恙亦於是乎咨之以前者之第二第四例言之彼之取庸固宜甚厚而厚庸之所由取固以名藥爲最便也故其藥當市所售上者歲不逾三四十鎊之值使其利不相十或以一而贏五則其庸匪所出而莫有爲之者矣故曰賣藥之奇贏合庸而後大也

又有時生業甚微贏得至厚析以爲論其事同茲今如海陬小集之中有取生事之所當需雜儲爲肆此所謂坐列裨販者也裨販之贏十當五六其斥母不逾數十金而賈動斥萬金之費以治生逐利者至多值百贏十止耳此其故又可得而言也其所持之物大較皆居民所必需又以市場之褊小勢不足容絕大之母財此雖裨販然既已爲之則不容他意故其業必有以贖其生又其能必與其業相副具母矣

必通輸札解會計能別數十百物之貴賤良窳與其地產之所從來而後有以入廉而出多而獲倍稱之息此其能事實則與大賈相若所不同者直攤費少耳若此人之庸錢雖歲數十鎊不爲多也今於其贏得之中取此數十鎊以爲庸則其所謂贏者去常率固不遠矣故此與前事其爲異者皆庸至於言贏固不能大異於常率也斥母財以求贏利則嬴商之贏率劣而稗販之贏率優而二者之優劣在都會其差少在鄉鄙其差多其大較也假如前喻使其人之具母可至於萬鎊之多則執業者之庸如之什之入大川不可見矣此時稗販之所贏其率將與嬴賈相若此其貨所以以在鄉鄙則貴在都會則賤也雖然稗販之雜貨物可以賤至於酒肉麥穀則往往不能蓋物不出於其地務遠以致之而本值以貴致雜貨物都會於鄉鄙之爲遠均也而牛羊米麥則都會距其所出之地遠於鄉鄙遠則轉輸之費以增雜貨物之所以賤以都會具母之既多酒肉麥穀之所以不能以都會轉輸之較遠具母多則庸小而價廉轉輸遠則本增而價貴二者相消長而都會鄉鄙之價乃相若矣嘗見一

國之中牛羊五穀之價隨地而殊。獨至麴麴膠膳則邑野相同者。其諸二者相消長之故歟。

案鐵軌未興則如此。至道里脩。鐵軌繁則邑野之物價日趨於平也。且以城市銷場之恆。百貨彙集之便。故繼今以往都會物價稍稍廉於鄉鄙者有之。邑居之中四通輻湊之衝。僦肆之租什佰往日坐列者以逐利爲競之殷。往往一屋之肆不能全而有之。皆坐鐵路既興。物價流通趨平。其母其大。贏率甚微故耳。此西國今市之情形也。

無論大賈零售。其贏率皆在鄉鄙爲優。而在都會爲劣。然而營業之始微而終鉅者。乃必在都會之中。鄉鄙固無有也。蓋市場誠小。則雖有鉅母。無所用之。故其業之增高繼長難。以少本而求奇羨。母贏相課。其率固優。贏率優矣。而總其所獲之數。則未嘗大也。如是則歲進之利微。獨至都會則不然。贏率平平。而寬廣輻湊。故其業日以發舒。歲所有贏。輒增爲母。銷場日闢。母本漸恢。故贏率雖微。而最其所贏。什百幾者。

以是之故。雖僅數歲之間。由種販零售而至鉅商賈。可也。凡此皆業於鄉鄙者所不能也。又有異者。懋遷致富。有二塗焉。一曰經業。一曰屯儲。經業者。計母爲贏。不修持久。忍欲纖微。勤苦運籌。日計不足。歲計有餘。漸以致富者也。屯儲者。牢籠百貨。屯厝待時。買賤賣貴。以規大利。頓而致富者也。故屯儲殖財者。逐時而遷。不規規於專業。今茲種穀。明年置釀。爲餽爲茹。或爲茶芥。時用知物。與俗上下。利進則先。人而爭利。退亦先。人而罷。故其贏利折錢。與營經業者無所比例。其趨利也。若鷙鳥猛獸之發。或一發而致富不貲。或增擊不中。而頓沛窮通者。亦多有之。顧此非處四通八達之區。固不可耳。蓋必市場浩廣。消息靈通。而後可遷其術也。

此篇前言五事。雖爲民生諸業。庸贏二者所以不齊之由。實則所以益寡裒多。補不足。損有餘。使天下無甚苦甚甘之業者也。然必一國之中。政令平均。并兼無有。擇術遷地。悉聽民之自由。而後其例之行可以見也。設有其壅閼鞭駭。而不令萬物之自便。則其效或不然。且政寬而民自由矣。又必有三形焉。而後其例之行乃益信。外是

則其效又或不盡然。何謂三形。一曰其業已舊。甘苦利害。爲國人所周知。二曰際其平時。而不在變動非常之境。三曰以爲專業。待之資生。而非旁及兼營之事。

一所以知五例之行。必其業已舊。而爲人所周知者。新創之業。甘苦利害。既爲時俗所不諳。委人持兩端。憚於趨業。於是倡其業者。必設厚庸重糴以來之。此所以新業之庸。常較舊業之庸爲厚。必歷時甚久。而後其庸可漸減。以與他業爲平。此不必民智日開之國。而後有之。玩好飾觀之事。朝夕替變。滅無常。不成爲舊而已化。如綺羅之片段。器用之型模。各國如此。獨至質樸之物。生事之所必資。常歷數百千年而無變。是故操後業者。其庸常平。逐前事者。其庸時起。即以吾英爲論。蒲明罕一部之製造。前事之比也。薛非勒一部之煤鐵。後業之倫也。蒲之庸優。而薛之庸平。職是故耳。至於羸率之事。大抵新創之製造。新設之步頭。新法之樹畜。其事理皆與屯恃規利者齊觀。倡首之家。常自詭以無窮之美利。然事濟而如願相償者有之。不濟而敗。妨困窮者常數倍也。其盈虛損益。與斥母而守常業者。無比例之可言。即濟矣。其始

之得利至優。及其歷久之餘。人知其事者衆。則競者日興。其贏利終與他業等矣。
二。所以知五例之行。必際平時而不在變動非常之境者。各業力作之市。時賒時衰。
則賒過平。衰則不及平。自然之勢也。今如田作當夏耘秋穫之時。求常過供。而庸隨
之長。戰事方殷之日。水手由商船而籍海軍者。率常四五萬。於是求亦過供。而水手
之月得二十餘先令者。至此皆月二三鎊矣。此見於業賒而所得過平者也。至於業
衰。如製造疲歇之日。其中力作工匠。重於徙業。甯減庸而爲之。此見於業衰而所得
不及平者也。若夫贏率。則自與其貨價相乘除。價騰則其率過平。價跌則其率不及
平。亦常道也。顧騰跌之事。貨有不同。或在此易見。而相去度多。或在彼難爲。而相差
度少。大抵人爲熟貨。視求爲供。計一市一歲之所銷售。而爲之辦致。雖不盡合。亦稍
相敷。是以無騰跌甚過之事。此如英之麻桌。鬻劇諸業。各廠之匠。指不殊。諸市之匹
段相若。烏從過乎。而於非常之市。則亦有之。如國有大喪。元纁頓貴。而平時常物。則
無是也。然天生之生貨。與視生貨而成物者。則大異此。每歲之力作同。而以天時不

齊致產大異。如粟如酒漿如錫如菸葉。皆此類也。故其價不僅在供求相劑之間。而常在豐歉不齊之際。此其騰跌所以易見而爲度多也。其騰跌之差既如此。則其贏率之優絀亦從之矣。是故貴庾積物之事。常在天生生貨之中。知其將歉則急收。察其將盈則盡發。操舍得則大利存焉。

三。所以知五例之行。必其專業而非所旁及兼營者。其人治一業以資生。而不必窮年之力以爲之。使營業隙而售其餘力。則其責庸也。常比以爲專業者輕。古蘇格蘭之民。有所謂噶特爾斯者。（譯言廩丁）至今尙間有之。其儲於田主也。介乎長年短雇者之間。例受宅一廩。園一區。可種菜。芻幾束。足飼一牝牛。外是或下搭田十餘畝。可以耕。農事殷。田主每七日更給傭雀麥二乘。值十六便士者。然而常暇日。自治分地之外。猶有餘。則相率爲人雜傭。苟得事耳。不甚計庸率高下也。故其責庸常比他庸爲廉。此在古日尤衆。今者國財進。生事周。所謂噶特爾斯者。稍稍盡矣。蓋戶口不蕃。田疇未闢。田主農頭。養長傭則甚費。不養則無以趨時。此法最便。故噶特爾斯

所廉不可以至。庸輪田收屋居。當其庸大半矣。而世之論食貨者。不察常取此以謂古今庸率迥殊之體。可謂失其實矣。工廉則貨賤。故如是之備。其成貨索價之微。非他工所能及。蘇之織纈。常比機織者尤廉。大率此曹之所產也。薛德蘭出纈歲千雙。雙五便士。若七便士。無過者。其地庸率。率日十便士。又常紡麻。每七日勸者得二十便士而止。使非旁及兼營。而以此爲專業。雖欲爲此賤。勢不能也。

案聞印度民常織樹皮爲粗布。樹名優底。布名公尼。然優底公尼價相若。則亦旁及之業也。

夫治一業矣。而備有餘力。主有餘財。資以旁及兼營者。業之不廣。斯可見矣。故此皆貧國邊鄙之事。富國通都無之。雖然。設有他故。時亦有之。都邑屋租貴者。莫倫敦若。而使僅僦一二分房家具。供張辦者。其廉又莫若倫敦。法之巴黎。蘇之額丁白拉。皆不及。其相反如此。蓋分之所以廉。即在全租甚貴之故。租之貴。都會皆然。地價百倍於鄉。一也。工貴。二也。材木磚石皆遠致。三也。而倫敦之俗。宅之僦者。上天下地。必全

而僦之例不可以析與巴類二都之俗異故業賈者宅既全租矣則以其下爲肆以最上府爲家中間二者則設供張家具以待寓者若逆旅然彼之治生視其業矣而析宅得租則其所兼及者也故其勢可以廉此與前之噶特爾斯事異理同者也案今時倫敦無此俗又都會租貴自緣供少求多而以得貴租故雖有三者爲梗而人猶爲之斯密氏言此爲租貴之由則犯名學倒果爲因之例學者不可不察以下論政約之異

案此半篇所指之公政私約所以垂遏利權使之不平不通者今大抵皆廢不獨辜權專利舍一二業如醫如律外皆所不行即所謂業聯徒限擇業移工諸事今亦聽民自由無爲沮梗者此可以見英國政令之日以寬大與其國富之所由來後主計政者其亦知所從事矣夫

舍後三者之因緣而外則勞力役財者所得之不同不出於前五事此雖民氣至伸擇術自養一任自由不能免矣然其不同生於本事是故雖名爲異實則所以爲平

獨至歐洲國異政業殊約。攔塞壅激不能因任民情物理之自然。於是庸蠹之畸重畸輕。冉冉而起。以前言五事所關尤鉅者也。

其政令約束所爲攔塞壅激者。大抵不出於三。一曰限其人數使之少。二曰增其人數使之多。三曰禁其徒業使之不得自然通流。民失其情。物失其理。自此始矣。蓋一群生業譬如水焉。水之所以終於至平者。以任其就下之性。而莫爲之壅激也。生業之利害。所以定於和均者。以縱物之自趨。而莫爲之攔塞也。乃今吾歐之政約不然。一所謂限其人數使之少者。蓋恐任其自至。則勞力役財以操其業者將多。競者衆而利薄也。故城市之業。首爲業聯焉。合同業之家。以持獨享之權利。次爲之徒限焉。使欲操其業者。非始於爲徒不可。制爲約章。以定其一時所得納之人數。與夫學爲是業之幾何年。背之者皆有罰。此無他。不使競於其業者之多。爲之供常劣求。用罄斷其厚利而已矣。限徒之數。徑而爲是者也。定徒之年。使學者費重。來者不多。紆而爲是者也。其所以圖人數於至少一也。

英國薛非勒之創工。一時不得納二徒。那爾福泊那威文二部之織工亦一時不得追二徒。犯者月罰錢五鎊。充官。國中若新墾地之帽匠。人傳一徒。多者月罰錢五鎊。充官。半與告發者。凡此皆業聯之所自爲。而又請官立禁者。外是則倫敦之絲業。聯者僅一年。亦立約禁其工不得一時納二徒。後由議院專令廢也。

歐洲有聯之業。其徒限皆七年。所由來久。今之學校稱優尼維實地者。木工聯之號。考拉體諾本義如此。古攻金之工。縫裳之匠。皆有優尼維實地。故見齊治城邑典志中。是知以此名專屬文業國學者。爲後起之事。即令人入國學。執業歷年。經有司考閱。學業中程者。予學憲稱藝師。其品第視中國舉人。藝師之名。亦古工聯所用也。凡業皆有藝師。不惟文學。蓋師者有弟子之通稱。常人就傳七年。則可售業受徒稱師。此在百工然。故在文學名貴之業亦然。古之業凡須學而能者。皆如是。無清濁貴賤之別。其有清濁貴賤之別。而獨文學醫律之倫。得稱藝師博士者。一博士西名達格特爾。其品第視中國貢士。凡醫例稱達格特爾律家格致家亦用此號。一非古

義矣。

額理查白五年著學徒令。凡國中民業諸技藝名術。取先就傳七年。而後任售之。不如是者。禁勿令售。由是工聯私章。前行於一鄉一邑者。著於國令矣。其立法期通國共守之。然不行於邊鄙。蓋邊鄙戶口稀。一民之身。取具數業。必使皆經爲徒。則其勢不能。必業有專工。則市場狹。所虞不足以自養。故其令不期自廢也。

令既不便。則民巧舞以與法相遁。彼以謂釋令之文。乃指當時國中所已有業。業起令後者。所不及也。於是抵牾違反。有絕可笑者。如四輪車令。前無有。而輪人則舊業也。前令行。則與人不得爲輪。而輪人可以爲車。輪不由輪人爲犯令。而車不由輿人則無罰。其望礙不通如此。製造之業。降而日滋。孟哲沙之布業。蒲明罕武累罕布敦之機器。操其業者。皆免於七年之徒限。皆以不及令之故。

案學徒令於若耳治第三之五十四年罷。

法蘭西各業之徒限。部殊而業異。如在巴黎。則大較限五年。於英爲輕。顧徒限五年。

之外又有火限火限者五年徒限滿矣不得驟稱藝師而自售業必更爲其傳之火
伴五年通十年而後得自立也（聞徒限之制前德意志之茂匿克最嚴茂爲歐洲
大都會其中揀業者自三年至五年爲率徒限畢則火限又五年同業考校行賈諸
邦如是而歸官乃給憑爲藝師其拘礙如此）

工賈諸業之規約蘇格蘭最寬緩不煩苛業各有聯聯各異約雖至精之業徒限不
過三年設學者猶苦其滯久得納財自贖令稍短促邑有工聯其應享之利益新進
者入費如約則均沾之其新近業如麻桌織紡及鑄造織機輪製諸工可不出費而
入聯他如屠業之倫皆自用無所拘凡此皆歐洲他所之所無而吾蘇獨爾者

案此所謂聯西名歌頗魯勒憲猶中國之云會云行云幫云黨歐俗凡集多人同
爲一業一事一學者多相爲聯然與中國所謂會行幫黨有大不同者蓋衆而成
聯則必經議院國王所册立有應得之權應收之利應有之責應行之事四者缺
一不成爲聯故英律注曰聯有五例一曰惟聯無死權利事責與國永存二曰聯

一成體有功過可論其於律也可爲原告可爲被告三曰聯得以斂費立業其爲議院所準者得抽外捐及強買業顧其事必議院準之而後可外此雖國王所許不得爲也四曰聯有名號鈴印其行事以此爲憑不以頭目長老五曰聯得自定其章程約束以治馭賞罰其群其此五德斯稱爲聯故西國有學聯各國國學皆由此起有教聯教門之事自律自治於國家無與也有鄉聯凡鄉凡邑凡屯凡屬地皆有之相時地之宜而自爲律令與國家大法有異同而其地之土功水利非里巡兵多爲所獨斷者今中國各步租界所謂工局者猶此制也有商聯如印度大東公司及今之匯豐鈔商皆屬此有工聯則如此篇所指是已其事與中土之社會差同而規制之公私基業之堅脆乃大有異故其能事亦以不同此所以不能譯之曰會而強以聯字濟譯事之窮焉

吾前者不云乎百產基於力役故力役者斯人各具之良能而天賦之產業也小民之所得於天所受於父母舍手足之強力便給無他焉設於此而拘囚禁制之使不

得奮其強。力便給者。蓋無異奪其天。予親遭之產業。逆天殘民。孰逾此乎。侵奪者雖奮其侮。說末由解免者也。且人道之相資。事與使二者之相爲擇而已矣。無取於其三焉。優於其間也。彼優於其間者。不特侵事者之自由。使之無以爲事。抑且侵使者之自由。使之不得善其使也。事者之善事與否。利害損益。使者當之。惟其於已也切。故其爲擇也精。而去取也當。今乃謂彼爲不必精。不必當。而獨煩爲民上者。閭閻然爲之擇。而去取之。曰必如是。而後精且當也。是侵使者之權。而奪事者之利也。是徒糾紛殺亂。而作爲無益者也。

夫考工之政。所爲斤斤。然於必久之徒限者。意固曰必如是。而後有良工。而市之器物不鹽惡也。顧徒限立。而器物之鹽惡如故。彼不知器物之鹽惡。不由於操技之粗疏。而起於人心之欺僞。欺僞非徒限之久所能祛也。商標官印。加於產物成器之間。使一國之政誠行。而斯二者不可以假託。則繩欺塞僞之爲。如是足矣。持金入市者。固惟斯二者之審。何嘗問工人之學製曾否七年耶。

抑考工者之爲此。將使百工習於勞苦而能爲勤耶。則又欲南望北者矣。夫小民之所以彌勤。惟酬其勞苦者之優且疾。足以使之故。賃工之傭以枚售者。其機必屬而不自知疲。至於學徒之功。反此。彼徒爲勤而不見其利也。故勗民之勤。莫若使之早食其勤之報。久於徒火之限者。彼將以其業爲徭爲罰。怨咨疾視之不暇。尙何能以勞勸爲甘也哉。國家營收孤兒。使習爲業。以衣食之出於其師。故其爲徒尤久。而此曹多情工。可以見矣。

今之所謂徒。歐洲古無有也。今之師若徒相與之事。載之國律者。可謂詳矣。而吾考羅馬律未嘗及之。希臘拉體諾二種之文。殆無徒字。蓋今所謂徒。非師弟子之義也。祇爲之界說。則徒者僮奴。爲其主作。以若干年爲期。期之中。徒者不受庸。而主者教以其業者也。

且人學操一業。不必歷甚久而後能也。故徒限之設。常無謂。今夫業之精工。至於時表。過常工者可謂遠矣。然亦不必待甚深年月。而後能通其秘也。蓋成器利用之事。

其難常在創而不在因。常在作而不在述。方時表之始爲也。輪牙筭籥相得之用。極之繭絲秋毫之間。此不僅成物之不易也。求所以善事之器。已大難矣。故心力聰明之竭。或畢生而後得一當。至其物之既成。而立之成法矣。則明體達用。雖中資之少年。旬月之教。足以與之。至於蟲劣瘳淺之功。數日授業。無不喻者。夫固非秘妙難企者矣。彼久久之徒限何爲者。若謂甘苦疾徐。心手相得。雖在常技。必歷久而後然。而不期之妙。固不可傳。卽習而能。又不可求於徒限中也。爲此有道。在習者樂執厥功。而用志凝一。欲其樂執厥功。而用志凝一。則莫若早稱事而受庸。勤而善則利優。惜而苦則利遽。夫而後其精奮其巧得而爲習者之門也。此豈爲束縛困苦者。所得貌襲而取耶。雖然。彼一業之人。所樂爲是約而守若詛盟者。亦自有故。徒限設去。學業者不待久而成。無七年不廩之儲。是主者先失也。操業之易如是。競爲是業者必多。勢且供溢於求。業利坐減。是徒者亦失也。徒者失。則操是業者皆失也。此其所以不爲而終以徒限爲公利也。然而計學之事。固必取通國之損益而計之。使取通國之

損益而計之。則富國之道。在費力省而成貨多。一業縱損乎。固合群之人有待於是業者之益也。人之自爲業者一。而有待於他成之業者不翅百。故使舉國之業而皆去徒限。是人勉一損而受百益也。所益不亦大耶。

是故工聯之設。本旨無他。所以固其業之物。賈物既既興。市價將跌。市價跌。則庸與贏自趨薄也。歐洲業聯之制。始皆城邑之民所自爲。無關君上之事。獨英倫民設業聯。必待上令而後立。此非以惠小民。禁并兼。實亦陰靳其權。以之賤利己耳。是故凡業欲聯。貨賂朝行。制可夕下。從此固利。不爲犯科。其無所入費而私自爲者。乃號奸聯私會。然雖覺察。不必廢也。但令嚴納縱容之稅。則其聯自若。凡一地之工商業聯。皆總而屬諸其地之鄉聯。鄉聯尊於諸聯所立之規制約束。有考察之權。或許或禁鄉聯得主之。不必國君也。

案凡約聯斷之事。皆於本業有大利。而於通國有大損。若總其全效。則貨棄於地者亦已多矣。且其事必絕外交而後可。使其國已弱。力不足以禁絕外交。而他

人叩關求通與爲互市之事則貨之本可賤者吾既以法使之成貴矣而他人無此則二國之貨同聲入市正如官私二鹽並行民間其勢非本國之業播地無餘不止是故壟斷之業可行於自封之時必不存於互通之事灼灼然也前此歐洲各國患其然也於是立爲護商法入口者皆重賦稅以困沮之乃此法行而各國皆病泊斯密氏書出英人首弛海禁號曰無遠通商（亦名自由商法）而國中諸事權壟斷之爲不期自廢蕩然維新平均爲說此雖其智有足稱然亦以英貨之通於他國者多故樂用也自此以還民物各任自然地產大出百倍於前國用日侈富矣百姓樂成乃益歎斯密氏所持之論爲至當而不可易云

順鄉聯雖有如是之權力而主其政者則皆業聯中人皆云爲此所以持盈察虛毋使入市之貨過多令供逾求致折閱實則務使入市貨少供不及求以多取贏也一業既聯他業踵起相率尤效乃至無業不聯故居一邑之中人人皆買貴物而屈伸相酬亦家家而賣貴貨彼固謂此爲致盈濟賤衡從相等雖有業聯而同邑操業諸

家不因之而有所失也。獨至以與郊鄙懋遷則邑中諸業皆有奇贏其所以自厚而致富者用此道也。

然而邑中衣食之源舍郊鄙無從出也。其所與郊鄙爲易有二道焉。一曰以都邑之熟貨易郊鄙之生貨。如是者益以操業或貨者之庸與其斥母養工者之贏。二曰以所致遠方之生貨若熟貨易郊鄙之生貨。如是者益以勞力運轉者之庸與其廢居居邑者之贏。前之所利在化生而爲熟居肆成事工之利也。後之所利在移多而就寡。遷地爲良。商之利也。而二者之利皆兼庸與贏而爲之。故都邑有業聯制爲約束。舉遷率權。以使庸贏兩高。而究極言之。則皆務以都邑之少力易郊鄙之多力已耳。夫如是則工商利優而農民利遜。始本平也。有業聯而自然之平勢壞。一國之所歲出利分於在邑在野之民。自爲業聯制斷之。則在邑之利優而農人始病矣。

案農桑樹畜之事中國謂之本業。而斯密氏謂爲野業。百工商賈之事中國謂之末業。而斯密氏謂爲邑業。謂之本末者意有所輕重。謂之野邑者意未必有所輕

重也。或謂區二者爲本末。乃中土之私論。非天下之公言。故不如用野邑之中理。雖然。農工商賈。固皆相養所必資。而於國爲並重。然二者之事。理實有本末之分。古人之言。未嘗誤也。特後人於本末有軒輊之思。必貴本而賤末者。斯失之耳。物有本末。而後成體。而於生均不可廢。夫啖蔗者取根。煮筍者擇梢。本固有時而粗。末亦有時而美。安見本之皆貴乎。必本之貴者。不達於理者之言也。故此譯於農工二業。野邑本末雜出並用。取於人意習而易達。不斤斤也。

財者易中而未嘗爲易之終事。是故穀畜資材之生貨。邑之所受於野者。即以邑中所出之熟貨爲酬。野邑相受。多寡之數大較略均。故熟貨之爲售重。即生貨之爲購輕。此本業之所以傷。而末業之所以利也。

案中國之往外國者。無熟貨。外國之來中國者。尠生貨。故中國之於外國。猶郊野之於都邑。本業之於末業也。斯密氏此書。其所反復於野邑本末之間者。取易其名。固無異直指今日中外通商之利病矣。孟子曰。言近而指遠。亦在善讀者耳。噫。

今夫歐洲之生計其本利常絀而末利常優者何必徧覽深觀而後能得乎都凡爲言已可見矣無論何國其始以微本經營而終於富厚者由於製造商賈者百由於溉田立種者一而已矣然則或勞力焉或役財焉其勞役於末業者獲優償其勞役於本業者蒙穀報有斷然者而力與財之擇優而舍穀者又自然之勢也故其趨事也常舍本而之末附邑而棄野

都會之民黨居而州處故易相合雖甚微之業皆有聯即有一二未經約束者或以其事之過於專利不得頌言而爲之而其間逐利恆態黨同業妬異門受徒常患其多商情必深緘秘務使角逐者希獨牟厚利凡此皆不約而同不期自合不必立爲條規載之盟府夫而後有聯之效也且操業之家彌少則其爲合也彌無難試觀羽毛之業其中紡織之工千人而棉毯者六七家惟堅持聯約不納新徒乃不僅盡收其利且有以把持羽毛全業之利權而棉毯之庸之厚遂由此而論等合之爲私不其見歟

至於郊野之民其勢反是孤懸啖處難以合從故農業向不爲聯且無欲聯之意人業爲農從無徒限彼固以其事爲不學而可能者也顧自我觀之天下之業舍士而外其有待於智巧閱歷之多殆莫農若試觀文物諸國農學諸書之繁富則其事之非易了可以見矣他業雖極工巧大抵一卷書益之圖表則畢其說獨至於農則事資心手之相得且不可獨於文字求之故有盡讀農術之書其智不如一常農者蓋天時地利人功在在與之相涉三者不齊田法立異非至精審無以爲之衆工方之邈然遠矣

此不獨農頭田主有督耕指麾之事者爲然即至樹畜常備其巧習之能亦較郡邑諸工而過何則工之爲事大率比器飭材二耳比器者察其利鈍飭材者辨其良楮彼攻木攻金諸工材等器同爲變差寡至於田事則所用者馬牛之動物有柔很馴驚之異性所加功者草木之植物有腴瘠強弱之殊資其間天時水土俯仰遷移故其資效施功非有審別之精作息之信必不可也世但見扶犁之工腰鎌之僕樸陋

蠢愚而不知彼於田事操舍緩急之間固未嘗一不當也。徒取色貌辭氣動容周旋以與市工爲比。則固爲木彊而難通。而自觀物察變擇地施功言之。則田傭固常過也。此無他。田傭於人間交際事少。而心所察度措注者。於田事爲繁。市工多見紛華。而其業則早暮一致。所爲用心者簡。故也。人苟往還邑野。而深交於二者之間。則彼此之優劣。可以立見。此所以支那印度。亘古重農。其流品利獲。乃在太半工商之上。使吾洲而無業聯禁制之事。則田傭今日所處。或不至如是之卑卑也。

歐洲政俗。工賈之業。優於田農。其所以然之故。不僅業聯爲之。國家政令。亦有啟之使然者。今如賦稅關征之政。皆主入國畸重。出國畸輕。此其爲效。正與業聯等耳。蓋有業聯以爲辜權。則雖貨價騰躍。其利非本國之民所能爭。入國之貨重征。則外貨壅閼不行。而土產獨牟厚利。又不患爲外人之所奪。然二政既用。物值大昂。其害終有所底。被其毒者。野業是已。夫田農既不能自聯。又未嘗禁他賈之爲聯。而工賈私家囂然。持保護商權利不外流之邪說。以蠱衆心。無有知此實工賈一二流之私利。

而斷非通國之公利者。而務本地著之民愈益病矣。

案自斯密氏此書流布。泰西風氣一時爲之幡然。英國後此百年。其民情與此所云正反。工商之家。原始要終。知護商之法。自塞利源得不酬失。則主弛關之說。弛關者。內外平等。不於入口諸貨。畸有重征也。其業聯私約。凡所以爲壟斷辜權者。亦稍稍捐除。至今而盡。獨其中郊鄙農民。乃轉創爲田約。欲以保持利權。重外輕內。蠶起以與其時之計。臣政府爲難。而計臣政府亦聯通人爲會。號反田約黨。相持爭論。至一千八百四十六年。皮勒當國。反田約黨大勝。而後無遮通商之黨。法始行。然而田野壟斷之私。至今猶一二存而未盡去。故有時而請免麥稅。有時而請立牛羊進口限。使此說行。則何異前之護商者乎。利之所在。民智難開。如此。然合前後而觀之。足以覘泰西世運之升降矣。

英國農未利懸。今差勝古。試權野邑之間。則耕夫之庸。差及製造。而營田贏利。亦不下城市之工商。此十七稔所不能者也。開嘗爲考其由。蓋由前此邑業過盛之故。邑

業盛贏利積而母財日恢。本業業均贏率日薄。業場有眵而競者無窮必至之數也。以其利薄故用母者棄城邑而輸之郊野。郊野之中本增事案而求儲日多。此庸率之所以起也。蓋始也立業聯以股之今也因末窮而反本。此其所爲猶始得之郊野者。今還之郊野而已。歐洲百年以來田野日闢皆緣邑中母財充溢末業故能爾也。然鄉鄙之業雖有甚優而國謀人事爲之沮奪者尙多故其效終遲而難據。

每觀城邑工賈同業之家相聚而謀類皆操奇計贏踊騰物價之事苟利其業何恤國人餘雖驩聚燕游其會亦寡故工賈勢聚者非國之利也。夫謂必取其會合聚謀之事立之法而禁之此固違寬大平均之政體然示之端倪使之便於爲合又何必乎。至立之政法使欲不爲合而不能則尤下策也。所謂使之便於爲合者如官設簿書務令同業之人署其名業居址自有是冊前不相知之人今皆羈集苟欲爲會則踵門而呼俄頃皆萃所謂使之不爲合而不能者如著令同業之家死喪相恤此其意非不美也而弊隨之生蓋相恤之事首資於財財出同業則必制爲國抽置之產

業其事非聚謀而公治之不可而彼乃緣此而謀爲辜權壟斷之事

既有業聯斯有約規既有約規斯有科罰此約規科罰者將誰定而誰責之勢必以少從多定且責以聯之太半由是其聯得歷久而不散而辜權專利之事亦相引而彌長向使其事懸諸人人則人難意殊其會雖成不可久矣

或曰惟有業聯而後有約束業以精良工無濫廁此無據之說也工之良楮貨之眞賾非業聯規約之所能爲而視雇與用者之取舍惟其有失業之憂而後爭爲其善而不敢惰欺業聯立則其業其貨無論良楮勤惰欺信皆必售則視利否耳何所勸而爲善業乎是故邑有業聯則市無良工苟求其良且必於聯外之郊野爲此則主與傭皆爲犯約者矣此固居邑者之所習知業日精良效安在耶

案此言通夫治道蓋家國礪世摩鈍之權在使賢者之得優而不肖之得劣則化民成俗日蒸無疆設強而同之使民之收效取酬賢不肖無以異甚或不肖道長賢者道消則江河日下滅種亡國在旦暮間耳何則物競例行合天下而論之強

智終利於存。弱愚終鄰於滅。故也。法義二國。以白山爲界。白山者。歐洲最高山也。遊客至沙蒙尼地。過嶺必雇山夫爲導。其二十年前。山夫盡人可爲。而聽客之自擇。於是山夫驕捷。馬騾馴服。後法國官府以此爲不平。下令凡爲山夫。必先由官察驗給憑。始得執業。而其受雇也。以次及之。周而更始。如是不二十年。山夫健者皆亡。而馬騾亦一無可用者。客乃舍沙蒙尼從他道焉。此事雖小。而可以推其大者矣。

又案茶聯之所以病國。在辜權把持。使良楮無異也。使其立之約東。爲一地之公利。不許賈僞售欺。則亦未嘗無益也。今如閩之茶業。人得爲賈。而小民怵於一昔之贏。往往靡雜穢惡。欺外面以邀厚利。貽害通業。所不顧也。二十餘年來。印度茶業大興。而閩之茶市。遂極蕭索。同使其地業茶大賈。會合爲聯。立規約。造商標。令茶之入市。雜僞者有罰。使賈茶之家。久而相任。則閩之茶品。固天下上上。足與印茶爲競有餘。未必不收已失之利也。

凡右所言皆限人數使少之流弊惟限其業之人數使取舍者不得任其自然而民業之優絀重輕以起此爲大事言計者所不可不深察者也

案今歐洲諸所有業聯之制皆廢存者獨醫律二家

二所謂增其人數使之多者其效雖與限之使少者不同而攔塞壅激使物失其理不得趨於平一也今如教士一業使任其自趨爲者將少重教者妨其然也於是設爲扶助之費勸獎之資既成學則有歲俸方爲學則有月廩此或出國家所公賦或本私家所樂輸務使開敏少年勸爲是業用以豐佐教道此不僅吾英然也景教之國一考唐之景教碑所謂景教者實非基督教宗乃教外別傳今借用爲教宗統名以偏概全古之命名固有此法也一莫不知此其資已財以從事此業者蓋甚少矣且教道宏深操行堅苦必歷時甚久捐棄外慕而後能成使其中有自資爲學之人則成者執業責酬往往得不償費而養人子弟藉扶助而成學者常不計賴之厚薄而爲之故其爲業貧者易執而富者難操勢常如此非不知教以明道而工以藝鳴

併爲一談斯誠猥褻。然而彼既以業受財。則固與庸同體。兩皆被雇。不可分也。溯十四棋中葉以前。英國私家教士及鄉社神甫。俸五馬克。約今銀十鎊。著於國令者也。而同時石工。日四便士。計今一先令。其短工匠夥。日三便士。計今九便士。使二者通年受雇。總其所得。優於教士神甫者多。故后安十二年令曰。教士俸入漸薄。劣足資生。無以勸脩已事天之士。勅所在舉協一教士領袖。說見部戊。一書以承制增加。歲二十鎊以上五十鎊以下。於是歲四十鎊。號牧師常俸。此雖國主議院所立法制。而當時牧師實廩。其不及二十鎊者仍多。而同時倫敦傭作。如韓匠縫工。歲入皆不下四十鎊。外此雖在下工。所得不能復少於歲二十鎊也。由來國制。詔以定領庸庸錢之高下。於業工常多裁減。獨至教士則悉主增優。然二者抑揚固殊。要皆履行無實。蓋教士則爲之者衆。供過於求。常受微祿。猶愈於己。其他業工。則業聯既設。供不及求。其庸自厚。此以見領庸之事。皆有由然。非爲上之詔。藉空言所能割制者矣。

案十四棋中葉以前。教士常俸之外。又有牧所丁錢。及教事之營供布施。總其歲

入。不僅此五馬克也。

雖然天下惟名足以勝利。教業居齊民之首。爲世俗所欽式。畢協牧師有官聯統屬。地望崇高。鄉邑堂觀。有世掌之產業。故雖教侶日多。俸精劣薄。而清脩之業人尙樂趨。蓋利不足而貴有餘也。且時而過者有之。此不獨公教之國。教道之尊爲然。即觀之蘇格蘭與瑞士之幾尼哇。其中教會品地優。爲學便。使其超踰僭偶。席豐履厚。固亦無難。無怪績學之士脩絜之人。猶望風而趨。不爲其中有生計甚艱者而裹足也。案蘇格蘭之布里必斯持。與瑞士之葛羅雲大同小異。乃脩教之一大宗。與羅馬公教異門者也。故斯密氏特舉之。

刑名醫療之業。與教士殊。無提舉堂觀坐食產業之事。使其學得人之扶助獎成。一如教業。則相競之下。將使二業之食報大微。而出重資使子弟學操之者將日少矣。夫如是。將使律師醫士。悉爲貧子。而成學舉由義塾。已之家道已寒。業之同人又衆。競於生事。得少已所。則二者必日趨於貧陋。又安得如今之雍容閑宴。費酬厚而自

奉優耶。

案資人成學。適以使其業之不見貴。斯密氏於此。若有微詞也者。然此以論事勢之通流。自應爾耳。非以資人成學者爲過舉也。且即使流極果如斯密氏所云云。而合通國計之。其事固有利而無害也。其成學者。於前既無所出資矣。則雖食報太微。亦未云損。此所以西國今俗。其中國產助學之事。尙爲至多。且其爲人之用。其款目之鉅。誠皆中國古今所未嘗聞者。而達變洞微之士。終不謂其事爲有損。而不紀其功也。蓋獨產助學。有二大利焉。一則使幼學者無衣食朝暮之憂。得以聚精會神。深窮其學。及其既成。遂爲一群之公利。舉世之耳目。此亦通功易事之公理。猶勞心者之宜見食於人也。二則使開敏而貧之人。藉此而有所成就。而國無棄材之憂。斯密氏固身受獨產助學之利者也。巴列窩學校有助學之餼。與試獲食之。如是者七稔。其學乃大成也。嗚呼。使中土他日新學。得與泰西方駕齊驅。而由此有富強之效者。其諸獨產助學者爲之一贊也歟。

今者醫律二家幸而免此。罹其厄者在俗所謂文人。歐洲此種之民始多由教門所培植。中經事會不齊。未即習度。流徙無業。跡近游民。其成業非由己資。而同類又復至衆。求少供多。其生計遂不堪設想矣。

考歐洲書有印版。其事甚遲。當未有印書之前。此等文人例爲師範。或公立。或私請。設科授業。以其夙學傳教人人。此其爲業。以比近人專爲坊賈著書。以之刊售求利者。事尊而用切矣。夫人自致一學。至成碩師。必天資人力皆不後人。而後能之。比功較勤。固不在醫律二家下也。顧雖有名師。其所得勝條。相懸甚遠。無他。文人多貧窶之家。藉他人之扶助以成學。而醫律成業。多用己財。爲之者少故也。今使印版未行。無著書刊售之事。一切文士將皆出而爲師。學者不加多。而願教者益衆。恐束脩之不贖。有加於今日者矣。往者槩本未行。乞士文人異名同實。各邦國學有例。許學士行乞自養之條。爲生之難。可想見矣。

國家以廩膳膏火。借資寒畯。歐洲古無此事。故其時成學之子。道足爲師。其食報於

束脩者至爲優厚此可考諸史傳而知者也如愛素格刺謫（與智學家之蘇格刺
第係兩人）著論刺謫同時師道曰如此人者皆懸至美之的以招來一世謂其徒
曰誠得吾道則福慧兩足處事交人均歸至當然則彼之所傳可謂天下之難得要
道矣及觀於所責報於其徒弟者乃不外區區四五麥尼之束脩夫號智學之師
固將曰其人智也乃所以與人者至吝所以取償者至儉如此此豈非天下之愚夫
烏在其能智也即愛素之辭氣而衡之其所指之四五麥尼斷非溢實之語亦非不
及實之言而試以今幣言之則四麥尼者十三鎊六先令八便士也五麥尼者十六
鎊十三先令四便士也一業之傳束脩如此夫亦可謂優矣而愛素猶或少之以爲
受者大慰至愛素之所自責於其徒則人取麥尼者十設譚雅典一時而授百徒其
豐腴可以見矣雅典名都愛素碩儒而所授之言語科又爲時人之所最重者則一
業之畢師得三千三百餘鎊之束脩非誣說也至同時儒以授徒致富者斑斑在史
傳中尙衆如波魯達爾自言其學費爲一千麥尼歌爾志亞力能以金範已像舍之

得爾斐之祠。柏拉圖所記。一時名師。如翁畢亞。波羅達。歌拉。諸人。其居養皆富厚。極一時。而柏拉圖亦雄於賢者也。尤足證者。亞理大德勒。爲馬基頓名王。亞烈山大師。其父王斐立。厚酬之矣。然猶棄之。適返雅典。開塾授徒。學費之優。益可概見。是蓋當時希臘國勢盛強。物力殷賤。而文明肇辟。人競於學。故能師道尊而報德厚如此。迨一二百年以降。人文日廣。能者世多。束脩自行。亦稍稍薄。物盛而衰。固其所也。然其中傑出之偉。猶享厚實。較而論之。終未若今日之非劣。試觀史載希臘資遣。噶那提。及知阿真二子。使羅馬。車騎雍容。於斯爲盛。當是時。國勢已不及初。特土地尙廣。自主之權。未墜於地。其禮遇學人。尙能如此。且噶那提者。巴比倫種也。於希臘爲異族。夫心慧異族。不畀以權。古莫雅典人若。而噶力能得之。此非其學術能事。獨所心悅誠服者。固不能矣。

雖然。此之不齊。非弊政也。以比前之結縶立法。以壟斷宰權者。其事判矣。夫學子日多。而師儒之奉。坐以趨薄。道富身貧。自身處其境者言之。固若不便。然於其群則無

害也。且民少出資而可以受學，與多出資而後可學，孰爲得失？人能辨之。今者歐羅一洲學官如林，其中規制尙有不便於民者，正坐學費貴耳。後有人焉出而更張之，使民之受學如乞水火，豈非教化一進步也哉。

三、所謂禁其徒業，使之不得自然通流者，如國有例禁，致一工既衰，民不得移其力於他作，一業既病，商不得轉其財以他營，壅滯既滋，不平遂甚。前之所謂徒限工聯，皆此其也。有徒限，則業不得相爲轉；有工聯，則地不得相爲通。是以軒輊之差，往往時事變遷，一業之庸，日增月起，而就衰之業，工之餽廩，倏然僅足自存。前者如川方增招工日急，後者退矣，而工作人數不減舊時。二者常在一邑一鄉，豈然分區毫末不能相濟，問其何不令此他之，則徒限爲梗，業難互更，工聯各保封疆，彼此不相容。受彼執徒限之說者，固爲業有專攻，非始於爲徒不可也。不然，製造之業相似實多，苟許相通，無難更執。試問織泉織絲二者皆素無文，其工巧有何殊異，即至轉而織，其事雖有分殊，顧相異至微，數日之間，即可改操新業。假無徒限，絲泉與絹三業

即可互通。當其一業就衰，餘二皆資挹注，則旺者無缺工，其庸不至痛癢。衰者無浮食，其庸亦不能過跌矣。惟其不然，遂致失業者衆，一業告廢，其中傭作僅有二塗，或無所事事，自稱貧子，而仰食縣官，或降爲常傭，而緣南畝，願田作勞苦，此曹所不習也。於是稱貧而仰哺者日衆矣。假使其國無養貧之政，則流轉爲盜賊者有之，立法阻民，使之不便徙業，其弊有如此者。

工聯禁約立而功力之難通如此，而母財之難轉因之。蓋母財之廣狹，視人工之多寡爲率。願母財之難轉，不若功力難轉之甚。每見城邑之中，聯約甚密，而鬮商鉅賈，欲役財立業於其間，雖有小費，究無大梗。至於執藝勞力貧民，不屬其地而欲覓食，則難若登天矣。

夫工欲移地爲生，而工聯爲梗，此在歐洲國而有之。至英國則有養貧之政，此其阻礙甚於工聯。工聯所限者，其地之工而已。至養貧之政，則並其地之常傭而錮之，使之售力求生，必在土著之方而後可。去此則皆不能。此緣一邑一鄉，各有贍貧之責。

其費即出於鄉。貧者愈多。其費愈重。而售力執藝之傭。多皆貧子。舍故投新。人皆不納。故耳。養貧之政。其緣起變革。吾得梗概言之。亦考國俗者所要知也。

羅馬公教衰。天主之菴寺毀。孤寒失蔭。坐以凍飢。於是英倫當國者。謀所以振之。而思無術。泊額理查自立。則令鄉縣編戶。各自給其貧民。致死者有罰。鄉置有司。與其地脩教牧師共掌之。庶察收養。以時視其鄉貧子多寡。與鄉民貲產厚薄。而上下其所斂之費。以贍之。號曰養貧之算。

案英國貧算之立。昉此明代以來。日益繁浩。竭民耗國。雖欲革而其道無由。論治者皆深病其始之以姑息而作俑也。斯密氏推原其制。以謂起於公教之衰。貧民失怙。他家之論。則不謂爾。考額理第八朝。造銀幣以賁其民。窮無儲蓄。大抵空乏。繼而貪牧畜之利。廢麥龍。斂羊。南畝之民。什九無業。有明嘉隆之際。英野多饑。孳矣。此振貧之政。所以不得已也。菴寺之毀。其益困之一端而已。

此令既行。鄉有養貧之責。於貧戶著籍。不得不詳。於是察理第二令曰。民徙新籍。必

安居四十日而後爲其地民不及四十日爲其鄉所不欲納者牧師鄉有司以告其地司理復之於所從來其著新籍力能歲出田宅租十鎊以上或自置質保不至以貧累鄉里者聽徙勿拒

已而禱張之幻緣令而生鄉吏往往以財啗其貧子令他徙而沈命四十日勿出則爲新籍民而舊者脫無累故雅各第二更令曰民徙新籍詣牧師若有司署其前籍及其家丁口之數於是日始計四十日安居者則爲其地民

然而未足也如是則拒受之權在鄉吏姦無由絕故威廉第三更令曰民徙新籍詣牧師若有司署其前籍及其家丁口之數揭之於觀堂民於安息日所聚禱祈者自是日始計四十日安居者則爲其地民

一令之不詳則補救者如蠅毛而起總其所爲非使民得移徙也四十日安居否不可得其效適用錮民而已而長民者之意又以錮民爲不可也則更設四條以通之一凡民能出貧算者聽徙勿拒二爲其鄉所推擇爲吏滿一歲者聽徙勿拒三入其

鄉爲學徒終其徒限者聽徒勿拒四爲其鄉僱傭滿一歲者聽徒勿拒然而四者雖設於勞力操業之民無所益蓋於前二條則必爲一鄉所衆許彼知新來者雖暫出賃算後未必能也則拒之亦終不推擇之矣由後二之道則有妻子者必不能學徒罕有室者況律又載明有妻之傭雖受雇滿歲不得著籍其效徒使雇傭者從此不以一歲爲期此雖古俗轉坐此令其俗以變不獨雇者不樂因此予人以新籍卽受雇者亦不願緣此而亡其舊籍也蓋鄉有貧人而其算加重自爲人人所不歡而貧者於彼此既同一食貧亦不願舍舊謀新而去其親戚墳墓也
自食之工無所依倚而售其技則後二條所謂爲徒爲火而許入新籍者於彼無所用之大抵如此之工覓一佳所欲遷往往不爲所納納者必歲出十鎊之租抑自置賃保其不至仰食賃算而後可而賃之多寡鄉吏以意爲之顧至少不在三十鎊下知者以律載買業價在三十鎊下者不得於其地有籍也則因保貧之質不止三十鎊也夫三十鎊之質已爲傭者所難矣況乎其不僅此也

案移籍著籍之難。其事純起於養貧之政。如中土冒籍之訟。之起於學額也。他國無此。民之流轉。自可聽之。而於英民所爲。幾不識爲何事。一貧戶之應歸何養。二鄉涉訟。時時有之。律師訊勘之費。積久不貲。而皆出於貧算。此所謂爭其末而傷其本者也。以其病民之故。同治四年。自額理查白以來。所有籍法。大抵皆能則斯密氏不及見矣。

令因養貧起者如牛毛。傭作途不得就善地以售其力。欲維其敝。於是手憑之制。又與手憑者。威廉第三令曰。凡民徙籍。取本鄉手憑。憑由其鄉之牧師。若有司畫給。兩理官察驗署名。所就鄉皆納勿拒。不得以豫防食算逐之。其真食算者。由原鄉給予。或另徙。徙費亦出原鄉。同條又云。民新徙入鄉。非歲出十鎊田屋租。或在鄉官所受。屆滿一歲者。不得著籍。

國家既以令使小民不得自由矣。乃以其敝之故。更以令補救之。卒之其與幾何。觀律家補恩之論貧算可見矣。蒲之言曰。鄉受新徙之民。其必責手憑者無惑矣。自有

手憑而民之欲著他籍者無論以徒限以名以揭白以出算其勢皆不能賃傭徙夥不能以手憑移居也至於貧而食算得手憑而知所復即未復其所食者又其故鄉之算也抑病不能行于手憑者有資給之責是故鄉官出憑以予小民心至不願持而去者十八九還其累本鄉也或過於勿徙由斯而言則手憑爲物受新者必欲得之去故者常欲勿予自然之勢也徒爲厲民之具使鄉吏得以禁錮貧傭之生雖地著之鄉有至不便欲適之土爲甚可樂而不幸生有定區則亦終其身於不得出而已矣

手憑所載不過本丁姓氏年貌籍貫而已非若薦贖契券於其人之行誼財產有所指辭也顧鄉之小吏往往斬之吾聞蒲恩言往者政府嘗以此爲苛下教飭牧師監算者順民情盡諾而王府法司格不與行也

由前之故英內地工庸優劣往往連境迥殊食力小民未有室家身健技精業勤者不得手憑尙可他徙其已娶有子女則拒勿納前饒後娶前客後逐者有之大抵慮

食算之口多也是故兩地雖犬相聞其一雖役急而庸高其一雖丁多而功寡相需雖殷不相轉注蘇格蘭無養貧之政故無此弊僱之同功異廩必二地絕遠而後爾大率都會庸優鄉野庸薄去都彌遠其率彌下若英之工價有豐儉相絕而莫知由然者矣是故一制之立黎庶焚生其極等於畫地爲牢民莫之踰峻嶺巨川無以過也

夫爲本國之民身無罪罰擇地力業去苦適樂之事詎得自由者也爲法網之背天逆情甚矣吾輩英民恆持自由之說平日之論斷斷如也然其實則與他國之顛愚等耳日言自由而不識自由之實爲何者此所以籍法之虐身被之者百有餘年至於今猶自若也其中潭思之士論政之家固常準理抗言知籍法爲厲民之具至於庸衆則相忘矣前者連坐之令舉國譁譟非其令立除不止夫連坐之令雖苛身被其毒者尙自有數獨至籍法則舉吾英勞力之民年在四十以往者叩其身世必有一時大爲之困於彼則譁而攻之於此則默而受之夫亦可謂慎矣

此篇著論頗爲冗長然猶有不容已於言者則國家平價之一事古嘗以令平通國之工庸物價矣有所不通則令所部相其物土擇其事類各自爲之至於今二者之政皆廢蓋視前事亦知其政之不可行也善夫蒲恩之言曰政治家積四百餘年之閱歷應知物有至情不可強制國權有大限必不可以逆施使同業者必同傾軋則必勤惰同功巧拙齊效而後可有是理乎乃若耳治第三之令曰縫紉之業凡工頭雇夥居倫敦城中及離城五邁內者除過國郵其日庸不得過二先令七便士違者取與二家均有罰此正蒲恩所斥者也凡議院畫定一業中雇者與被雇者兩家相受之率其強有力而持議者恒在雇者之家故其令主於被雇者則多平而公主於雇者則多偏而私也今如雇工律禁製造廠主不得以所出貨給工食必令見財此法極公於雇者之家無所屈抑而售力之傭免侵漁冒蝕之毒此主於被雇者也如若耳治之令則主於雇者之家矣雇者之欲困工傭也常合從立限制而不嚴罰若工傭尤效爲此則目爲把持而刑憲隨之縱雇者而獨繩被雇者故曰偏而私也如

若耳法之令將使傭者雖至巧極勤其所受極於二先令七便士而止此正蒲恩所謂使勤惰同功巧拙齊效者小民之困豈不甚哉

案縫紉工價之令於一千八百二十五年廢

又令主被雇者多平而公主雇者多偏而私此理自易見國有議院而院紳必家產及格而後企推舉如是則小民失主議之權而遇事或受抑必然之數也前謂連坐之法舉國非之而籍法之苛沿而未改亦以連坐之法及諸豪民而轉徙之艱受之編戶一達之議院一止於窮極故耳

考古平價均輸之制皆以裁制商賈之利入而設至於今則其制漸廢英國存者獨餅均之令而已誠以麤麪者民食所必資故也然使其地炊餅者惟一家抑多家爲聯則虞其辜權侵民均之善也若人得爲炊而無聯約則均之不若聽供求自劑其平之爲愈何則均價宜以時上下而上之爲此又未必時故也英國餅均之令設於若耳治第二時當是時蘇格蘭固未行也以蘇無司市以督賈之其後設司市行之

然夷考其效有餅均者無大益無餅均者亦無大損

案餅均之令於一千八百十五年廢

凡國世盛世衰若進若退若中立其爲事於通國之貧富有異驗於各業庸息相比之率無攸殊蓋進則俱進退則俱退此比例常同故也若夫異業畸有重輕其致然之因別有所在不得於國財之進退求之此所以庸息相比之率常應數百年而無變也

篇十一

釋租

案羅哲斯曰斯密氏此篇所論田租源流其說頗爲後賢所聚訟計學家如安得生威斯特馬格樂理嘉圖皆言田租者所以增壤地沃瘠之差故租之始起以民生孳乳寢多沃土上田所出不足以贍民食於是等而下之迨耕瘠土下田生齒彌繁所耕彌下最下者無租最上者租最重故租者所以第田品之上下而其事

生於差數者也。其論如此。名理嘉圖租例。其爲書多準此例爲推。亦多爲計學家所采取。顧自今觀之。此例大悞。固已爲斯密氏所前知。而法國計學家如拓爾古等。已爲斯密作解人矣。其言曰。後人嘗謂斯密雖計學開山。顧多漏義。淺者乃肆意排之。不知斯密精旨。往往爲讀者所忽。故匡訂雖多。出藍之美蓋寡。夫租之爲事。生於二因。戶口蕃耗。一也。農事工拙。二也。當夫戶口寥落。穀價甚廉。耕者之穫。僅及所費。則卽居沃土。不能有租。此主於戶口蕃耗者也。又使農業不精。田作虛莽。西成所得。僅酬其勞。則雖土沃穀貴。不能有租。此主於農事工拙者也。田土腴瘠。農事精粗。二者相爲對待。而戶口蕃息。緣此而生。惟田腴事精。而後戶口始進。故理嘉圖所謂戶口日滋。耕及瘠田者。倒果爲因。其說未必信也。英人卽一所之田。考古今徵租之異。而信斯密本篇之說爲不虛。譬如都會近郊。一畝之田。古租率六便士。今日之租。則百二十倍矣。至所產穀價。古今之殊。不過九倍。此之爲異。夫豈戶口蕃耗爲之耶。又豈必遙望下田致爾耶。揆所由然。則農業日精故耳。故

理民之例既非獨關亦未精審其非獨關以先發於拓爾古其未精審以其倒果爲因後代計學家見聞考據常較斯密氏爲博庫至於紉繹會通立例貶盡則往往遜之

今夫地之有租所以易用地之權者也雖地有不齊（謂肥磽便左）其數要皆極耕者之力以爲量當其授田議租之際田固地主之所有也而以授耕者使得耘且穫於其中則田主之所取償固將盡地力之所出而所遺以與耕者直償資其爲耕之費與勞若子種若佃傭若牛馬之糗芻勞損若田器耨鋤若耕資所應得通行之息利統之數者以酬之而已矣夫統之數者固耕者所應得而至穀之分也劣是則利不償費而農人不徠而其田以廢故租之有限田主之所不得已也總秋收之所得過前數者彼將悉名之以爲租雖有時以田主宅心之仁厚析利之不精而名租之數劣於此抑有時以農人更事之不廣責贏之不詳而納租之數優於此然而非常道也夫人情終不遺餘力以讓財故曰雖地有不齊要皆極耕者之力以爲量也

極其量者是謂經租。

地天設也。加之人功則益美。爲田主者曰。田之有租。非屬農也。凡以償主者治地之勞費云爾。此固有時而誠然。然非通例知者。以未治之地亦有租也。設彼誠治之。則名租益重。過於未治之本租。且地之治也。出於田主之力者少。出於耕農之力者多。及其則盡。以田授他農。田主常視前農勞費爲已之勞費。而於後農增租矣。

地之責租。誠無分於治否。且有地焉。非人力所得施。其主之責租自若也。海有藻名萬羅卜。婦之成蠟灰。製頗黎及胰皂者。恆用之。英國濱海之地。幾處多有。而蘇格蘭尤多。皆生海石。開潮及之日。兩番潮退則露。此之地利。豈人力所能爲。顧田之並海。以此爲畛畔者。田主責租於常田。爲有加。此益見名租與治地二者不相謀也。

蘇格蘭極北有島曰赫德蘭。海中多嘉魚。爲其地民生所利賴。然漁者必其地居民。外畧不得闖入也。於是其地名租。兼海而課。土之所穫水之所捕。合而徵之。數魚爲完。英之徵租。所謂任土作貢者。於今蓋寡。此其僅存之一事也。

是故田之有租所以易用地之權而與爭權專利者同物蓋田租高下之率不與所
前費者相準以爲最高最卑之分限而獨視農者所有餘產出之力以爲差率權之
名價也不視供者之價值而以求者之喜厭爲乘除故曰與同物也

百貨之入市也必其價有以償其貨之所前費又益之以通行之贏利而後貨通
則棄於地矣此所謂經價者也今使市價一於經價則所溢者將斷而爲租仙適如
經價而止則租無由出而市價之益不溢又視乎供求相劑之大例

地之所產有物焉求常過供則市價常溢有物焉求或過供或不及供則市價亦或
溢或不溢故產前物者其地常得租產後物者其地或得租或不得租而供求相劑
之何若

是故合三成價租與居一焉而其所以入價之情與庸贏大有異庸贏之高下物價
所以貴賤之因也而租之重輕由物價貴賤之果也夫百產之入市既必有以償其
前費而益之以常贏矣故其物之貴賤恆視之至於租獨不然以市價之於經價或

大過或小過或適均而租則或重或輕或並輕者而無之。

析而論之則此篇言租之事可分爲三。一論地產之常得租者。次論地產之不常得租者。三論二產隨世升降相待之變率。

案後之計學家皆主租不入價之說。而以斯密氏合三成價之例爲非。蓋租之重輕與物價之騰跌爲無與。故租雖重。厲耕者而無所屬於食業之民。租雖亡。其地產亦不因之而賤。貴賤者大抵供求緩急之所爲也。今使一國以其政令之煩。致租稅重。農業病。而民生無然。正固其法過也。而租不入價之理。自若。此後賢如李嘉圖等之說也。雖然。吾觀斯密氏合三成價之說。亦曰價之中亦其爲租者耳。至於價之騰跌。非租所能爲。則彼固曰庸贏者價之因。而租者價之果。本末顛然。未必受後起之擊排也。

又案租與稅不同。今假國家於城市設關以征野之人貨。則供者於其庸贏轉運之外。自必加此稅者。以相濟。則價以之騰。矣。至於租者不然。故曰租稅異也。

以下論地產之常得租者。

人道養生之理與動物同。其進率與食之多寡有比例。是故天下無棄食。如稻粱菽麥如牛羊魚鳥。凡在可食之科。皆有馭功之量。或用今施之力。或用舊積之財。其爲功同也。今夫以一鍾之粟。食數夫之功。雖以至覈之道行之。其所易之功。常劣於是粟之所實食者。然而既有以廩其庸矣。自必有爲之致力者。而庸率之高下。則時爲之。

案庸率常過於勞力者之所實食。亦不容己者也。備不能常作勞。有疾病。有休老。且必有以長養教誨其子孫。使庸率僅足以養其當時之軀。則勞力之民。彈指盡矣。

地無論便左腴磽。及其可耕。則總其所登。常大逾於所費。天之酬庸。比諸人之爲酬。倍蓰不啻矣。故地實告登之時。不僅勞力者有以復其廩也。卽具母者亦有以滋其息。二者猶有餘焉。則有地者之所賦矣。

那威蘇格蘭二國雖極荒之大澤廣場皆足資游牧計其中預酪孽乳之所出取以償殷擾之勞覓種之費有餘則地主有薄租地愈美租愈大牧場美者延袤相若而所牧之畜多地狹畜多者其飼視衰牧皆易功不煩而產增故地主之租倍進也案有時地雖有租而其實不中名租農者所受之田牧者所受之場往往善惡相錯於是名租者絕長補短通而徵之非其地皆中名租也

田之名租也土壤之肥磽相若則視所居之便左所居之便左相若而後略以土壤之肥磽故負郭之田其名租也中下者等於鄙遠之上則蓋耰鋤之勞雖均而所產之入市求售僻左者不能不加費轉輸加費則秋收之入分以爲庸者多此盈則彼虛而贏與租皆以少矣前之言贏也已明鄉鄰之率常較都會爲優矣庸多而贏優則僻左之田雖耕其租必甚薄矣

凡大道通衢與凡可漕之水皆所以利轉輸利之云者所費省也故凡國水陸大道道里治闢而遠近若一者太平之實象而致富之樞機也蓋遠服之地闢則耕者之

界漸廣。邦畿處其環中。而遠服外繞。距中彌遠。其環界彌宏。故也。夫鄙遠之地。通都會首。蒙其利。何則。以不受近郊者之專利也。然而近郊之民。獨無利乎。於都會雖失其壟斷之私。而市場日廣。失於中者。收之於外。二者相較。而恒有餘。則亦蒙其利矣。所惡夫辜權之事者。非曰徒以專利已也。國財之理。必分之見。於民業之日精。而後合之見。於國財之日阜。常智之民。其樂循常賦。改轍而好逸。憚煩苦也久矣。使不憂相競之勢。而圖存。則其業必難精。而易窳。業而如是。國之資破。不待言矣。五十年前。倫敦近郊諸部。皆合詞呈請議院。世許遠部集貨。造大道通倫敦。意謂果其聽之。則下邑工庸極廉。成貨運都。必奪近者之利。而城中田主之租。亦且坐減云云。其言如此。當時和者綦多。然而道成之後。近郊之租轉增。即農業亦日益精進。嗚呼。計學之理。豈易言哉。

案此事豈獨於一國爲然。六合之大。盡如此矣。彼斯密之世。汽舟鐵路。猶未興也。至於今。則何如。非洲之奧區。烏拉之荒服。致其所產。若在戶庭。此則大字之內。遠

近若一庶幾太平之見端矣。曩關內外鐵軌未興時。士庶知與不知。皆言鐵軌行。則小民業舟車者絕食。理至明顯。云不然者。非覲奸利。即清狂不惠者也。然自道通以來。舟車數增倍。徒事效反於所期如此。而至今談國計者。尙謂礦路諸政。無益國計。有害民生。理之艱明。豈口舌所能爭者哉。

竊嘗謂聖人之所以開物成務。一言蔽之。事在均其不齊而已。是故衣裳垂則均寒煖。宮室立則均雨暘。制文字則有以均古今。設庠序則有以均愚智。倉廩者所以均豐歉也。城郭者所以均安危也。甚至孝弟之教。刑賞之施。莫不有均之效焉。至於今世。則所以爲均之具尤備。其力尤閎。其效尤爲遠且大也。火器用而執兵者之羸壯均矣。汽電行而地之遠近均矣。鈔號均用財者之緩急也。保險均人事之夷險。壽夭也。光學所以均目也。音學所以均耳也。願均者雖多。而其所欲均而未能者尙夥。民德之厚薄。民智之明暗。民力之貧富。與夫民品之貴賤。而皆所未逮者矣。大抵至治之世。其民勢均而才殊。勢均所以泯其不平。才殊而後有分功。

之用。夫而後分各足而事相資。而民乃大和。繼今以往。治道實而言之如是而已。後之君子。其諸於余言有取焉。

苟以養人之量爲差。則中上之稻田。所出者過於同鄉最腴之牧園。耕之爲勞。過於轍牧固也。然而秋收之日。所穫者以價子種。賸力庸之外。所餘實多。故使牛羊之肉。與五穀之實。常重等而價同。則耕者之穫。過於牧矣。夫如是。故農者利優。而禾田之租亦厚。地爭墾。田人樂耨。此游牧之所以轉爲耕稼也。

治化稍稍開。則穀價與肉價之差。隨時輒異。當地廣民寥時。國中無廬。皆牧場耳。故其國羶肉多而嘉穀少。民以穀食爲難。而穀因之貴。南美有地名般那舍利。一譯言佳氣。一四五十年前。每牛常價四理亞。當英錢二十一便士有半。一牛之獲。不售捕捉羶鬮之勞。其賤如此。耕田種稻。則勞費不貲。蓋其地近格拉特河。當波拓實銀礦之衝。人趨采銀故也。肉賤穀貴之國。其狀如此。洎文明肇辟。耕耨雲興。則其事反此。肉少穀多。而有非老不得食肉之政矣。

稻田日廣。則牧場日狹。牧場日狹。則肉價日騰。設此之時。其可爲稻田者。不爲稻田。而縱牧如故。則牧利之所入。不僅有以償牧費已也。必牧之利與耕之利相若而後。可。屠肉入市。其善地之所收。與惡地之所收。無以異。而其價同。夫如是。則惡地之主。大利。緣穀牧之利。其得租去稻田均矣。百年已前。蘇格蘭山部。牛羊肉與其雀麥。飼輕重等。則貴賤同。且有時而劣之。自南北既合。蘇之牛羊。販而售於英市者。日夥。由是肉價日長。至今乃三倍矣。而山場之租亦比例而加進。今英國麥肉相待之率。大較屠肉一斤。可易二斤以上最美之麴麴。設積歲所易者。尙不止此也。

由此觀之。知萊汙日闢之時。斥鹵牧場之利。一利兼租贏而言。一視善地牧場之利。爲升降。而善地牧場之利。又視已耕之田之利爲升降也。且五穀之利歲登。而穀牧之利則必通四五稔而爲計。是故同一町田。以之出肉則見少。以之出穀則見多。耕牧利懸而並存。固必於其價焉取之矣。使其取價過平。田將改牧。使不及平。則牧將復田。必然之勢也。

牧出芻田出穀出芻者飼畜出穀者飼人謂二者收利終底於平者以舉一國之地任其自趨大較必終如是而已顧有時地勢不同出芻之利遠過於穀者亦有之案芻場之租往往較之稻田而重者其故有二戶口蕃稠肉食者衆而牛羊大貴利厚一也產芻勞費遠減五穀母輕二也

都會近郊之地戶口繁開轉輸輻湊其中人所飲之湏酪馬所食之莖芻皆不可以一日闕又况磊肥驅墜之家日衆其勢有以使出草之利遠過於稻粱然此必其地之形便有以爲之僻遠之地所不能也

事業繁興戶口大進近郭之地所產芻穀皆供不逮求則其地以出芻爲最急而出穀次之何則穀貴而易輸芻粗而難轉也今之荷蘭古之羅馬芻供於近服而麥則漕於遠方職是之故拉體諾史載嘉鐸之言曰家饒足視飼畜未耜之利乃無可言當是時羅馬以兵力雄西海勝一異部常徵其地產什一贖邦畿國有慶則發倉廩與民其所乏者非穀也故繞郭之田盡爲芻牧而耕之利微矣

曠野平原。徧種麥稻。就中樹園柵爲圍牢。其租較國外耕地。往往而高。蓋田事實屬牛。而馬牛需芻牧。就地爲圍。便田事。故其租乃合所耕之田利通計以爲價。不以本場所出芻牧定高下也。設其鄰地盡斥爲牧場。其租減矣。蘇格蘭園地租優。大率由此。夫園場之善於散牧。所由來久。蓋納畜入園。不須駁牧。一也。畜自芻草。不受人狗之驚。易肥健。二也。

若牧場隨在多有。不難得。則其地之租與廩。必與左近受耕之地常租常廩相視爲率。不能獨優也。

徒任地以爲牧。則地之出草有限。而所飼之畜雖多。此耕稼城郭之國。肉食所以恒貴也。邇者藝草法行。又以蘆葦著漬諸植物。種以飼畜。於是一區之地。所設養者。其數遠過自然生草者。牧者地如故而畜牧蕃。肉穀二價相比之率。乃減。倫敦之市。今日屠肉麩麴。二價相懸。方之五十年前。其減多矣。

案所謂藝草。蓋不任自然。而以草子播種者也。康熙中葉。英國始傳其法。戶人以

當時報紙有傳賣草種告白。目爲新法。以蘆葦飼畜。其法先行於荷蘭。後乃傳英。其法舊於蘇草也。

史家柏爾志爲王世子顯理作傳狀。附著其時物價甚悉。牯牛四體重六百磅。價約九幾尼有奇。是當時每百磅牛肉值三十一先令八便士也。顯理短世。薨年僅十九齡。時一千六百十二年十一月六日也。

一千七百六十四年三月。英國民食騰踊。議院雜考所山然。有威占尼亞賈人。自言於前歲三月。爲其海船備食。每罕都維牛肉二十四五先令。爲常價。有至二十七先令者。由英倫至威占尼亞。海道遼遠。非佳肉不足醃致。然以與世子顯理時相較。則百磅歷四先令八便士矣。

顯理時肉價。每磅計三便士又五分便士之四。而其肉則精粗相半者也。可知佳肉入肆零售。每磅不當在五便士或四便士半下也。

一千七百六十四年。議院所訪肉價。佳者每磅四便士一法丁。粗者約自七法丁至

之勝必適償其費而不能甚有餘必然之勢也

若苦蔬一質若松子可以釀酒一若果實若菜蔬地之類此者其租與贏常視耕牧爲優矣何則地中國國者有樊渠之費如是則租宜加果菜之儲其勤巧過常佃如是則贏宜厚且果蔬之穫天年不齊雖損大異以視芻穀難恃倍之故一收之利必通數稔而晦其平此所謂保險者費也行其中矣雖然園圃優矣顧蔬者之家則十九貧窶卽有善者不過中貲則知此曹計出爲入曷嘗甚有餘乎況灌園種樹足以怡情養生故富厚之家往往操之以爲遣日消閒之事如此則小民之利愈奪而仰以糊口贍家室者難言矣

地經濟闢舉設而所收利增固也然亦僅償所費無饒餘此著自古昔而已然者也考傳記園圃之產珍者葡萄菸蔬次之故葡萄坪與得水霑足之蔬畦農家所絕重也德謨吉利圖生二千載前其著書言樹蔬最早嘗笑其時種蔬者計拙曰種蔬必以扛似石爲之則太費壟墾爲之暴風疾雨又往往坍塌歲時葺治愈不勝煩云云歌

路默拉爲書言農事於德謨說不置辨。則謂易垣以樊柙棘爲之費輕而耐久難圖。夫樊圃淺制耳。德謨時人顧不知之。而待歌路始發耶。同時言樹藝者有哇樂。後四百餘年。有百里知次。皆主歌路之說。由此觀之。則古之農家。皆以治圃爲已費。課其所得。或不償灌漑壅護之勤。況南方諸國。近日炎歊。非以交通得水至易者。不中作圃。而至今歐洲蔬圃。例用棘樊。獨不列頗泊北地諸部。蔬果蔬者以其實珍。始設垣柵。故英之佳實。厥值常昂。否則不能得藝也。此間蔬畦。亦間用平常果木園之爲籬柵。果賤而蔬珍。蓋果蔬所收。相輔爲利。以償費也。

自古至今。凡產酒之國。皆重葡萄。種術如法。其得利最優。惟新墾之坪。則利否相半。此義大里農家向所闕爭而未定論者也。歌路默拉書主新墾之利。以所收視所費。謂葡萄有倍稱之息。非他樹藝所可擬。顧經營之事。僅以所出較所入者。其說常差。而以樹畜爲尤甚。信如歌路言。前人論定久矣。聚訟何爲者。法蘭西產酒最有聲。持論者欲張樹畜之業。大抵是歌路。而舊種之家。則謂新坪多虧耗。其說莫適從也。或

謂舊種者於此業稔故其說多長可信然亦不盡然舊種之家專利日久伎新墾者之奪其利乃操此說沮之。轉於其言意欲路之說之或可信也。一千七百三十一年法之政府令曰凡種葡萄無論新墾之區抑舊墾逾二年更種者非王所特許不可又須旁近民報明其地不種稼穡若他樹藝。違此者有大罰。問所以爲此之故則云恐以酒醴妨稼穡也不知使國中酒醴誠多稼穡誠少供求之例將使種穀者日贏栽葡萄者日絀民方振此積彼無待上令也又不知新墾利厚即在官設限制之中使其繼之則供求之例將使二者亟趨於平不能畸優畸絀也且云酒醴妨民食者意謂葡萄占地侵稻田也乃今者法國麥田之盛莫自爾根德基安狼幾突若之數者皆栽葡萄產美酒之名部也而稻田加茂何耶蓋葡萄盛則造酒蓄造酒蓄則手指衆夫工不能僅食酒也則以民稠易銷之故而穀芻二者亦以利優起矣豈待爲民上者爲之周防諄命也哉吾乃知病農之政莫大於限民之業業限則貧貧則不蕃不蕃雖有地吾得而耕諸

是故耕牧而外。凡他樹藝。雖其實甚珍。所收甚富。常以治關種植之費多。其所得不大。過於耕牧。取其利例之。常相若也。獨至地居最宜。而區區狹不常有。則其產入市。常索高貨。其利非耕牧常率所可例矣。而此之饒衍。誰與歸乎。曰。歸諸地主人。

又知凡嗜二產地利之比例。主言常而不言偶。如以葡萄之利較穀芻。則其葡萄必國中之地。無論喉嚨埤埤。隨地可種。而亦盡人能藝。其成醴和平中正。有其宜人之常德。而非難得之佳醴。夫如是。乃有比例之可言。而可取爲準的矣。使爲地美之所獨鍾。抑爲人功之所獨擅。則絕類殊倫。非常品之所能爭者。固不可以定常率也。

今夫實之美惡。因土壤而異者。葡萄於諸實尤。吾聞葡萄之美。有某地之植。其芬甘醴郁。絕非培耘溉護之功所可觀者。此之獨美。誠物性然歟。抑人意異歟。姑勿具論。第其美有爲一町數畦所獨絕。或固諸小邑之一隅。或徧於大郡之太半。雖廣狹有間。而總其所產。終劣於中求者之所需。中求之經。恒不足以求。夫而後殷於求。而能出溢價者至。求殷且爭。價愈益溢。泊價之溢。與供之闕。兩相劑而適平。而交易之事。

以起此不易之定勢而凡物產之稱奇貨而可居者盡如此矣然而價溢矣而溢者大抵注於地主之租蓋厚資之歸必循其本不然將歸諸傭力歟則彼培耘澆灌者豈不比他所爲加勤然此不因加勤而溢價乃溢價致此加勤也且其產既珍而鹵莽之失甚鉅即在情僮猶知慎之將歸諸斥母者歟則釀成登市而得價取其少許已足酬斥母養傭者之本息是故大利必歸租何則產之珍系於地也

西印群島多歐民所主蔗田其貴重與本洲之葡萄坪相埒總其所出之製餉銷之本洲而見少安南所產白餉上上就地常價每鈞達三佩斯脫以英幣計之則十三先令六便士也法士波亞維爾遊歷泰東所記如是波於其地樹畜諸業最詳審也今考安南每鈞達實重自一百五十至二百法磅不等折中之可一百七十五法磅以英衡言則當每罕都維價八先令矣此以較西印所造棧色餉不及四分之一以較精白者則劣六分之一也越地所種民食稻麥二者爲多故稻麥蔗三者之利可即其地常價互觀而得其比例凡地主培植之所資三農勞費之所獲皆可以是通

其率矣。獨吾英外屬蔗田與歐美稻麥之利無比例。嘗聞治蔗田人自言其業之利。但以蔗餉蔗酒（即西國小民所飲之火酒）二者之獲已夠所費。其結晶成餉純爲贏利。此其言信否不可知。特信斯言也。則何異種麥者責一切之費於積壳糠粃。而以子粒爲實贏者乎。倫敦商賈爭買西印荒土置筦事者。資以母財。責治柴植蔗。規厚利焉。雖海國邈遠往返不可知其地刑政乖謬交易難憑不爲沮也。今假有極腴之土在蘇格蘭愛爾蘭抑北美諸部中無人爲此三方道里通平風波不惡程期可計刑政差平。然而人終棄此而適彼者則必有毆之使然者矣。

案此所言西印情形今昔已異。當日蔗田所以獲優利者一以壟斷限田之約。二以純用非洲黑奴之故。可知其利之興不出於自然而出於摘揉強致。終之黑奴之工始利終害。至道光二十六年專利約弛來者新舊若一西印之餉利遂衰。且蔗煎餉法行蔗餉之珍亦用大減而群島生事遂蕭條矣。

北美之威占尼亞與馬理蘭二部以菸利擅天下種菸利過種麥也菸草爲物歐洲

地大半皆可種。種之利亦甚優。然而莫之種者。各國賦稅以菸爲大宗。設令野田徧種。則就罷徵收。較之入口時當國納稅者。其事爲繁且難。而各國乃緣是而有種菸之禁。此北美二部收利之所以獨宏也。雖然菸利不及糖。糖倫敦富賈。斥母種菸者。固不數見。即吾民浮海逐利貨。其中慮往實歸。由菸者亦不若由蔗者之多且厚也。歐洲菸市。常苦供不副求。而價昂者。乃北美種菸之家。以術爲之。端端然恐新墾者之分其利。乃相聚聯約。令種菸無過於六千羅之限。一黑奴所出。無過千磅之菸。且產草作業之餘。須耕玉米田四闊克。又聞藝師道格拉言。種菸者年值賤收。往往聚葉若干焚之。使入市者供不及求。以要高價。此其事猶荷蘭人之於蘇桂。其爲術如是。然則此時之菸。雖有厚利。其勢不可長矣。

由此知無論地產爲何。其名租也。要皆以毀穀二者之所徵爲準。而不能遠有上下也。使其下之已多。則其物將拔。而他減。使其上之。則必其壤之性有所獨宜。而其地之所生。不足給中求者之欲得。適是以往。則不能也。今者總全歐之提封。麥。高粱。最衆。

則知凡地之租莫不折中於麥矣。夫既折中於麥，則吾英之民於彼法蘭西之葡萄、義大里之橄欖（以造油西人極珍之）復何羨焉？蓋二者雖珍，使通而計之，其收利名租亦正等於蜀麥。蜀麥之利，吾英之壤未嘗後人也。彼貧已而富其鄰者，可以悟矣。

民食種各不同，設二種之食，此易而彼難，地之肥磽相若，而出此倍彼，則此之田租必優於彼，而與農佃之贏庸無與焉。當其收穫，既償財息力庸之外，皆田主之獲也。微論其地庸率高下，所餘既多，食功自廣，而田主之利權自進，故曰優也。

今試取麥稻而並觀之，同一區地，以之種稻，比之種麥，所優實多。常田一歲再種，每闢克地所收者自三十布歇落至六十布歇落不等，故種稻雖於麥爲幼，然登場之利常綽有餘。酬農餽備之外，其利皆歸於田主。往者葛羅利納開屯之民，各占地畝，自具子牛種稻，其田歲僅一穫，且田作者皆欲產食麥，非其土之所出，然等而較之，其租於麥隴爲厚也。

稻喜溼。稻田美者。終古沮洳。交春。水漫畦者二三寸。故宜稻之地。不中麥。不中牧。不中葡萄。菸蔗。實則舍稻無一宜者。苟其宜之。則不中稻。以不能相轉之故。徵於稻者。不可例地租。此在稻國已如此矣。

外此歐民常食。則有薯蕷。其易生。殆過稻。不僅麥也。夫薯蕷之養人。其不及麥固也。今以麥薯蕷二物。權均重等者相較。則薯蕷之中。一半爲水。而麥則堅實多精。然而同一闕克之地。其種麥得千斤者。以種薯蕷。可六千斤。是去半而其養人之量猶三乎麥也。且薯蕷耨鋤之勞。減於藝麥之作。使歐洲之國。他日以薯蕷爲糧。若亞南之於米。而占地與今之麥隴均。則地產養人之量將愈優。以所收較所費。比例之率。滋大。然此皆地主之獲也。故用薯蕷。則生齒日蕃。而地租日大。

案斯密此說。已驗於愛爾蘭。愛民以薯蕷爲糧。而其地行零田法。地主之租最優。戶口亦不數十年自倍。顧此非愛爾蘭之福也。道光二十五年之際。有蝻爲災。食薯殆盡。其地大饑。民轉死溝壑者幾半。而英國亦從此罷稼法。蓋民生所恃者。

既專且隘。稍一乏絕。死亡隨之。且食糧過賤。俯拾即足者。其治俗亦往往不進。孟子謂菽粟如水火。則民仁義。徵諸實事。乃不盡然。

又使以薯蕷爲糧。而占地與今之麥隴均。則國中他穀之租。將以薯蕷之租爲程準。而與稻不同。蓋薯蕷可生之地。則嘉穀美實。皆可以滋。不若秔稌涇田。難以他藝也。往者吾聞藍克沙人言。雀麥之美。以之搏飯。其養人勝麴麴。勞力小民。食此最善。吾蘇長者。亦操此說。顧不佞終疑而不能信也。試以英蘇兩土之儲觀之。蘇儲之醜弱。皆過於英。而南北富厚之家。則無此異。然則雀麥效可睹矣。獨至以薯蕷爲糧。則不然。倫敦都會之中。其作使負戴之傭。門者走卒。降至倚市之倡。壯佼豔冶。問之十八九愛爾蘭產。亦以薯蕷爲糧者也。此可以證其物之益人。而雀麥方之。邈然遠矣。特薯蕷爲物。不中蓋藏。非若稻麥之數歲不腐也。以未售先敗之足憂。故其種之也。常有節而不可過。其所以不能與五穀同量者。職是故耳。

以下論地產之不常得租者。

夫地有所產其地主常可以得租者獨民食耳至於他產則或有租或無租視其所遭值之事勢

案地產民食亦不必常得租說見篇末

民生事之所必資者食之外莫若衣居矣方一地之未墾其任天而有者食之材少而衣居之材多及其既墾則所產常反是夫民寡而衣居材多則強半無所用之莫與爲易而無價值之可論就令或轉以爲民用矣其稱值也將僅計其所治之勞至於其材與凡所以爲坯樸者不齒及矣及其地之既墾將衣居之材日以見少材少而資之者多於是交易之事興焉而價日以起夫如是則地無棄材見產者既悉取而用之矣而求者未已以求者之殷也故釐以入市其名價也將有溢於運致轉輸之勞費者焉價溢於運致轉輸之勞費夫而後主其地者可以有租

何言乎地未墾則食材少而衣居材多也初民之衣大抵壯獸之毛革而已或射獵或游牧食於斯者衣於斯然衣之勢不能盡其所食者匪所與易則棄於地矣美洲

之北境。收獵之民也。方未通時。其事正如此。至於今。則出其餘皮。易麝。麝爲鎗。苔蘭提酒。員輿之上。交通日恆。雖極榛狉之域。第使其地可稱產業。則其國常有與通。取其族所不能盡用者。出以與人爲易。其得價溢於運致轉輸之所勞費。而薄租以與蘇格蘭山部皆畜牧。當牛羊不能出境時。所與南國互市者。多皮鞞。而牧場租起。英吉利之羊毛不自織。則致之伏蘭德。伏蘭德國富而民藝。英所不逮也。而英牧場之租。亦緣是而有。此皆斑斑見諸史冊者也。使當日者。英無伏而蘇無英。則通商路絕。是毛革者。爛於泥沙已耳。產此之地。又烏從以有租乎。

案所言蓋英國義都活第三時事。當元至正。明洪武間。是時英之羊毛。幾通國財賦之所從出也。

至於室居之材。任天而有者。曰石。曰木。其物方之毛革爲難轉矣。當其荒棄。所產之地。固無有租。此不獨在古爲然。即今商國。往往而有。今假有石坑。處倫敦之左近。則得租或甚優。乃北之蘇格蘭。南之衛勒斯。所在多佳石。主其地者。未聞有所得也。已

伐之木任梁棟者置五都之市名千金之資地產此材徵租不薄獨至北美諸部參天合抱之材扶疏膠葛其地主招人斬伐不名一錢乃莫肯顧吾蘇格蘭山中之木亘古不采可致入市者僅其皮耳而至美之材常爲溝中斷薪租於何有即有時轉而成器所可租者不逾斬削之工庸其多而無用如此然有時地勢利便而適爲建造之所資則租有時而可得往者倫敦砌治道塗蘇格蘭並海石坑之主遂得前未曾有之坑租那威海岸諸林其木常運英得善價其地亦有租也

國之庶否與民食有比例與衣服宮室之材無比例也民求食難而其二若差易無饑矣更求其所以禦寒暑庇風雨者大抵皆可得至煖衣安居而苦乏食者初民屢屢有之英國山野之民其所謂室者可以一人一日之力而具其衣以皮革爲之雖稍費亦易成故初民一歲功力用其百一治衣居有餘以其九十九求食或不足也治化進收牧之衆轉而地著一民之所勤動至少可以食二人是故半其業以治地則一群可以無飢而其半以暇日脩餘業資以養餘欲給餘求焉則冠褐屋廬與夫

宮中之械器其華華大者矣。今夫食富者之於貧其精粗美惡與夫烹飪之宜則容有閒耳至於多寡之分非絕殊也。而富者之壇殿廣宮與其簞笥之稠疊以與巢居卉服者較將其異者不獨在品即量亦相絕也。一品者以德殊量者以數異此秦西學家衡物恒言也。一蓋飲食之事限之以人腹腸滿斯不過獨至安形所需悅目媚耳則起居之愜適陟降之閑都被服之華作使之便其嗜欲之量有隨人欲而無窮者矣。故民食既贖之時莫不願留有餘以求其他所欲得者易足者以其有限而即足其心所不足乃在常不能足者此富者之情狀也。小人謀一飽而猶難而一耕之中貧者又常居其大分則各奮心手耳目之力求有以得富者之驩心而求者既多勢必相軋或其技之特精或其價之較廉以冀乘人而取我此貧者之境象也。至夫田野日治民食日充求食之徒乃愈益衆於是分功局成天地之遺利日出其物材之夥有過於飭材之衆者矣。是故百產告登民以滋侈物或以利用而見收或以飾觀而見設自夫粟菽布帛以至鎡鋸瑣瑣山諸地腴之深登諸墀几之近總是有形

究不外冠褐屋廬與夫宮中械器而已豈能奇哉

由是而知民食稼穡者租稅之源不獨能自出租而他產之出租亦必待田野既闢稼穡饒衍之後而始有也且他產雖出租以給其地主矣其爲物之情又未必常如是也蓋百產之有租與否要必視供求相劑之如何必其求之之殷使市價有以逾於輕價否雖在田野既闢之國其勢無以爲租也市價之所以逾輕其所待以爲盛虛者至衆非爲詳論未易明也

今試即石炭一事而明之石炭礦產也礦必有主人而發掘開采之後或有租或無租恆視二事焉一曰礦藏之腴瘠一曰所居之便左夫較礦藏之腴瘠者功同而所出有多寡耳假使礦藏過瘠而治者不酬其勞費則雖置其礦於五都之會采之無所利也無所利則莫之開莫之開則其地坐廢稍進而礦藏差腴開而采之其入市而收利也僅能償其勞費酬勞力之力庸復役財者之本息夫如是則其礦可開矣然而不能有租故其礦多地主自具母財而爲之所獲者祇通行之贏率而租所不

計舉以與人爲之。則甚少矣。如是之煤礦。吾蘇格蘭多有之。地主自采賣。租則他人莫承。更進而礦藏彌腴。開之勞費。與他礦同。而所出甚富。如是而不開者。則又以其所居之僻左。繞礦之居民鮮少。所出者供過夫求。又無通行大道。與夫可漕之渠。則雖腴仍瘠耳。故其礦亦廢也。

以煤爲薪。或云有毒。故人用之也。少於芻蕘。設其地薪煤並有。則煤價劣薪無疑。一斯密氏生於乾嘉間。其時英民於石炭如是。此又徵其國世變之一端矣。一無論薪價高低。煤之出售。終不能過薪而更貴。今使聞一國之中。其焚煤之費。與燒薪相等。則不問而知其煤價之已極。英國內地如鄂斯福。其居民皆取木煤二物。拉雜燒之。此可驗二薪之價不相遠矣。

材木貴賤。其騰跌之由。與牲畜同。所得而相反。皆視農業之盛衰爲轉移。當夫狃榛之秋。豐草長林。觸目皆是。此不獨於其民無所利。且深與田業相妨。有其伐之。爲賜甚大。迨夫耕稼繁興。是莘莘者日以減矣。此其事有二。一爲焉。或經斬斷而爲墟。或經

縱牧而濯濯。耕牧日進。材木以稀。固其理也。夫牛羊之蕃滋。其事固與稼穡之遂生無比例。稼穡者。純由勤力而後有者也。顧牛羊之蕃滋。其事雖不盡出於民力。而得人爲之設飼餒養。其生乃遂。其種乃昌。設無牧養之慈。彼將任天事之自然。際其青葱而飽。亦遇其黃落而飢。猛獸奪其爪牙。蟲蛇施其螫蝕。縱克自存。其生亦隘。得人而後免此。是人有所造於畜產者大也。故田事起而牛羊之生愈蕃。什伯成羣。縱於叢林深箐之中。木之尋常以往。固無或害。而萌蘖之存。必已寡矣。自其新者不生。則雖有穠蔭蔭蔚之林。不數十百年。掃地將盡。林木之與牛羊。其不相能如此。是故一境之內。牛羊日夥。則林木日彫。惟其日彫。而其物乃貴。貴而後交易事起。索價優於斬伐之費。而其地乃有租之可言。甚且所收之利。過於他樹藝之所期。雖落實孔遲。而大抵足以相抵。此保山林之產者所以有人也。吾英幾處山林。事政如此。視者謂其利優於耕牧。雖然。時或有之耳。欲其常優。必不能也。並海耕牧甚盛之區。有石炭供爐爨。闢地栽樹。以供營建。轉不若運致他所之材爲宜。故額丁白拉年來。邑居雲興。

無一就一椽之材產於本國者可以知矣。

案斯密氏謂草昧之時林木於民無利且與田業相妨此語殆無以易惟其如此故理嘉圖創爲租例謂農業初興時其民所耕皆擇最腴上壤遂生齒日繁上壤所登不足以周民食乃降而耕其次生日愈繁所進望者亦日愈下及其名租也。是最下者無租其餘諸田名租卽其田所收與此最下者之較數此爲凡租大例云云。方此例初出計學家論租理者翕然宗之以爲不可搖撼。號理氏租例獨美國格理著論駁之云。理嘉圖謂初農所耕必其上壤此物理之所必無者也。蓋其壤既肥則當萊汙未闢之秋必早爲灌木叢林之野初民之群散而不合烏能闢其地而播種之乎。故初農所耕大抵皆下中之壤。迨進群合而後海耕上田此與理嘉圖所言正相反耳。顧理氏之例終有其不可廢者此學者所當反覆研尋者也。說載篇末。

又案斯密氏於供求相劑之例往往信之不篤守之不堅故其說爲後賢所指摘。

如此節謂材木惟其日彫所以日貴而交易事起有以爲租云云不知使其求盛則材木雖不彫何害使真有求者雖天下之林盡彫只餘一木烏足貴乎格致之事一公例既立必無往而不融渙消釋若可言於甲不可言於乙可言其無數而獨不可言於其一端凡此者其公例必不公而終破也

煤價與薪價齊斯爲極貴顧出礦時其價必大劣此否則無以爲水陸運費之地且礦主之售煤也與其貴而售少無甯賤而售多數礦並開則最腴之礦實按定額之枋跌價以傾並開之礦冀得專利焉一礦既跌衆礦不得不從非腴而從自然利減減甚則歇業者有之其次雖未歇業不能有租

案此所云云惟出煤甚多供過於求而後如此苟供不過求或煤市旺盛之時其事乃或反此價由最瘠之礦而出而肥礦聽之坐收厚利也

礦之所以開煤之所以出地而歷久不廢者其所待與他產等耳必其所收之利有以復其勞費而益之以常贏焉否雖甚美之煤無從開而不廢也故有贏無租者最

下之煤價矣。且如是之礦，必地主所自開，與人開之而不得租，彼何所取而爲是乎？總地產之出租者，惟煤爲最當。常法田疇之租，常三分所收之利而取一，且未嘗計豐歉之異而爲差。獨至煤礦，則五分取一爲最優，什取一者，其常率矣。且計出地之盈虛，從而爲異。二者地利之不齊如此，故買業者，田疇園圃之業，計三十年之利者，爲平價。至於煤礦，計十年之利而置買者，稱善價矣。

案所謂業計者，千年之利者，謂是業所收歲入，積若千年而與買價相等也。當斯密氏時，煤礦租率，尙有五十一什一者。至於今，乃益下，大較三十得一而已。此其故，坐工庸日貴，彼微則此涸，故租率不能與銷煤之廣狹相劑爲多寡。然率雖微而實數則倍徙於前，而主礦者之進，優於前人也。

煤礦之美惡，不獨論其出煤之多少難易也。即銷場之遠近廣狹，開采之得利與否，恆視之。獨諸金之礦產，則不然。其品彌貴，則彌不計所居之便左。蓋其爲物易於挾持，盈握之微，爲值甚鉅，雖以之梯山航海，運費加於本植甚微，故銷場所被，不僅毗

述之境謂之流通字內可也。如銅出日本而登歐市，鐵出西班牙而流於秘魯智利，而秘魯之銀則由美而入歐，由歐而轉亞。

礦產雖因地相絕，則各具銷場，而其價不相牽涉。如貢洛卜沙與紐喀所南北二境之煤，雖同在不列顛島，而各自爲價，其與法國黎央奴亞之所出，愈不相涉矣。至於貴重諸金之礦，則大不然。五洲之礦互相繫牽，設有一缺，群瘠僥倖，此如日本之銅，秘魯之銀，其出土之多少，支那歐羅巴二金貴賤視之，所共見也。蓋肥礦出產既多，其價緣之陡跌，跌則瘠礦所收，勞不償費，雖欲無廢，不可得也。近事波拓實銀礦開，古巴聖多明戈與秘魯諸老礦，皆僥然有不終日之慮，可以驗吾說矣。

案斯密所云，尙是當日情景。後化學之事日精，取銀者多由格利那（鉛升名）號壁提生術，由是出銀愈多，而舊礦往往衰廢。

是故群金之礦，其利視字內所開最腴者爲轉移。凡礦利取償勞費之餘，所長蓋薄，鮮能給重租。群金之價，其中所以爲庸息者多，所以爲租者少，悞者已然。（謂鉛鐵

屬一珍者尤甚。(謂金銀屬)實刺士牧師著戈安侯勒風土記載其地礦產甚詳。謂最腴錫礦名租不過六分全利之一。下者並此不能。吾聞蘇格蘭山中鉛礦其名租腴者亦不過此率也。又西班牙人佛勒芝暨烏羅阿(曾爲海軍官赴南美洲創鍊廠)著書論秘魯礦事甚詳。皆以秘魯礦爲天下上腴。然人有至彼開采者其地主祇與立約束。凡所收升須付地主所立磨器礮之。償其值與外磨等。不更索租也。礦有租有稅。租者以給地主。稅則國家抑封於其地者之所收。二者實同物。特名殊耳。往者西班牙徵銀礦稅五分全利而取一。至一千七百三十六年始革。是五分一者即秘魯銀礦租率矣。設無此稅。地主將取之以爲租。其不復徵租者。稅重礦之坐廢者已多故也。戈安侯勒錫礦其地獨克立。值百抽五之稅。此亦無異於租。使無稅則租將增而歸地主。前言錫礦租六分取一矣。租稅合將見戈錫秘銀二租相於猶十三之於十二。秘礦租微如此。然且不支。故至一千七百三十六年減爲什一。錫稅則二十而一。而偷漏者錫少而銀多。此不惟多寡數殊也。亦以銀珍易狹之故。故

西班牙王之銀稅多漏卮。而戈安倭勒獨克之錫稅差最實。由此亦知錫價之內而稅多。而銀價之中名租少。又知金品下則租稅易徵。金品彌珍。則所以候租稅者將彌薄也。

夫礦地之徵租。其爲薄既如此。而卽斥母望藏之家。其收利亦曷嘗厚乎。故烏羅阿言秘魯俗。視具財治礦之家。爲妄人敗子。人而爲礦。通國望而避之。由此知彼視礦業與英正同。其事少盈而多虛。得者什之一二。而失之蓋什八九。世俗有見於得。無見於失。遂爭具財展力而趨之。不知緣礦破家者。前後踵相躡也。

銀礦開。則國賦仰於是者重。故秘魯之法。所以勸趨其民使開礦者。莫不至也。其令曰。凡覓得新礦者。既報墾升科矣。則不必問何人產業。得循礦脈畫地。延二百四十六尺。或半之。惟所欲爲。無異己業。戈安倭勒錫礦。其獨克與民立約。與此略同。凡欲治新礦。除民開耕牧已園地。得任意畫取。延袤若干丈尺。號曰界礦。已界其地。或自采。或租人采。度不可。其舊主人不得撓也。吾聞民生財產之重。次身家。有國有業者。

所不可不致謹。且地從主人者。天下之公義也。今爲此。是覲不可必得之虛利。而墮民恆產。奪其自主之權。導之以取非其有。爲相侵牟之事。可謂倒置者矣。

秘魯銀礦而外。則有金礦。其招徠開采之政。與銀略同。而國稅反不過二十而一。初亦審定五一什一之稅矣。顧事反所期。欲過二十而一。勢必不可。佛勒芝暨烏羅阿言。其地以采金發跡者。方之采銀爲尤夥。智利秘魯二國。金礦稅無逾二十而一者。其漏卮亦甚於銀稅。此不徒因黃金珍貴易挾已也。亦以金苗與銀苗鍊法絕異之故。銀苗出礦。寡自然不雜者。欲去其沙石。則必致之官廠。如法披鍊而後可。如此則其事煩而廉察易。至於金。大者如拳。小者如拇。既多自然不雜者矣。就令細瑣猥雜。其分解之。亦易易耳。或以清泉。或資鉛汞。私家密室。辦此無難。而廉察乃至不易。故礦雖富。以多盜而貧。夫銀稅之徵。既已苛碎而儉薄矣。至於金。又加甚焉。由是知黃金入市。其價值之中。所函之租微矣。

金銀入市。其行銷之理。與百貨同。雖其最賤之時。其所易者。必及其經價。否而求其

出地必不能也。即使有之。亦可暫而不可恆。特金銀者所以爲幣。故其價若隱而難明。然若市之金。其所易之粟布他物。固時有高下多少之差。其交易之率。固可得而驗也。故金銀之值雖至賤。必有以使采者償其冶鍊輸將之勞費。而又益之以通行之常息。此之謂經價。至於騰躍之頃。則其價不繫於他物。而獨以金銀在市之多寡爲歸。譬如言石炭之貴賤。其騰跌之際。不僅視石炭也。薪柴多寡亦制之。薪柴賤則石炭不能獨貴也。至於黃金則不然。少則騰。多則跌。其易權之高下。獨於本物焉取之。蓋黃金有獨具之德。以爲利用。非他物與他品之金所得與故耳。

黃金之所以寶貴者三。曰利用。曰榮華。曰希有。使獨以利用言之。則群金莫若鐵。而次鐵者莫若黃金。其爲物也。不鏽不澀。而恆晶瑩。以爲栝棹盤盂。則不腥不蝕。故以鉛爲幣。不若以錫。錫不若銀。銀不若金。所共喻矣。其采色又群金所不逮也。以爲容飾。鑿規之稚。皆悅其華。丹漆之施。不若金塗。銀器之耀也。其利用而榮華如此。既已可貴矣。而黃金乃又益之以希有。希有之所以貴奈何。民既富矣。則欲有以觀其富。

觀其富者。必示人無而我有。夫如是。必取其希有而難得者。蓋其物勞民曠日而後出。挾此者。惟富爲能。不啻其豐有繁多之標幟矣。夫物徒希有。不必貴也。徒利用徒榮華。亦不必貴也。三者奄焉。此黃金易權之所以大也。且是三德。故上幣以之。有三德可貴。而後爲上幣。非爲上幣。而後利用榮華希有也。雖然。旣爲幣矣。則求之者日彌多。希有而求之者多。而黃金遂由此而益貴。

至於玉石之采取。皆以其物之榮華。舍爲佩飾。祇用甚希。願徒榮華。未云寶也。則緣希有而榮華益著。繩幽梯險。勞費不貲。故其入市而索賴也。價之中所函庸息至多。而租常至少。而或至於無。使玉石之地而得善租。非至腴者不能矣。往者玉工。楚方尼爾。嘗親至戈羅剛達泊維芝亞甫二地。閱金剛石礦。其地那博。非上腴。出石最美者不開。而餘坑多封禁者。卽其故。則以不酬勞費也。

瑤琳琅玕之爲物。易挾而值多。而其貴賤之情。與黃白二金相似。大抵視字內所開最腴之礦之價以爲差。是故金玉二地之名租。不自由。而必視字內已開者肥瘠之

何若相方爲比例而後能得之。雖肥租不必多，則雖瘠亦不必少矣。今銀礦最肥者莫波拓實若，然使新覲之礦其肥過波拓實，猶舊波拓實之過於歐礦，則此礦之開可使銀日趨賤，雖波拓實之所收利不足償勞。方西班牙之未通西印也，歐洲之礦其收利給租固不亞於今之波拓實也。蓋舊礦之出銀雖少，而今礦之出銀雖多，以易權言，則古今無以異。其地主之徵租也，以銀論則多寡殊，以易物較則多寡均也。然則雖多金不足以爲富矣。

案國雖多金，不必爲富。此理至明，常人罔於所習，自不察耳。蓋易中爲物，猶博進之籌，籌少者代多，籌多者代少，在乎所名，而非籌之實貴實賤也。國家食貨不增，而徒務金銀珠玉之爲積，此何異博者見今日一籌所值者多，他日更博則多具。此籌以爲富，不悟籌之既多，其所當者必以少矣。夫博者之貧富，非籌之所能爲，猶國之貧富，非金銀之所能爲也。不達此理，故言通商則徒爭進出之相抵，得銀則爲有餘，得貨則若不足，與言礦事，聞有黃白之礦，則生歆羨，言及煤鐵之礦，則

鄙夷之。此惑不解而云理財無異不知經首之會。而從旁論判。雖其不殺人者寡矣。

是故金銀玉石之礦。雖至美極腴。日出百千。而世未嘗以之加富。彼之所以貴者在希有。今既以日出而多。則其所以爲貴者喪矣。由貴而賤。有必然者。然則金玉日多。果無益歟。曰有。昔者栝栲盤盂。與夫佩飾斂藏之事。得以金寶爲之。甚不易也。今者既日出而多矣。則不待有力而後樂此。前以土木。今以金玉。此其適用華美。則有閒矣。其有益於世。如是而已。過是以往。所不知也。

至於田疇園囿之產。則大不然。田疇園囿之所登。以養人利用而實者也。故不必待他所之肥瘠相方爲比例。而其產與租之利自若。百頃之地。種幾許稻。收幾許芻。麻。桑若干石。材木若干章。而所食所飼所衣所庇覆者幾人。恆定之數也。主其地者任土而征之。無閒所取之幾何。是幾何者。常有其易貨取功之量。民之有待於衣食。亘萬禩而無變者也。則是田疇園囿之利。亦將與爲無窮。且金玉之礦。有其沃者。則確

者廢而田疇不然。礮與肥者毗不獨無廢也。且將蒙其利焉。何則壤沃而收多。收多而民聚。民聚則礮者之產亦有所銷。壤固各有所宜。有相資者而其利見矣。

今使以疏治糞溉之勳。而其地養人之量以進。此之所利不止所治之田疇已也。其他地產如金玉者。亦蒙其益。而地利以增。蓋田疇治則民食豐。食豐而力有餘。夫而後有以給其餘求。養其餘欲。而一切潤屋潤身雕飾紛華之端以起。起而後他產之供有其求之者而利出矣。蓋食者民之植幹。不徒國之貧富以此爲差。使衣食之不周。則器用使令文章藻飾之爲。烏從起乎。昔者西班牙人初至古巴海梯諸島。見其地民亦用寶石黃金爲頭足襟袂之飾。句之則輒斥與。未嘗有吝吝。及見班民爭欲得之。則相訖以爲惟蓋彼之視金玉也。猶吾人循山順水涯而遇美石。以其耀目可愛之故。固不惜俯拾之勞。至有欲之者。雖非親知。亦未嘗靳而勿與。其所值於已微也。彼以其國之少食而多金。故不悟世間有如是之一境。以民食之饒。遂有斥一人一家歲月之糧。以易此熒熒然不盈掬飢不中煮寒不中衣之物者。使有人焉告之。

以所以然則客子之所爲於彼亦無足怪爾

以下論常得租與不常得租二產隨世升降相待之變率

田野治農業精則民食加多而他產亦因之以得利或以其利用或以其可悅其得利不同其待農業隆而後有利者則均也或常得租或不常得租治化日蒸是二產者常有相待之率使國故之足徵是固可得表列也雖然常得租之產無待於不常得租者而不常得租者則必依於常得租者以爲其利之盈虛焉百工之事日脩則凡衣裳宮室之材與夫地中之寶藏若渾金若璞玉勢必好而求者日以多求者日多而供者不過其所具之易權必以日大其相待之變率類如此矣

設都會近郊有白石坑一區僅是而無他所則是坑之興廢必視城中道塗之荒闕與其戶口之盛衰爲斷又設千餘里中祇有一銀礦而是礦之興廢不以近邑之耗爲轉移蓋石坑銷場不逾百里供求相待舍此無他至於銀礦其爲物周流遠字而不滯於一隅故其利之盈虛動以一世間爲量區區近邑所以牽繫之者微矣顧

使世治日蒸民之需銀日廣而字內新開之礦其出銀之數供過乎求則銀價將亦日跌而舊礦之利以衰今夫銀所以爲價者也曰銀價跌者由其易權漸減而百貨日見貴耳凡論銀價之騰跌考之於穀麥之價者其粗迹也精言之則極於取力命功之量所操之銀重同而所御之功力日以見少則銀之日賤較然可知矣

總之字內以銀爲幣其需銀日多者交通國多而工商之業奮也其事可分三際一假其商務日恢而產銀之事不與之接武連衡而直趨銀將日以見少而與穀食相待之率亦以日加銀數等而所易之穀見多乎前則曰穀賤非穀之賤銀之貴也二又使棄礦雲興映者日出而通商之事如故則銀之出地溢於所需其與穀相待之率將日以少銀數等而所易穀減則曰穀貴非穀之貴銀之賤也三又使字內之通商日廣矣而銀之出地與之相副如是銀穀相待之率將歷久而不減不增考銀穀盛耗之間此其大較矣

銀者易中而穀者百產之租準故求商業之盛衰校民力之奢耗莫便乎於此求之

溯我生之初四百年以往。其中銀錢相待之高下。始也穀日降廉。繼也穀日趨貴。至於今則稍稍平矣。其見於英法二邦者如此。則其見於歐羅巴全洲者。可知不佞於詳論租理之餘。將旁及乎銀值。循而考之。求能明乎其所以然之故。其諸學計言食貨者。有取於是歟。

案中國以銀爲易中本位。十餘載以還。金銅皆日貴。穀價亦日騰。甲午至今。其騰彌甚。無慮所增三分而一。說者謂往者西國悉棄銀準用金。獨印度中國日本三者用銀。今印度日本亦用金準。用銀之國。獨有支那。故中國銀多進口。金多出口。此銀賤所由然也。顧吾聞滿賈言。各口都市見銀仍不見多。則又何說。不知自甲午以來。中國如鐵路諸事。率作者多。故需銀亦廣。以需之廣。故散而不見多。而銀之貴賤。則五洲之市。合而爲之。他所既賤。則支那不能獨貴也。至於米價之貴。其故一由戶口之蕃息。一由外國之采買。大抵國進。其穀價莫不由賤趨貴。未嘗由貴趨賤也。吾聞長者言。咸同時以銀買物。己不敢雍乾時三分之一。至於今日。又

不及咸同之半矣。總之各國既用金準，而中國不變，其受病之大，終有所底。而一時欲乘而從金，力又不逮。此事所關極鉅，上自朝廷之制祿，下至商賈之交通，皆蒙其害。有心宏濟者，不可不廣覽而熟籌之也。

以下旁論前去四百年中銀值之騰跌（以非釋和正文故云旁論）。又斯密氏生於雍正元年是書成於乾隆四十年，爲西紀一千七百七十五年，則其所稱前去四百年當自一千三百五十年至一千七百五十年也。

第一期

考英之麥價，大抵當一千三百五十年。至於前此，其每括打麥，不下臺衡銀四翁斯。當英令幣二十先令，由是漸減，至一千五百年，每括打價僅臺衡銀兩翁斯。於今幣爲十先令，至一千五百七十年，尙如此。

知麥價升降如此者，有數證焉。一義都活第三之二十五年，著庸錢令云：每布歇洛作十便士，不得過，以其以令限民之故，知爲常價，非甚貴亦非甚賤者。而考義都活

第三時圖法十便士得銀半翁斯而每括打價當時六先令八便士者爲銀四翁斯矣。嘗謂考較前代穀價與其取之史記不若求之條令。蓋史記所書多凶歲之貴價或穰歲之賤糴以之取平價難。若求之條令差無此弊。又當一千三百九年庚德伯理神甫大饑衆其時食單載所用酒脯麥麴之數以所載推之知每括打麥當時銀七先令二便士於今幣則二十一先令六便士也。又顯理第三五十一年立酒均餅均以麥價爲準而均二者之價自每括打麥一先令至二十先令通爲表以令其民二十先令爲最貴時價而常價三分一爲六先令八便士則四翁斯銀也。合前數者而評之知當一千三百餘年時麥之常價蓋每括打易四翁斯臺衡之銀雖失亦不遠矣。

自此而至一千五百年每括打麥平價則漸減而僅及其半二翁斯臺衡銀也。此於今幣爲十先令至一千五百七十年尙如此。此之可考者那丹白狼爾勒家乘中載一千五百十二年麥價兩宗一每括打六先令八便士一五先令八便士當是時以

六先令八便士爲銀二鎊斯計今幣十先令也自義都活第三之二十五年至額理查白之初年此二百餘年間皆以六先令八便士爲每括打麥之平價雜見簿書條令中顧此價名雖同而實則代減而銀之易權亦代增故富國者用之而不覺也如當一千四百三十六年令云麥價至六先令八便士時販麥者無待給憑許出口至一千四百六十三年則令云麥價非過六先令八便士不准運以入口彼以爲賤如前則麥出無損貴如後則宜納麥外方可知此價在當時爲適中平價矣至一千五百五十八年女王額理查白卽位麥貴過六先令八便士者出口有禁第以此爲限則英麥終古無出口時故其五載更令以十先令爲限此所謂十先令實與今幣相若蓋英國之國法自此以來爲變甚微也可知十先令爲麥平價與那丹白狼爾勒家乘所記可相印也考法國杜不黎所記及穀食志諸書其中穀價與此相若大抵前貴至一千五百六百年之間則大減英法如此而歐洲諸部大致盡如此也由此觀之則此二百餘年中銀之易權日大可以概見而銀所以日貴之由有三一

則其地消化日蒸。工商業奮其資泉幣以爲通轉者日多。而銀之出地與前相若。一則交易之事未嘗廣前。而銀之出地日形其絀。一則二因之中並有其半。今此二百餘年中。歐洲銀貴之由。則二因並有之事也。當是時。歐洲諸邦文明日辟。戰伐之相尋。刑政之不公。皆比前代爲大減。夫戰伐少而刑政公。則民獲息肩。而其身家可恃。身家可恃。故樂於治生。而交易之事日廣。且既富矣。則有潤屋潤身之事。格櫨佩飾。日以華奢。此銀貴之前因也。又其時新礦未闢。而舊舉者多。自羅馬以來。地不愛寶。精華日涸。涸而猶取。勞費必多。而祇得反薄。此銀貴之後因也。二因並用。則其物日以見少。以之易物。則物價日微。而見諸民食者爲尤著。

考食貨者多家。皆言本洲之銀自威廉并英。抑自羅馬凱徽以來。降而世賤。固不待美利堅之通。腴曠溢。出。夫而後其易權以微也。此於不佞所前陳者。相反矣。顧其爲說。亦得諸較列。歷代之券價。若他產之價值者。又世俗或見。每謂交易日廣。國富普增。增故銀多多。必值賤。此其所據之是非。與夫操論之得失。試請得以揚摧之。

由來金銀世貴世賤。徵於前代之穀價者有三失焉。而大抵皆失之太賤。一曰以變徵之價爲市價。古者任土作貢。自麥菽以至雞豚。莫不如此。降而泉幣通流。田主常與農佃爲約。惟田主所便。得依市價折色徵之。此在吾蘇號曰變徵之價。顧佃產土物。不產銀錢。且折不折。惟田主之命。故方爲約時。其所定常劣於市中之經價。往往有僅過其時市價之半者。而後之考者不察。則以此爲當時之市價。如佛理禿之書。往往有此失之遠矣。二曰沿襲官書傳寫之譌。古者平價立均之法。如大小麥每括打幾先令幾便士。則每枚幾鎊。每格倫酒。應價若干。其比例皆自最低之價始。由是遞加以至於所擬之最貴者。斟量畫一。以令於民。且以徧行各部。顧鈔胥潦倒。且以謂比例既定。可以類推。則所錄之價。往往僅及最下之三四價而止。如是流傳。後世考食貨者。不悟此之所載。乃發凡起例之資。而非當時價止如此。味然據之。以折中其時市中之常價。烏得實乎。此如顯理第三五十一條。立餅均酒均。其時所錄麥價。實自一先令至二十先令止。而胥吏遂寫僅至十二先令。於是言食貨者。遂謂每

括打六先令等於今幣十八先令者。爲其時常價。其惑如此。三曰不審古價騰跌之情。蓋古穀價騰跌之度甚鉅。有時而賤。過於今時之最賤者。亦有時而貴。過於今時之最貴者。由於淺化之世。往往道弗不通。而商旅滯礙。數百千里之內。豐歉不能相通。如英國諾曼初并時。自一千二百餘年至一千四百餘年。荏苒屢起。豪酋梗法。一部有秋。而他部以天時不齊。海饑見告。設二者之間。有豪爲阻。則其勢不相救。此以流溢而賤。彼以荒虛而貴。其貴賤之情。固不可以後世之常法論也。而後人徒見穀價最賤之時。遂謂古價跌者。至於如是之微。其常價自必方今爲劣。不知尙有極貴者。亦爲近世之所無也。佛理禿常舉一千二百七十年時麥價二端。一爲每括打四鎊十六先令。則今幣之十四鎊八先令也。一爲六鎊八先令。則今幣之十九鎊四先令矣。此亦輓近所絕無之貴價。而古竟有之。又何說乎。

案佛理禿所考一千二百七十年麥價云云。似不必然。而斯密氏據之。爲所誤矣。嘗有人更考其實。知當時麥價。每括打乃六先令四便士。而洛方木及那福克二

部其年七月麥價則九先令也。豈佛理禿所舉者果有一二所大體不通外繆偶而然歟。不然何相戾如此也。又斯密謂諸曼并英時。舊符屈起後之史家亦不謂然。蓋當日部會分地各私其土。督騙最密。盜無所容。而上有強王莫敢相侵犯者。故當日南北行旅遇盜甚稀。道路常謐。觀其時貨物運費之廉。可以證矣。此旨正與斯密相反。存之俟更考可也。

佛理禿於古麥價。蒐討甚備。嘗取自一千二百一年至一千五百九十七年之麥價表而列之。每一紀則合而取其中數。今卽其表觀之。知麥價實爲世賤。直至其表末年始有騰上之勢。佛所用麥價多以其甚貴甚賤而傳。由是爲推。果能得實與否。固不敢言。顧卽其所表列者推之。將見銀日趨貴。與吾及法國杜不黎之說有合。與佛銀多日賤之說轉無所合也。而彼獨云爾者。蓋其考銀值貴賤。推之於麥穀之價爲少。本之於他產之價者爲多。彼以謂當淺化之世。穀爲人力所成。難而後獲。故常比他產爲貴。難以據推。而其所謂他產者。又不外牛羊雞豚及雉兔諸物。夫當貧陋儉

野之世是諸產者其賤於穀無疑然以其賤而謂爲銀貴之徵則大不可蓋此非銀
取功易力之權大乃諸產供過乎求而爲值少耳使此之賤而足爲銀貴之徵則此
之貴銀必賤矣而何以銀多之國如智利如葡恩諸查是數產者不獨不貴且復甚
賤如烏羅阿言葡恩牛價僅二十一便士又如貝來恩紀智利馬價僅十六先令又
何說以處此可知始造之國地大半荒其中牛羊雞豚雉兔麋鹿之倫既可不甚勞
而獲則其取功之量亦必不宏故其賤也以木物之莫之求而賤而不足以爲銀少
而貴之徵也

前書謂物有真值以產之功力爲程然則論價當求之功力乃得真矣淺化之世天
產之鮮其價不足爲典要蓋其爲物時方草昧供過夫求其價遂賤產至嘉穀無論
世化何如產之皆由於作苦是以其供之數常視求之數爲盈虛雖有豐歉之差不
能甚相越也且使天澤地美同則產均者其需力亦等力等故真值同雖有分功善
器致產之能事彌恢而田事降以日精其所需田器馬牛之費粗足相抵合之數者

而言之可知穀同量者其取功之量亦同不問所居之何世非若他土物之因所遭異矣夫功爲價程而穀之取功又不隨時而異彼論銀值者棄穀而求之他物烏能實乎且勞力者之資生也以穀爲楨榦方其山畋漁而游牧由游牧而耕稼地實之湧此爲最優其爲物宜人而廉故勞力之民舍此莫食至夫牛羊雞豚之美進富之國小民斗酒自勞間得嘗之然亦僅矣英備優於蘇儲蘇儲優於法儲法儲食肉必其田事告休與夫歲時令節外此不食肉也故庸率視穀價者多視他產者少此又見考銀值貴賤者舍穀價莫由也

案此節所云田事天澤地美同則產均者所需之人功亦等不問所居其爲何世此語後世計學家頗不謂然精而論之其失有二蓋使農學日精則天澤地力人功三者皆同今之所收方之於昔倍蓰不啻今日緣畝之民比之五百年以往未見其多而所出穀食五倍於昔又農事有絕大地力公例名曰小還例小還例奈何曰農事有一程限過此程限而再加功本所收還者不能比例而增當其未過

此限時。加功本治之。其所還或過所加之比例。既過此限。加功本治之。其所還則劣於所加之比例。故名此限曰大還限。此例所及甚廣。言計務農者。不可不知者也。以此例觀之。則斯密氏言。不問所居何世。人力等則所產均者。亦未協也。

以上所言。理固明晰。而穀麥諸價。又非佛理禿諾公所不考。乃其論銀值升降。不能得實者。則世俗之說誤之也。俗謂治化進則交易廣。廣則國富。富則銀多。多則值賤。相因而起。有必然者。然而諦而論之。乃大謬矣。夫國中金銀之進。不出二塗。一由礦產之日興。一由通商之日廣。其由礦產進者。本值日賤。可。其由通商進者。本值日賤。不可。今使腴礦日興。金銀山積。而百產則同於往日。如是同稱等量之銀。於前易物則見多。於後易物則見少。此其事固然。故曰由礦產進者。本值日賤可也。如以工商雲興。民業殷賑之故。則交易之事。以貨易貨。各資其利。無論金銀之不必多也。即令入國甚多。將有二事焉。因之而見。其一所以給求。其一所以贖欲。其給求奈何。交易事廣。其求用易中也必多。如是則造幣圖法不可緩矣。造幣衆則金銀將不見多。其

賸欲奈何。富而有餘。人欲日侈。飾觀悅目。盤盂簪珥。下於銀者不足爲華。夫以金銀爲脩飾之事。其理與耽翫骨董圖書之事略同。吾未聞以國中饒衍之故。而書畫珠玉之售轉狹。則既富之餘。金銀不必賤矣。

案金銀本值貴賤之理。與百貨之所以貴賤本同。視供求之相劑。不以多少論也。夫新出之柏拉丁難。一化學作鉛俗呼白金。一可謂少矣。而價廉於黃金。化學金類原行四十餘種。半皆取之甚難。見者甚少。而其價不高。可以見矣。大抵本國無礦。而金銀自外來者。其貴賤定於所與易之貨值。然則仍視夫供求之例也。

故自我言之。金銀本值之所以升降。與世俗之云云正相反。假使新礦不開。而二金只有此數。則生事盛旺之秋。其爲值鉅。民物蕭條之日。其爲值微。在工商販販之國。其爲值鉅。在鄙陋不通之國。其爲值微。必然之數也。夫黃白爲物。與他貨同。常趣善價以爲易。而善價非貴。廣貨博之鄉。莫之與也。物之真價。在其所取之功。故使二國食功厚薄相等。其功庸必皆與其民食爲比例。而金銀在富國。以其物博而易多。在

貧國以其生隘而易寡。使是二國者相距甚遙。其差將大見。何則。其物雖背貧而趨富。而以相隔誠懸之故。不能旦暮平也。使其壤地毗連。則其差將微。或不可見。今如支那爲國。富於歐羅巴者也。而二土之民。食貴賤懸殊。中之稻。廉於西之麥。遠矣。英倫。富於蘇格蘭者也。而二土之麥。價差相若。夫中稻西麥。廉費固殊。至於功庸。則高下尤甚。歐洲甚高。而支那至下。此其所以然。又在歐洲進富。而支那止而不進之故。蘇之功庸。固亦不菲。然不及英者。蘇之進。遜於英也。觀蘇之勞民多南徙。而英之小人少北遷。則知二國生事之孰亟矣。夫勞力之民。其苦樂舒蹙。不以國之貧富殊。而以民業之進境中立退行異。其理吾於前篇既發之矣。

金銀易權。既極多於最富之國。則亦極少於赤貧之民。赤貧之民。如土蠻生番。是已。在彼金銀。幾於無所值焉。都會之穀食。常貴於邊鄙。此不得證銀在都會賤也。乃穀自貴耳。致銀於都會。其費不必輕於致邊鄙。而致穀於都會。其費過於致邊鄙多矣。是故在都會之區。若荷蘭。若稽奴亞。其穀麥皆極貴。內產不足以贖。則常資諸外供。

工商之業之困。他所未及。而民食以轉漕之煩而貴。致銀於安蒙斯他丹。其費不
必減於致諸丹輯克。而致穀於安蒙斯他丹。其費過致諸丹輯克遠矣。銀在二地。貴
賤相埒。而穀乃大異。今使荷蘭籍奴亞之戶口如故。奪其富有之貨。絕其轉輸之道。
當此之時。黃白二物。固已少矣。而穀麥之價將何如。其因銀少而值賤歟。抑將騰躍
無藝。等諸饑歲之所爲歟。此不待再計而後明矣。可知布帛菽粟。與珠璣金玉爲物
殊科。布帛菽粟。需也。珠璣金玉。饒也。當有所需。則斥所饒。而是饒者。既富則索價高。
方貧則取價狹。至於需者則不然。當貧乏而愈貴。及富溢而反賤。不賤則無以爲富
溢矣。

吾論第一期銀值之騰跌。而旁及其他如此。所可斷然知者。則自一千三百五十年
至於一千五百七十年。此二百餘年中。吾英之銀日進。其進也。由於民業之日興。交
通之日廣。故其數雖進。而其值不跌。而或騰。此不獨不列顛一島國爲然。實則歐洲
之大。莫不如此。不知者見銀數之日進矣。而不悟其因之不同。遂妄謂銀值之世減。

意非世減。不足以明其進也。此則實考二百餘年食貨之價。已足悟其非而無虛爲說者。愈無當矣。

第二期（自一千五百七十年至一千六百四十年）

考古銀值之進退者。於第一期幾於人殊。於第二期則如出一口。蓋自一千五百七十年至一千六百四十年。此七十年之間。銀穀相待之率。與前正反。銀之本值則日跌。其取功易貨之權日以微。穀大騰躍。由每括打二翁斯銀。抵今十先令者。至於六若八翁斯。抵今三四十先令。此似由美利堅新礦之腴且多。而歐洲此時農工交易之事。亦與俱隆。其需銀因以日衆。而無如地產過優。川增幅湊。供之於求。所溢實多。則其值亦不能不減也。波拓實礦。厥前得已二十年。而銀多之效。始驗於英國。穀價陡長。乃在一千五百七十年也。自一千五百九十五年至一千六百二十年。通計每括打上上之麥。值一鎊十六先令十便士。去其九分一。而得中麥之價。則一鎊十二先令九便士。爲銀六翁斯又三分翁斯之一也。又自一千六百二十一年至一千六

百三十六年上上麥價乃二鎊十先令。減其九一如前。得中等麥價一鎊十九先令六便士。爲銀七翁斯又三分翁斯之二也。其不數十年。進而彌上如此。

案計學家羅哲斯言。秘魯群礦最腴。其勢固可使天下之銀。由貴忽賤。其地利固然。而人事亦與有力也。蓋當日西班牙治礦之政。橫賦土民力作之効。過於牛馬。使其不然而用招募之雇工。則勞費乘除之間。其利自遜。而銀之降賤。亦不能如是之相懸也。是時西印紅種。被其虐者。戶口日稀。神甫拉客沙目。羣豔然謀所以救其子遺者。於是議以非洲黑人代之。此販賣黑奴之事所由昉也。噫。遂一國之私。既奪其地矣。且將滅其種而不卹。西班牙之不振。豈天道有時而信者。

第三期（自一千六百三十六年至一千七百七十五年）

自一千六百三十六年至今。爲第三期。其銀值大勢則由賤而復騰。特所騰尙微。不及前此七十年之所失者耳。蓋自一千六百三十年至三十六年。此六七年中。所由於美礦充溢而然者。銀賤已極其致。而穀價遂亦漸定。不可復增。直至十七棋之末。

年銀值陸續復騰之勢。而自本十八棋以還。銀乃日騰。雖其進尚微。不抵前者之所跌。而謂之爲跌。則不可也。此第三期銀市之大略也。

考之前志。自一千六百三十七年至一千七百年。此六十四年之間。上麥每括打九布歇洛者。在溫則市中平價通之。得二鎊十一先令。強較之前十六稔之平價。尙大一先令有奇。是穀價尙微趨貴。顧吾不以云銀跌者。蓋此六十四年之中。有數大事焉。皆能致食貴之效。故此之貴。不第非銀跌之所爲。且非天時之所使也。其大事一曰內訌。一順康之間。英國民變。順治六年。殺其國王。察理第一。英國無王者十餘年。獨有議院。至順治十七年。而察理第二復辟。一民不緣敵。商旅舫滯。蓋不必隔并之屢臻。而繹已貴矣。當是時。通國皆被其殃。而倫敦爲尤甚。以其仰外供也。故一千六百四十六年。上麥每括打九布歇洛者。在溫則市價四鎊五先令。其次年則四鎊祇此二年。其浮於前十六稔之中數者。已三鎊五先令矣。均攤此於六十四稔平價之中。其數已大。況內訌十餘年。其貴賤固不僅此。二曰獎外輸。而一千六百八十八年。

國家以麥賤之故特立資格募民運麥外售論者或謂麥外輸而農不病民爭緣畝數稔之餘穀常轉賤此其說信否勿具論特是獎令二年而止爲時甚暫穀多之效無由得也且粒米狼戾時則以政嚴之使穀外注至於饑歲無蓋藏以補不給焉有不益貴者耶當前祺之末偏災所被固不獨英而英乃獨酷者即以是故雖一千六百九十九年有出口之禁九月所救微矣三日國幣日劣夫幣劣而麥貴者非麥貴也名貴實不貴也自察理第二復辟而圖法大壞鑿磨摩銖錢枚坐輕而麥之入市而名價也以實不以名故拉安德言此時通行泉幣劣於法錢者蓋四分而一而麥價則緣此比例爲增至一千六百九十五年威廉第三脩圖法（英國官銀行立於前一年七月二十七日）而始復此則純乎名實之差於麥少銀多兩無與者特後世考者不詳則滋謬爾統此三端故麥價雖加乎前吾不以云銀跌也

前祺銀市之情如此至於本祺以還則銀市之不跌而稍勝愈易見也圖法既脩幣之名實相準無內訌之事以害農功沮商旅而其獎外輸也政行之時久其初雖致

穀貴而產銷益遠民勸農功則亦有致賤之效故此六十四稔之間通其平價上麥每括打九布歇洛者在溫則市價二鎊六便士半強此以較前去六十四稔之平價則賤十先令六便士也蓋過四分之一矣以較一千六百三十六年已前之十六稔當美礦來銀最多時之平價則賤九先令六便士也比一千六百二十年已前之二十六稔當美礦已開而效未大著於歐市時之平價則賤一先令也此以見銀市之入本祺而復賤卽在前祺末年固已具顯而上行之勢矣（已上麥價皆舉上麥每括打九布歇洛者欲得中麥每括打八布歇洛者用再九折可以得之如十八稔首六十四稔平價再九折得中麥八布歇洛者三十二先令也）

一千六百八十八年農家金古烈哥里言其時麥價當中收之年由田承贖者每布歇洛三先令六便士此所謂由田承贖者蓋無異今之承約價麥賈與田家立約就田取麥限若干年年若干括打如是之價名承約價其所以與尋常市價異者就田取穀則省農人運致之煩而限以年數則通豐歉之異故此價常若與市價爲微若

金所言則中麥每括打八布歇洛者價二十八先令也。於前考之數減四先令矣。當未餓之先承約價例如此不足異也。所可異者當金所指之時正議院置賞格以獎外輸之日且云此格俟麥每括打價四十八先令時能設如此則方之金所核承約價蓋七而貴五矣。非至荒歉島從有此顧此令之行。嘗考其由則當是時威廉第三新自洲（英係島國故稱歐羅巴諸國曰洲）至國論未定而爲議紳者多有田人親見麥價日跌病農則建議立此格以救之。要當更世令如察理第一第二時而威廉初立且其時國用空虛正議稅畝勢不得與國中巨室異趣此其令所以竟下也。而吾輩居今觀之益信銀市於前稊末葉已稍稍騰繼入本稊其與穀相易之權日進其所以不甚見於此者乃爲人事所力持若任夫天時地利之自然則其效必有異於此者。

主獎外輸之說者必曰其政利農業而無害於食穀之家彼以爲積歲倉箱豐盈來牟狼藉不外輸則穀賤病農獎其外輸而後農勸於田業價常平而穀益多此兩利

之政也。至於歉歲糧乏。罷其令可耳。獨不言穰歲之穀。既競外輸。則留爲蓋藏。所以待凶荒者必少。如此則歉歲之價無由而平。然則歲無間豐饑。自獎外輸政行。而民食貴穀矣。前考本稊首六十四稔之平價。已較前稊末六十四稔爲微。設無此政。則其愈微可知。議者不察銀騰之由。而徒穀賤之爲懼。此持前說者之所以力也。抑議者又謂使獎政不立。則穀大賤而農病。病則財力之用於田者必儉。儉則無餘。而所以劑凶年者亦蔑有。是獎外輸者。自致其豐盈有餘。而未嘗奪凶年之穀以輸之於外也。此其說近似。總之獎政不獨在農。國家所以待工商者有之。此其利害因果之致。原始究終。吾將詳之於後部。顧今所欲言者。則本稊以來。銀之騰。穀之跌。非吾國所獨然。法國之事與此正同。且比例之率亦等。杜不黎梅山斯諸家之所紀錄。可覆驗也。然而法不僅不獎外輸。且運穀出關者有禁。二國之爲政迥殊。而於銀麥效同如此。若謂此間穀麥豐盈之效。必出於立獎政者之所爲。則於法又何說。此真吾愚所未解者耳。

然則此穀價之變。由於銀之騰跌者多。由於麥之豐歉者少。吾於前篇不云乎。較數十百年之貨價。則穀不若銀。較數百千年之物情。則銀不若穀。穀以遠而得其通。銀以近而知其漸也。當美州諸礦效形歐市之時。穀價之長四倍。往日人不曰穀之貴。而曰銀之多。則本稊六十餘年中。穀價之跌。雖曰無多。亦當求之於銀市之中。而不當求之於穀之多寡。此說固然。特人見近十餘載中。麥價大起。而遂懷銀仍日跌之思。則於頓漸之義。爲不審矣。不知此政天運之偶然。十餘年來。水旱偏災。歐洲幾徧。且往者凶歲諸邦。多仰食波蘭。而波蘭近以國步之艱。一波蘭第一次瓜分於乾隆三十七年。第二次於乾隆五十八年。第三次於乾隆六十年。而波蘭亡。其穀之登市者日寡。此麥之所大貴也。夫十餘稔隔并之災。古今所常有。見連年豐稔。則謂爲固然。觀頻歲荒虛。則驚爲僅見。人意自生分別耳。其實既有一千七百四十一年至五十年之有秋。則亦有晚近十年之連歉。昔十稔中穀價之賤。正可與近十稔穀價之貴。互勘而對觀也。當其賤日。上麥每括打九布歇洛者。在溫則市平價一鎊十三

先令十便士弱。再九折之。得每括打八布歇洛中麥價二十六先令八便士。且此猶是獎政之所持。否不止此。實考此十稔中所外輸麥及諸穀。爲八百二萬九千一百五十六括打。獎費一百五十一萬四千九百六十三鎊。而當一千七百五十年爲最多。獨此一年英國家所出獎費。已三十二萬四千一百七十六鎊十先令矣。故是時宰相白蘭慕以爲言。觀此則知麥價爲人力所持而不更跌者。豈淺渺哉。大抵本棋田事五十年以前之二十稔爲有秋。以後之二十稔爲荒歉。故前二十稔之價則不及平。後二十稔之價則過平。雖豐中有一二稔之歉。歉中有一二稔之豐。於大數不增減也。然而後之過平者多。前之不及者少。則獎外輸之爲矣。凡此騰跌之效。以其甚驟。固不能於銀市中求之。何則。麥之豐歉。頓而銀之騰跌。漸也。果頓者其因頓。果漸者其因漸。

或又謂言本棋銀市不跌而漸騰固矣。穀價既爲獎外輸所力持。又以天時之不齊。故雖間貴於製者。猶不足以證其跌。然自本棋初歲以來。不列頓力役之庸。儲賃工

價皆以日起。則又何耶。應之曰。此愈不足以云銀跌也。輒近百年之中。吾島人事。屢日隆。蓋自都會以至山海之陬。自農工以及商賈生業之進。比諸古昔。幾絕景而馳矣。夫力役猶百貨也。求之者多。則獲善價。於銀市之跌何與焉。法與英之隔。僅一海袖耳。一英法中海。法人呼海袖。而法之力庸。其率與穀食之價比例遞減。而吾英乃日增。使由銀跌。效豈然哉。自前祺以至本祺。法常備日庫。大抵二十分塞台爾麥價之一。塞台爾者。劣英之半括打也。至於英儲。不獨日庫之銀數增也。其所得享衣食生事之資。亦入本祺而漸充。名進者。銀跌之所能爲。實進者。非銀跌之所能爲也。則其故當求之於民業之盛衰。不當求之於銀市之騰跌也。

大抵金銀之礦。新開而腴。厥利最鉅。蓋新礦入市。得以舊價易物。即稍遜亦不相遠。此美洲秘智諸礦。其初年獲利之所以多。至於源源繼至。則常索高價不能。而易權日損。損之又損。經價乃形。經價者。償其勞費之外。而益以通行之贏率也。秘魯礦稅什一。而租在其中。此什一者。非遽爾也。其始嘗征其半矣。浸假而率之。浸假而伍之。

終則定什一以爲常相沿至今此可驗其利之始鉅而終微至於今僅有以維持勿廢而已嘗考西班牙之取秘魯礦稅也其減爲五分取一者在一千五百四年（弘治十七年）後四十一年而波拓實之新礦出自此至一千六百三十六年經九十年之久而銀多之效遂大著於歐洲其價亦賤極而不復更減此之爲勢不獨在銀一物爲然無間何產但非壟斷專利之爲則歷茲百年其勢必趨於經價使降而更劣於經價則其產不復出矣

歐市之銀值何爲而不復減西班牙之銀稅何爲而不同金稅由什一而降爲二十一其所開諸礦何爲利之既纖而不大半停罷則一言蔽之礦尙獲利故耳其產之多如是其采之久又如是何由而尙獲利曰用銀之事與之俱多用銀之事何以俱多曰自美洲開通以來天下交易之場日以廣遠其勢不獨有以持今之銀值使不復賤也且卽今之值以與前棋中葉相衡若尙覺其微進者此其所由來遠吾將分其事爲三支而言之

一曰歐洲之舊市日進也。自墨鐵肇興而歐治日進。進故工商業繁。此近而易見者也。若英倫。若荷蘭。若法蘭西。若日耳曼。皆大進。卽至若瑞典。若丹麥。若俄羅斯。農商邑野。皆巋然異昔日。若義大里。不幸王綱解紐。民生唸吁。但事在秘魯見井之前。而其後方稍稍復。如是則亦進也。諸國之中。退者獨西班牙。波陀噶爾耳。顧波陀噶爾之在全洲。僅爲一隅之小國。而西班牙之衰歇。又未若言者所云之甚也。蓋當十六世紀之初。西班牙已爲貧陋之國。與法國同。特法自此而國勢日張。而西班牙則止而不進。察理第五知兩國事。嘗云民業中事。凡法之所多者。正班之所乏也。以此見二百年中。西班牙退境之無多。夫此洲民業。日以駢闐如此。則其待易中。以爲通轉者。自以日宏。而室家殷賑之餘。而以爲藏鐵寶器盤盂。疆釧之事。亦必日奢。此則所以資銀。使其他不至坐減者。一也。

二曰美洲之新市日增也。夫美本新通之壤。邇歲以來。其客民戶口之蕃滋。農工二業之競進。持較舊洲。殆過之而蔑不及矣。英民所墾。始皆桎榛叢穢之區。而西班牙

波陀噶爾之外屬。若古冷那達。若愛加坦。若巴刺軌。若巴西。未通之先。若游獵紅種之所居。不獨無文教。耕稼陶冶。亦未所知。即其中有不得純以野蠻目者。若秘魯。若墨西哥。舊爲強種。無耕稼。善爭戰。其土人自詡武功奇蹟。至今弗衰。願試讀其史書。平心而論之。則其中農功商業。殆比亞洲島庫連之韃靼不如。夫數美洲之舊治。則當以秘魯爲巨擘矣。然其用金銀也。有環珥瓊珞而無圖法。其懋遷有無也。有交易而無買賣。則分功之不宏。可以見矣。蓋其治僅及耕稼。而未覩久化之成。故民力田矣。猶自築其宮居。自削其械器。降至衣裳冠履。無一焉不待於自爲。即有一二業爲工師匠作之人。則皆官府之隸。王及巫祝部貴人之所參畜。於編民固無與也。高曾規矩業者相矜。而無一貨焉中吾歐人之用。變西旅之入其國也。多者五百人。少者半之。而儲蓄芻餉。隨地而窮。非輻重自隨不可。此不僅深山大澤然也。即在通都大邑之中。莫不如此。至於清野之事。彼何曾知。此益信其所謂古極富庶者。爲非事實之言矣。西班牙之於外屬。固常虜用其民。遠不若吾英之寬大。勞民勸相。尤所未能。

然而地踰新主則戶口日蕃蓋天時地利既優田廣價廉民趨樂土雖政刑峻刻不足阻之故佛勃芝於一千七百十三年最賴摩戶口不過二萬八千家至烏羅阿於一千七百四十六年計之過五萬戶其餘秘智諸都會中進率仿此較之英屬戶口之進不相下也凡此皆前者銀市所本無二百年間從無至有則其爲美礦銷場者又可見矣此所以持銀值使不墜者二也

三曰泰東之商業日恢也美礦產銀其流入泰東者有二道焉一徑一紆徑者由南美往東印之阿喀擘勒古公司此自礦開至今其勢固已日大紆者由歐達亞此其進境尤不可以尋常比例計矣十六棋歐羅巴所與泰東互市者僅波陀噶爾一邦獨享厚實非餘國所敢望至其末載荷蘭踵而分之於印度立步頭數處迨十七棋波荷二國若中分五印度之商利者後來居上波陀噶爾則日退矣由是而英法繼起入本棋而大盛英法而外則瑞典丹麥歲月間往此皆以海通焉者也而莫斯科哇商民數萬里結隊駁稅絕鮮卑舊壤踰葱嶺並天山度瀚海以達於支那之燕薊

此以陸通焉者也。爲海爲陸，無間梯航，其商務皆降而益隆。中間退者，則法蘭西以近日戰事，印度商業幾於掃地無餘矣。（當乾隆中葉，正英法二權在印爭爲存亡之秋，乾隆十一年法據南印度之馬都拉斯，立步於番提車利，而歐洲以爭奧皇承襲有七年之戰，二十一年英失羯羅屈閣，而英會克來福復之，敗法印，合從之師由是而英權大張，各部以次附之，然其地尙爲大東公司所轄，非王有也。至四十九年始設印部大臣，而其地爲外藩。）當是時，歐洲所銷東產，以茶爲大宗，此十七稔中葉以前，民所不識爲何物者也。至於今日，則僅吾英所入口而征者，其賦過一百五十萬鎊矣。而其由荷、瑞、餘國關入不稅者，不計焉。其日盛可見矣。餘產如支那之花瓷、馬刺甲之蘇桂、孟加拉之罌粟，率皆比例而增。今日英船噸載，過前稔中全歐商船噸載矣。夫用銀之多寡，與商務之廣狹，息息相關。今商業其進如是，則美礦產銀雖至多，然其值至本稔不跌而更起，有由然矣。

歐亞始通，亞洲金銀本值皆比歐洲爲高。至於今尙相懸隔，亞洲多稻國，歲再穫或

三稜故民食以穀麥國廣輪相若者爲饒衍食饒則民蕃此亞洲之庶所以過於歐洲也。富者厚積而有餘其役萊馭功之權與俱大故東方貴人僂從輿臺雜沓靡容擬於歐之王者且衣食至足之餘遂以佩飾陳羅相炫此珠玉錦繡欲得者之所以多也是故金玉諸礦即治於二洲者肥磽正等而其產之入市也亦將居東者之所易多居西者之所售寡而由印度北抵葱嶺陰山其中產玉石者多產金銀者少故金銀之入其地也以之易穀食固多即以易玉石亦較之在歐爲有贏也金剛石奇飾之尤者也以其較廉故其物皆自東而徂西金剛石及他玉石饒也瑯及諸穀需也其在泰東以金銀易之雖貴賤迥殊較之泰西則皆賤至於力役之庸印度支那其率皆下勞力之所得以易衣食之數既微而穀食之價又賤故二土之庸以較歐洲之庸再受削矣夫民之勤巧均則其製造諸物之價值與工價爲比例泰東工之勤巧不讓歐洲而其價之廉如此則其熟貨又廉也至於轉運之費歐洲東南多山國道路險遠轉輸艱難其成物也前有飭材之勤後有致市之費勞費既滋物價遂

長而支那印度之爲國也。滿地江湖。交輸互灌。行旅之便。倍於歐洲。則其轉運之費。又減也。統前數者而論之。則是亞東物產。持較歐西需者。如粟菽。饒者如珠玉。中間如製造之百產。皆此貴而彼賤。而獨金銀二品。爲此賤而彼貴。則西人徂東逐利者。之所宜挾。莫二品之最便利明矣。俾色揣稱。正易權皆在泰東爲大。此不脛往日之事。然也。至於今猶未改。且二品固皆利矣。而金不若銀。蓋其相受之率。在彼則十與十二之於一。中國金價國初至乾隆間如此。而在歐則十四十五之於一也。是以由歐赴支那印度諸船。以載銀爲利市。阿喀璧勒古公司。由孟尼拉所運往者。舍銀幾無他物。則知此二百年來。新舊洲商業。雖然而山美徂歐。由歐徂亞。爲金銀流轉之大經矣。

案歐諸行賈東方。多載銀而少餘貨。此不僅初通爲然。至今未革。輒近世各國用金爲準。則幾加厲矣。此不僅銀得利多。而亦由吾人喜於受銀。而不欣他貨之故。故至今言商務者。尙以出口土貨多進口洋貨少爲佳徵。夫出口貨多而進口貨

少者其所有餘者固皆銀也。彼若知金銀亦貨。進出之間。初無所謂有餘不及者。多少必相抵。而業進之國。在出入二者俱多耳。抵制之盲說。庶有瘳乎。

金銀爲用既廣。摩損亦多。海宇交通。市場日大。每歲出礦之金銀。不特必其足用。日必有以彌其損。而後不至日消。致其價因之日貴也。蓋其物范爲泉布。與製爲格綬。紋飾之微。所摩剝者。日計不覺。歲計已多。至合天下而綜之。亦甚鉅矣。吾英蒲明罕各廠。製諸種釧器。其塗金貼銀。歲不下五萬鎊資。凡此皆一散而不可復聚者也。夫天下不獨一蒲明罕也。錦繡之所絳飾。土木之所被施。以至梁楹釘鋪。圖書帷帳。積以爲計。夫豈其微。且轉徙既繁。則或沉溺。或棄之事。亦有痊癒。假年月既溼。刻舟無跡。亦等諸銷滅而已矣。使出者無以彌其耗損。金銀有不日以見少者哉。

西班牙口曰克薩支。波陀噶爾口曰力斯彭。計此二口。每年所入金銀。無分征漏。約六百萬鎊之數。麥庚斯於此事最詳審。其言云。自一千七百四十八年。至五十三年。通六年而取其中數。計兩口所入。無分征漏。銀重一百十萬一千一百七鎊。金重四

萬九千九百四十磅。銀每磅值六先令。爲價三百四十一萬三千四百三十一鎊十先令。金每磅值四十四幾尼有半。爲價二百三十三萬三千四百四十六鎊十四先令。合計爲值五百七十四萬六千八百七十八鎊四先令也。麥庚斯所報如此。又兩印通商錄云。西班牙金銀歲進。通十一年而取其中數。得歲三百八十二萬五千鎊。波陀嗎爾二百二十五萬鎊。合兩國之入。則六百七萬五千鎊也。其數微浮於前。今以六兆鎊爲中數。歲增歲減。相去當不遠矣。

美礦歲出之金銀。固不盡入於二國。有由阿喀摩勒古公司而輸之亞洲南洋各島者。有觸禁私售他國者。有留於本洲不出口者。入二國其大數耳。且天下金銀之礦。采者固不獨美。而美爲獨腴。餘礦視之。若不足道。吾英葡明罕所銷金銀。已抵美產入於二國者百二十分之一。約計天下所歲銷。與諸礦所歲出者。略相抵。即有不及。所差蓋微。其供者或不及求。故近歲銀價。稍稍騰也。

銅鐵歲出之多。過金銀遠。然不得以其出之無幾。遂謂銅鐵之價將日微也。此銅鐵

所與金銀異者。蓋銅鐵爲愚金其用之也亦盛而不甚惜。以不甚惜而滋耗。顧諸金之價其騰跌之情皆以漸。不以頓。品愈貴則其價之騰跌愈漸也。物惟金石最壽。以其值之不驟遷。故其材中爲幣。若嘉穀則一歲所收大抵濟一歲而盡。銅鐵今茲所用。出地數百年者有之。金銀出地數千年者有之。是故積大地每歲所收之田穀其量必與一歲之民食相均。銅鐵出土歲異。歲銷之數不必從之。至於金銀愈相絕矣。故諸金之產其歲收之異比之田穀爲多。而其價之相殊比之田穀則爲寡。以下論金銀相兌之變率。

美礦未發之初。各國金銀兌率。泉局主之大抵金一而銀十若十二。至前棋中葉。南美諸礦開。其畝富爲前此所未有。於是二品之易權遞微。而出銀尤多。其微尤甚。而相兌之率。乃金一而銀十四。若十五。則今日之市價也。（隆乾中葉）其亞洲金銀相兌之率。古與歐同。雖二洲互通。爲變差緩。故至今日本猶金一而銀八。（此價至道光間額羅金阿爾格二英使至其國時尙未大致故英人來者但以銀易金已得

大利一、支那則金一銀十二、獨印度之錫羅屈閣乃金一銀十五與歐市同蓋銀之由美逕往與由歐往印度者至多故然。

麥庚斯曰歐洲歲進之金銀大較銀二十二而金一然則任物情之自然銀之易金當二十二而兌一矣。顧今之金價不然常以十四五而易一者則銀之由歐而入亞者二十二其七八矣。二物在市之多寡者其因而相兌之多寡者其果也。吾意不然夫二物市價之比例不必其在市之多寡比例也。如麥庚斯所言則今者英市牛每頭價十幾尼而白羊之羔則三先令六便士是牛價之於羔六十倍也由是而曰英羔之數六十倍於其牛則牧豎笑之矣。麥論金銀何以異此且如麥庚斯言歐洲金銀之多寡雖懸夫既貴如其所寡賤如其所多矣則二品之值將常相等不知貨之在市也設一賤而一貴則賤者之多於貴者不僅常過於所貴之倍數也總一言之衡之則賤者之總值亦必比貴者之總值為多近於一家遠則一國莫不然矣麪與肉較肉貴於麪則市中麪多於肉且綜麪之值必過肉值屠肉之觔數價值必過於

鷄鴨鷄鴨之助數價值必過於雉兔。賤而常者多其售。貴而珍者寡所購。其相遇之爲量不止如其貴賤之不齊也。二品之事固亦同此。中產之家器用寶飾二者兼有。然衡其重必銀大而金微。略其值亦銀奢而金儉。有其一而無其一者有之矣。就令並有爲積蓋微。若時表若鈿合若條脫簪珥。謂其重與值過於銀之所積者殆無有也。家然國何不如。此吾英國幣銀寡金多。此獨英爾耳。蘇格蘭未合於英之初其金幣之值溢於銀幣者甚微。至於他邦皆銀幣多而金幣寡。法國以銀爲本位。度支大數皆以銀言。入市求金常苦不足。此獨以在泉貨者論也。至於寶器儲藏則五洲之中無論何國率皆銀多金寡。以衡言如是以值言亦如是也。

執市人而問之莫不云銀賤金貴矣。吾乃今將曰金賤而銀貴。聞者將斥以爲狂。雖然有說較物產之貴賤者有二術焉。自其求者言之則差其市價之低昂。自其供者言之則程其贏得之厚薄。前可以貴賤言後亦可以貴賤言也。物產之登最賤必如其輕價。下此則其物不來經價云何。僱勞力者之庸。酬發貯者之息。而地主之租之

有無抑其次矣。西班牙之礦稅於銀什一，於金乃二十一，而金稅之嚴又不若銀采金之利。方之采銀爲更薄，然則產金者之贏得劣於產銀者矣。劣則其市價去經近去經近，故其物廉於銀也。故曰金賤銀貴也。苟用此說而推之，將天下至賤之物，莫金剛石若。夫亦以采者之勞費，而市價之去經微也。

西班牙銀稅可以減乎？曰：難言也。以稅道言之，則金銀有稅，稅之最宜，稅取饒而不取需，金銀饒也。況銀稅爲西班牙歲入之大宗，減之則立乏，故難言也。雖然，稅之有無厚薄，非名稅者之所得爲也。彼前者既由五一而爲什一矣，則何不可以再降？且金礦之價既已二十而一矣，則見於金者，何不可見於銀？且凡礦之爲事，始易而終難，鑿洞日以益深，積水日以待大，外與天氣相絕，扇之入礦彌難，此固言升學者所共知者也。一采礦金多浮出，銀多沈入，故銀礦之事積久彌艱，一及是雖有腴礦，與瘠者同，開采既艱，三效遂著。一曰銀值日昂，二曰銀稅能減，三曰銀稅雖罷減而銀值仍昂，蓋難而猶采，其費必有所出故也。且三效之中，其最後者爲尤似，往者金稅

減矣。而歐市之金價方騰。則後此銀稅雖調。其本值亦未必不大也。特謂稅之效。終有所見耳。何則。礦之不任稅者。將以無稅而稍開。則入市者其數終多於未減。故一千七百三十六年。因西班牙減征礦稅。歐市銀價賤者什一。可以證矣。

自我觀之。則西班牙礦稅雖遞減。而通本棋之六十年。以爲計。銀價猶稍稍騰。雖然。不敢固也。其事本微渺。而難覈。故至今言計之家。幾於人殊。或以爲進。或以爲止。或以爲退。此勿更論。所灼然可知者。則歐洲金銀歲進之數。終當與其歲銷之數。不久而平。蓋歲進彌廣。其銷亦彌多。而歲銷之所多。或且過於歲進之所廣。使其產不能增。而無窮。則進與銷之量將相劑。至於相劑而歲進或減。則銷必過進。過進則昂。昂久則銷與進又相劑而平。循若無端如是而已。

彼世俗以本棋銀值爲跌者。亦自有說。蓋彼見歐洲之日富。富則金銀日多。多則賤。且輒近以來。百產騰踊。故銀跌之說愈益牢也。顧吾謂金銀緣民業之盛而日多者。其本值不能退。反覆辨證。既已煩矣。金銀者百貨之一物耳。百貨常趨於善價。則二

者何爲獨不然。在歐洲之所易者募。在亞洲之所易者多則金銀幣由歐而趨亞。由美趨歐亦猶是耳。使其反賤豈更來哉。至於百產之日賤亦由治進民希求之者多。所以如是。乃其本物之日趨於有川非必銀與相形日以見絀也。故銀入本稊其本值之進退誠微渺而難言。特世俗以此爲之因而定爲銀退則吾有以知其不可也。以下論物產區爲三類民生日進著效之不同。

地之所產。稱而舉之。可區爲三。有其多寡任於自然而非人力所能與者。甲有其多寡人力所能爲。而其供之數常視求之數爲進退者。乙有其多寡人力所能爲矣。而或有大限而不可踰。或無定程而難預計者。丙當民生之日進國財之日儉也是甲乙丙三者。甲之價將始於至微終於至鉅。若日長而不可極者。乙之價則日長矣。而有不可逾之程率。即逾之亦難久。丙之價其大勢亦日以長。然有時而騰。有時而跌。有時而不跌不騰。視人事天時相得之何若。總地所出盡於是三者。

物產甲。

所謂物產緣民生之進而價日高始微終鉅若不可極者蓋其物之蓄影非人力所能爲產於自然者有數其爲物又無金石之壽可以歛儲國日侈富民之嗜欲日溢求之者衆而供之如初不足則爭其價遂長長之量隨爭之淺深爲無窮故曰不可極也此凡珍鳥嘉魚雉兔麋鹿之屬盡如此矣今使吾英木雞在市枚至二十幾尼而木雞之歲捕與今之數當不甚異也羅馬民主全盛時嘉魚珍鳥價至不貲而閭者方曰其時銀賤豈銀賤歟吾嘗考之羅馬古民主治至沃古斯達乃轉而爲君主際變政之後先其銀易權皆比今歐洲爲鉅當是時昔普利賦制什一史言其麥入羅馬一摩提價三塞斯特一摩提當英量三格倫而三塞斯特當英幣六便士顧此非市價昔普利臣屬羅馬法麥入國在什一內者抑其四之一以當賦過此方以市價緇市價者每摩提四塞斯特也由是知其麥每括打爲二十一先令而英麥平價每括打二十八先令知羅馬時銀之易權於今猶三與四之反比例羅馬銀之三其易權當今銀之四矣然則非其時之銀賤明矣拉體諾史家柏來尼記塞遏斯購一

白鶩獻王后阿骨力畢諾價六千塞斯特今之五十鎊也又阿齊涅購紅鮮鱈一（
地中海嘉魚紅色脊有金綫三條有鱗似河鯉）價八千塞斯特今之六十六鎊十
三先令四便士也奇貴驚人如此然以真值計之尙損三之一也跡其所以然之故
決非銀多而賤致然蓋物力豐盈珍奇之產欲得者多耳

案斯密氏於此僅及地之所產言之故所云止此然製造之物亦有數已定而不
可加多者民生日富之秋其價之增亦無盡若鍾鼎尊彝若圖書碑版若良藥舊
醢其在世間有數而勢且日涇皆此類也蘭亭石刻吳道元畫壁淫於其事者所
共喻矣

物產乙

凡地產供與求偕進民生日厚國富日增其價與之俱高高至其限而不得逾者皆
此屬有樹藝之產有畜牧之產方其草昧出於自然者樊爾而多人民鮮少懸邇未
興以無所用亦無價值迨夫治化肇開或焚之或驅之其物乃日以見少而民生日

聚求者轉多。物減求增。其價乃起。久之其物之利。將與民力之所專。藝腴壤之所常植者同科。而其價之日高以止。猶不止。則他藝之人力。他植之壤土。將轉而藝之。植之。故曰其價有不可逾之程率也。

此之爲事。最先見於牛羊。使治地爲牧。以飼畜。與治地爲稼。以養民者。厥利維均。則牛羊之價。將止而不進矣。猶不止。則爲稼之場。將漸轉而爲芻牧。治進之秋。田隴日闢。而天然之芻牧坐減。倉箱日富。而食肉之人民亦多。此腴膳之所以不淹。而芻豢之所以日滋。至於利均稼穡而後止。雖然。耕牧力等。其效常遲。方其未至。而民生猶然。則芻豢之價。高未艾也。今歐洲諸國。尙有然者。蘇格蘭多牧地。而不中耕。故未合於英。牛美之價不極。英耕牧利等者。亦但倫敦及左近之野爲然。前稭之利。蓋已若此。而遠所鄙僻。尙未然也。

耕牧利均。此其關於一國者至鉅。蓋使牧之利不及耕。則其國雖有至美之田。將無由以悉墾。田距都市城集遠。無資以蘇其地力。故鄙遠田之治否。視廬舍之資爲乘。

除而廬舍之糞。又視所畜田牛之數爲多寡也。糞不出二術。或縱牛於田。卽收爲糞。或飼牛於宮。出矢以糞。今使牛羊微微而牧之。利劣耕。則縱牛散牧。以中耕之地爲之。旣不可矣。欲飼之於宮。出矢以糞。則費重而力彌不逮。蓋飼牛於宮。其芻藁之所從來。必由沃壤與已治之地。而後芻美而飼者不勞。使其蘇諸荒穢。將用力鉅而所得已微。故使散牧之利不難。宮飼之折閱乃更大也。由是一莊所擾之牛。其數必僅足於田役。過斯以往。其勢不能。然而足田役矣。其所出之糞。則不足以復其所耕之田。使地力常有餘而無竭也。於是糞之所及。農將擇其最美最便之地而加之。及其旣久。則中耕之田。僅有此耳。其糞所不及者。地力旣竭。無或能生。卽有少芻。而瘠薄之收。取以牧病馬羸牛。猶不足。是故計其所畜之數。以可耕之區言之。則太少。以所得取而飼者言之。則又過多也。逮六七稔以還。或以微糞之積。則取其少許之地而加耒耨。將亦有升斗之雀麥。與夫芻且惡者之收。旣甚薄矣。乃轉盼而地力又竭。則又顧之他。置前所耕者爲輟田。以更待此微糞之積澤。更廢迭代。而終不足以言腴。

此古蘇格蘭與夫今日貧國耕其下田之常法也。其常得糞而中耕者。一莊之田。不出十之二三而已。下此皆更取而竭之者也。夫使其國之田法如此。則凡民業之盛衰。物產之貧富。教化之淺深。皆可不再計而得之矣。雖然。彼農豈不欲變哉。而無如牛羊之價甚賤。牧之爲利。必不足以齊耕。則勢不得不出此。所未如何者也。願亦有牛羊之價既昂。其田法尙有循是而不改者。則以野人智下而樂因循故也。抑事多爲沮。勢不可以卽變者。亦有之。積畜常微。值牛羊價騰。雖欲增多。其力不可以驟辦。力可辦矣。而牧場之治。關需時。又非可苟而已也。故曰勢不可以卽變也。總之畜牛之多少。與田疇之蕪治相謀。牛多欲其地之無治不能也。欲地之治而畜牛之少。亦不能也。牛稀則糞儉。糞儉則地不肥。地不肥則芻少。芻少而牛多。必飢。故曰二者相謀也。且牛羊之價既長。牧之利足以敵耕矣。然欲變舊以圖新。亦必農者之儉且勤。數十百年以往。而後其封內之地。乃皆可耕也。吾蘇南合以來。易事通功。其收益於英衆矣。願無如牛價致昂。其惠利爲最鉅。山國之日闢。田值之日高。其近效耳。工商

之隱賑。文物之殷賡。可數計耶。

案斯密氏此言。乃當時實境。至蘇格蘭。繼此之休明。斯密不及見矣。今者蘇境之
高里洛典斯諸部。田疇之治。關稼穡之盛美。英殆弗如。而英市有牛。其最膾頤者。
問之皆北產也。百年之間。果能有爲。其進如此。中國士大夫。好譏空言爲無補。言
誠有無補者。然如斯密穆勒諸家之言。利存民生衣食之際。蓋無異慈母持嬰兒
而乳之矣。其功豈可量哉。

大抵新墾之國。其地舍打牲游牧之外。無所用之。蕃息至易。畜多民少。其價自微。以
其價微。耕牧之利不均。田事之弊。遂與前等。此之實事。見於美洲者也。美洲舊無牛
馬。自與歐通。來者常挾與俱。十數年。字乳彌多。價值至賤。卽入山林。轉爲野種。主者
不更求也。故治場牧牛。萬萬無利。田雖廣而牛則稀。糞溉不足以蘇地力。而新洲田
法。遂與蘇格蘭往者如一轍矣。瑞典游人嘎沐。嘗於一千七百四十九年。親至其地。
歸而著錄云。英之小民。素號知田。吾嘗徧覽北美新地。田疇樸惡。不見所謂知田者。

也。其耕有播種無糞。溉得一地必盡其力而後已。劣三四稔。輒棄舊畝。卽新田。又竭則又徙。其犍牝皆縱牧荒莽中。然多饑羸。不任田事。緣芻草歲生。榮乃播子。方春萌芽。不可縱牧。縱而留之。其種立盡。來歲濯濯。彌望皆惡草。而牛飢矣。北美中芻之草甚蕃。歐民初至。徧地斲然。長三四尺。可隤人。以縱牧無節。今乃掃地盡矣。前一區可以飼四牛者。今所飼不過一。前之犍牛。乳多而脹。今乳比昔。亦四而一。由此推之。則地力損者十六倍也。夫地力之衰如此。故牛種不供。苗碩降而彌羸。今之所出。大類蘇格蘭前四十年種也。然蘇自合英。得所補救。而北美之弊。則補救者誰乎。

案北美洲自始立以來。事事長進。至今農業之盛。甲於五洲。稻麥轉輸徧天下。斯密氏此言。當時事耳。

耕牧力均。而後農之闢地。較牛其勞費有所出。然不易至。群去草昧而進文明。凡此產乙之中。利能均耕者。尙以田畜牛羊爲最蚤。設不能。則其國將終古貧陋。求如今日歐洲諸邦。無由也。蓋惟民生殷賑。而豚膳價高。而後田畜牛羊。可爲場圃圍牢。而

畜爲場圃圍牢而畜。而後養有自來。而田疇可以盡闢。不必爲曠田遷易之規也。且
豹貉之族。不僅牛羊也。凡歧蹠枝駘。皆可擾而畜之。但使銷廣價昂。則穀牧之事自
起。故其事見於牛羊爲最蚤。見於麋鹿爲最遲。英國此時鹿脯之價。其利尙不足養
治苑養鹿之費。故莫爲也。昔羅馬有小佳名鵲鷄。其爲人所珍畜。以此哇樂泊歌路
默拉二家書。皆言其利之厚。今時法國有時鳥名阿拖藍。至則捕之。置園室中。哺以
黍令肥可食。國人珍之。英民珍鹿脯。使民俗日以侈富。則治苑養鹿之事。在且暮間
耳。

產乙之中。價之以國富而昂。昂而至於其極者。以牛羊爲始。以鹿雉爲終。牛羊產之
需也。鹿雉產之饒也。始於所需。終於其饒。民生之事。莫不如此。然此二候之間。有無
數物焉。價昂而極者。譬如雞鴨。農人厥倉場圃中多滯穗餘粒。不可盡收。以飼群雞
有餘。使其不飼。終於播棄。故其畜之也。於農人爲無費。而所得之市價皆贏。雖或甚
賤。無損也。戶口未稠時。所供已足。故其價不過與他際等耳。顧無費之所生。終較出

費專營者爲不及。且民俗滋奢。人情常易其所多而珍其所寡。故物力日優。雞鴨價常趨昂。貴於牛羊之腩膳者有之。至於極高。有以簪樹柵治塘之費。畜雞之事。且爲專業。而有母本贏息之可論矣。其利至於敵耕則止。不能復優也。嘗見法國數部。以畜雞爲田家勝業。特斥中耕之地。種黍稷彫胡之屬。以爲雞糧。中農夫畜四百餘尾。則其利之優於藝稻麥。可想見矣。英國不然。於是雞者曰。既曰價昂。力敵耕則有以爲專業者矣。今雞之價。英貴於法。法雞歲輸英市者。其數至多。非彼低而此昂。不能如是。然而法獨以畜雞爲專業。而英不爾。何也。曰。俗之轉變須時。而當將轉未轉之際。其物價常最高。英食法雞。不自專業。職是故耳。若夫既轉。則散養者每從新術。能使地大小同。而所出之數加昔。產多而母輕。其價將降。使其不降。其產之數。又將復初。倫敦屠市腩膳之價。本稊賤於前稊。亦以用蘆鴈馬覓之屬。種以爲糧。餵飼之術不同故耳。

案此言亦以各有地宜之故。英之雞價雖貴於法。然使其地他藝。利過畜雞。則甯

食法難不以自畜也。此類物產英之仰於他國者至多，不僅法雞一端而已。自無
進通商法行，地各出其最宜，法之雞子售於英市者，當咸豐壬子稽冊已一百八
兆枚。至光緒戊寅，則七百八十三兆枚。價雖日貴，何嘗自產乎？

就食不獨與他畜之奔餘，故人家畜雞猶雞，爲費至少，使如是而足以供，則彘肉之
價常較他豚爲賤。國日富庶，供之不足，其價因起。儲參爲梘，所費自增，而其價貴賤
與牛羊肉上下之間，則又以其地產農事不同爲判。法國牛彘二肉價埒，而英國則
彘肉貴於牛羊也。

英國雞豚降而愈貴，考其所由，則自田法之變，畝爲縹田始。夫農業日精，則所耕
之田無彌廣，其理固然。然自斷畦零畝，前爲小民所主者，無以自存於其間，則雞豚
下生，必以驟貴。蓋田家雖所耕至狹，而二畝五畝，不俟費而辦者，猶邑居人家，雖窮
猶畜畜貓犬也。朝脯之餒，渾醑之所樂，益之以溝塍之可獵者，常足給其糧矣。至於
變爲縹田，一家所耕，連什越佰，夷滿平壟之後，橫畝之餘糧，既稀，繞屋之微生，自寡。

供少求多。其入市之所名亦以貴矣。使其民生猶進。則價且日騰。騰極而後區專地。諸專種以豢畜之者。其費乃有所出。其勞乃有所酬。則其產遂源源以不竭矣。

涇酪之產與雞豚同。始於田事之無棄。蓋有田必畜牛。而數犢所出之乳。以哺其犢。飲其主人。婦子不盡。其爲物易敗。一歲所出。時寡時多。春夏藏藏。不過六時。不飲可棄矣。由是而揭之爲酥。制之爲膈。一俗呼牛奶油。一前之不日者。今可以旬矣。入之以鹽可以年矣。更壓而堅之爲燻。一俗呼牛奶餅。一則可以儲數歲。一家享之不盡。持之入市以售。然所得必與勞費當。夫而後可以不倦。使其甚賤而不與勞費當。則價無聊者。彼亦出之以無聊。一宅之中。無專室以爲此。庖滿滿。恣以爲之。味餽色惡。有固然者。此三四十年以往。蘇格蘭之乳油乳餅。所以舉不足道也。大抵涇酪之貴賤。與腴膳相表裏。蓋惟芻牧善而後腴膳精。亦惟芻牧善而後涇酪美也。此由民生日進。食肉者多。多而價貴。貴而以爲專業者。有以償其本息。酬其勞費。彼乃區極腴之壤。以牧以芻。畜多牛而以捫酪爲專業。至於此時。其價乃極。英諸部中涇酪

價極者多有。故穀牛之場多上腴之壤。蘇格蘭則不然。舍都會之旁。其價皆劣。故南北二產之高下。視其價爲差。價之高下爲因。產之精粗爲果。由價賤而後產惡。非產惡而後價賤也。

由是而知。道國之事。欲四境之內。莫不盡闢。而有以充地力之所能生。非物產各種其善價不能。極其善價奈何。使其地所收之租。等於上田。使役財勞力者之庸息。等於爲稼。蔽以一言。利必敵耕而已。夫物價極善。一事也。土地盡闢。又一事也。顧前常爲因。後常爲果。欲地力盡而物價未高。必無之事矣。且此物價之高。非銀多所爲之。謂銀多所爲。僅其名耳。非真值也。百產充溢。民業日蒸。有其求之。而後勞苦動劬。爲之致物。則其所以待而沽之者。不在虛名之銀數明矣。總之民之勤而脩業也。志以求益。不以爲損。使登一產而入市取酬。不及前者所出之勞費。則損也。非益也。今使道國者知田疇治闢。地力充溢。爲有國者莫大之公利。則當知物價歸騰。爲其事之先聲。舍此其境無由至。固當目此爲幸福。而奈何轉以爲憂乎。彼求國富而以物價

之長爲憂者無異求一身之康強而以加餐爲大戾也。

案華人嘗言西國稅重中國稅輕西國物貴中國物賤二皆實錄而常俗之情且即以此爲民生樂業之據而豈知吾中國所以貧弱之由卽在此欲稅重而不堪欲物貴而不能之故乎。

物產丙

此屬之物其價亦隨民生之進而日昂順人力欲爲之廣供則或其勢有限而不可踰或其情無定而難預計以天時人事相資之不齊故其價有時而跌有時而騰有時而不騰不跌天之生是物也常使之有所麗而後生故其數必以其所麗者爲之珍如毛革然國中所產之少多常視其牛羊之數而牛羊之數又視其農牧之業之何如則前論所已詳者矣。

其爲物相待之情如此然則事之能使騰騰價善者亦將使毛革市高且其所高宜相比例是說也使一國之牛羊其毛革之銷場與騰騰之銷場相盡則必信而無疑。

顧雖通商至狹之民二者行銷遠近絕異則求得其情固不能若前說之易易矣凡
膜膳之銷以其易敗也常域於產地而不過愛爾蘭北美常醃之爲腸膳開膳以遠
售然爲此者僅二國耳至於毛革雖遠可以捆致也毛無所飭治而可行革雖有所
飭治其功亦寡其爲物資以爲材者多故雖本國製造之業不興而他邦工盛之時
其產亦因之而長似

案鮮菜果蔬所以易敗者緣風中有蟲近自抽氣裝箱法行食物不爲天氣所蒙
自能經久而一地所出雖不必即銷亦可致遠求售以收大利此法美澳二洲用
之最多近香港澳門各步亦有此製其爲益民生甚大亦斯密氏所不及見者也
農事鹵莽戶口蕭寥往往一畜之價所存於毛革者多所資於肌肉者寡吾友哲學
家休蒙言英國常撒遜之世一羊之值什四在茲又吾聞西班牙往往殺羊非以爲
肉爲得毛毳脂膏以售至於全體常委積野間飼彼鷄鳥猛獸而南美智利蒲恩諾
查中美之海梯島其殺牛常爲皮革較之西班牙乃或過之肌肉之賤如此

民生進而戶口蕃。境內牛羊因而得價。然其價見於肌肉之價者多。見於毛革之價者少。肌肉之市。盡於本境。故人口衆而求之者增。其價以長。至於毛革。則其物本可以行遠。故不以產地之銷場爲重輕也。然使民業日盛。製造功興。則前之運致於外方者。今則內銷於產地。如此則運費與折耗可省。而其利則產毛革與治製造者分得之。是故民生日進。毛革價長。雖不若肌肉之多。然亦終於所進。至有減跌。則必無之事也。

羊毛一物。其在英國。有獨異而不可以常法論者。蓋英之戶口日蕃。而製造工商之業。今亦勝古遠。獨羊毛之價。則古鉅而今微。考一千三百四十年。當義都活第三之代。羊毛每拓特值十先令有奇。此爲今幣三十先令。今之羊毛每拓特以二十一先令爲善價。是徒以市價言。古之於今。猶十之於七。其賤固已多矣。以真值言。則相懸益遠。真值在麥。古麥每括打常價六先令八便士。故古之十先令爲麥十二布歇落也。今麥每括打常價二十八先令。故今之二十一先令爲麥六布歇落也。然則以真

值言古之於今猶十之於五其相去不更懸哉顧吾前謂毛革價跌爲理所必無之事而英羊毛之價乃古鉅今微如此則知其非任物勢之自然而必由人力之強致也其強致奈何曰爲之法令使不得任其自然之勢而已其爲之法令奈何曰禁其出口一也由外國至者不加征以徠之二也屬地之所出必銷本國禁不得售之他邦三也以三令之行英之羊毛遂不得他之以趨善價而西班牙愛爾蘭之所出又使之常爲競於國中此英之羊毛所以古貴今賤而愛爾蘭鬻毳之業亦以不昌也案前數令皆於道光五年諭罷而道光二十四年英羊毛之進出口者皆不征

考古皮革之真值視毛毳爲尤難蓋古毛毳制爲常貢於王有司以時疇其價值而皮革無此雖然往者佛理禿以搜討之勤常得之於鄂斯福教寺之記載云一千四百二十五年市價犍牛之皮五爲價十二先令牯牛之皮五爲價七先令三便士二歲牂羊皮三十六爲價九先令黃犢之皮十六價二先令其所標識如此自今觀之則此時國幣之值倍於今其所云十二先令者猶今之二十四矣以五除之得四先

令九便士半。而今中等犍牛之皮約十先令。是以市價較之古之皮價不及今遠矣。更試卽麥以求其真值之上下。此時麥每括打常價六先令八便士。故十二先令可糴麥十四布歇落。又五分布歇落之四。今麥價每括打二十八先令。則十四布歇落又五分四之麥需價五十一先令四便士。以五除之。是古一犍皮抵今十先令三便士所糴麥也。然則執古較今。市價雖相倍不啻。而真值則微跌也。至於犍牛之皮。比例亦爾。而羴羊皮價則古過今遠。蓋古售羊皮常與其羴偕。其黃犢之革。在古甚賤者。牛羊價微。犢生不收。則殺之以節乳。此在蘇格蘭三十年前尙如此也。

而其所以然之故。則亦政令之所爲。其事雖未若羊毛之多。然亦未任自然之致也。如近日皮價大賤。因羴皮免稅。而愛爾蘭及北美所至牛皮皆與豁免之故。故通百年之價而取其平。則今之皮價於前爲稍貴。特無多耳。皮革爲物與毛羴殊。以之久藏行遠。皆有朽蝨之虞。苟鹽之使鹹。其品斯下而利亦減。故其物在不製造之國則賤。在製造之國則貴。在蠻野之部則賤。在文物之邦則貴。在往古之世則賤。在近今

之世則貴。英皮革之不日貴者。固有或沮之者矣。國家待攻皮之工。常欲其價之歲減。則以政爲之。於是其價若反於自然之例。雖然。吾例實自行於其間。未嘗反也。

田野已闢。生齒已繁。則此令所爲。於野業之民。無損。毛革雖以其令而賤。而肌肉亦以其令而貴。夫民區中耕之壤而爲牧。其畜之價。必有以償其租庸息者。不償於毛革。必償於肌肉。不償於肌肉。必償於毛革。二者相爲消長。苟全畜之取盈。於其計爲已得。而孰多孰寡之間。農牧者所不甚較也。而於食肉之衆。則有殊。田野未闢。戶口彫疏。其事反此。蓋牧而不耕。一畜之利。毛革居其大分。肌肉之所出。供常過於求。故其價不能起。而皮革之價既落。租庸息與之俱微。使此時而毛革出口之禁行。其病國不僅使地力不盡。田價日微而已。民生一切進境。將從此而不興。世常謂英之此令。始於義都活第三。非其實也。

案凡論物價。當先知其物之爲正產副產。每有一正而副者不一。使副者得利。則正者可以至賤。此如今時南澳州羊毛價大昂。其肉價則名存而已。淺人言價往

往不察其然。居今論古。徒執正產之廉以相說。不知此正如斯密氏所云主者但籠統計利。不較其爲正產副產也。

大抵羽毛齒革之業。皆有所限而盛衰無定。不若產乙之可與民生偕進而無窮。爲致力者所可操券。其有限以其地所產之有數。其無定以他處所產之難稽。其難稽不僅在所產之幾何。而在所不自製造而以外輸之多寡。使其自製造。又視其國進出禁令之如何。故其事純非操業者所得主。吾於此屬物產。所以云能事有窮。而其利不可預計也。

物之有限而難定者。殆莫如魚。民居距海有遠近。其地之江河湖陂有多寡。其產魚有稠稀。凡此皆限之之事矣。戶口既滋。魚之銷場益廣。捕魚者非益其勞費爲之不能副也。且所增之勞費。常降而益奢。不僅與求者之多爲比例。昔者登市之魚。歲千今之登市者。歲萬。則漁者之勞費。不止十倍於前而已。欲求多魚。勢須遠去。艤船小舟。不足周事。則必有駕海之舸。而簪網帆索。舉以益繁。而或爲其力所不能辦。求多

供少其價益高。此漁者所同歷之境也。其爲無定。非謂得魚之數也。列筭屈具網鉤。一日所得。卽不可知。然使通四時合數歲計之。其爲數當不遠矣。顧吾所謂無定者。以其事牽天繫地。不以人事爲程。國富而民勤者。可以得少。國貧而民窳者。或以得多。其事之興衰。不必由於民生國財之進退。非所謂至無定者耶。

案計學家羅哲斯云。斯密此謂勞費之增。出於求者加多。比例之上。乃獨指此屬物產而言。至於常法。則銷場彌廣。產費彌輕。蓋求之者多。則供之者勸。且由是而分功彌密。作術彌精。故有產費彌輕之效。然羅與斯密均得一而失一也。凡地產之興。有大小還二境。二境之間。卽斯密所稱之產限也。凡爲地產。無慮皆有小還之日。故國土養人之量。將有所窮。而過庶所以爲禍。此例所關至鉅。乃後賢所立。而斯密與羅或所未窺。故其說各明其一如此。

至於礦產。取之地。而登諸通都。其事固與民力相引爲無窮。而不必有限制。特其利至無定耳。國內金銀之多寡。不關礦之腴瘠有無。而常以二事爲差。一視本國民業

之盛衰。一視同時宇內所開諸礦之肥瘠。使其國工商興盛。出物繁多。則所轉以與金銀爲易者日衆。而二品之出於本國。抑來自他邦。無所異矣。又使宇內之礦。產之非難。則其流轉世間。用爲易中者日溢。其國中雖無一礦。黃白趨之。若衆流之匯大壑矣。支那印度。國中無礦。其去南美秘魯智利諸部。夫豈不遙。而金銀之湊於其市者。不以是而沮也。且由民業日盛者。金銀雖多。其價不跌。民庶則功力之庸。率必廉。積貯多。則所出以爲易者衆。此金銀易權所以常大也。其由礦肥者。金銀日多。價乃日跌。其所跌之數。若常與礦之所溢多有比例。此前論所已詳。不必復贅者矣。

夫宇內民生。降而彌進。則見礦之肥瘠。所采之豐儉。要亦自爲一事。而與國用之盈虛。閭閻之舒蹙。所係蓋微。民智日崇。人跡所通。日以漸廣。新礦之出。今易於古。此可知者也。舊者之寶藏既竭。新者猶闕而未開。則不可知者也。采取金銀。其利最爲難恃。必待其產之寶興。而後可言得失。否則擲資虛耗。覆車相尋。可勝道哉。繼自今或新覓之礦大肥。出金如邱山。或降而愈艱。映者既盡。瘠者方來。凡此皆難預計。而吾

學所可言者。則民生國用。不以爲殊已耳。夫謂由金銀之數有多少。泉幣之值有重輕。山泉幣之值有重輕。百貨之所名以異。說亦近似。雖然。其名可殊。而其實之多寡。盈虛不可變也。使金銀而大有。後之有一先令者。其用同於一便士。使金銀而大耗。後之有一便士者。其用等於一先令。國幣之所準。固大不同。然而當其有先令不比便士而加富。當其無便士不比先令而加貧。其爲異將徒見於盤盂器飾之間。多而賤。則增華。少而珍。則反樸。舍此而外。非吾之所知矣。

案斯密氏之論金銀也。可謂獨標先覺者矣。先是歐人覘國貧富。必以金銀之多寡爲衡。自斯密論出。群迷始寤。名理之言。有裨於民生日用如此。雖然。自今觀之。亦少過矣。彼當物論晦盲。意不如是。則無以收廓清摧陷之功。故甯爲其過。而不暇審其平。言所爲各有攸當也。顧金銀爲用。其於生財。又曷可忽乎。使懋遷既廣。而易中之用。不得其宜。則在在將形其傾滯。故其物一時之甚少過多。均足爲民生之大患。今主計者求其國金銀本值之恆。則固不可得已。然而事則曲防。則於

其變之漸而舒則國家之大政也比者中國銀值之微較之三十年之前幾於三而失一矣凡吾民所前蓄三倍之力而爲之積累者乃今僅有二焉銀之所積損之所在矣合吾國二十餘行省而籌之則坐銀跌而國財受創者豈其微哉豈其微哉。

又羅哲斯考金銀出地之數自道光己酉至光緒戊寅金總值八百五十一兆鎊銀總值四百七十二兆鎊

以下結論銀值進退之理

言計者言人人殊要皆以金銀寡少國中物產價賤爲化淺國貧之明證自不佞觀之化之淺深國之貧富與國中金銀之多寡判然兩事絕不相因也由金銀之珍少所可推知者不過其時宇內所治見礦瘠而不腴金銀猶貨也流入人國必有與易貧國之物產彫稀富國之物產盛侈當其取易必不能貧國之所與易者反多而富國之所與易者反少明矣若謂金貴物賤則必化淺國貧又何解於支那金銀大貴

物產功力甚廉。而其國反富。大抵操前說者。徒見年來歐洲各國治化日亨。民業日繁。而金銀亦日多且賤。二者同時並觀故耳。而不悟二事雖同時並觀。而致然之故。則各有其原。不相涉也。金銀之日多且賤者。起於美礦之特腴。此爲偶然之事。非民力所能爲。而治化日亨。民業日繁。其原甚遠。往者吾洲原爲據亂之世。蓋居基處。各各厲民。民奮其勤。不食其實。比者景運肇開。長夜時旦。由據亂而轉爲竝治之規。無限君權。稍有所制。勞民歌詠勤苦。各食其所自生。政公刑平。而無侵牟奸欺之慮。農工商賈。淳然奮興。此國值之所以增。民業之所以繁。夫豈美礦腴瘠。金銀多寡所能爲哉。且必謂多金爲富。則曷觀波蘭。今者各國之治皆新。而波蘭獨否。然其國所產穀麥。市價何嘗不增。其國之金銀。本值何嘗不賤。乃其貧陋無異厥初。其金銀固日進矣。其歲收地產。則未聞緣此而加多。其農工諸業。亦未聞緣此而治巧。其敗法亂紀。與凡其閭閻之所頓蹙。又未聞緣此而蠲除也。金雖多。何益乎。若以是爲不足。則請更觀之。西班牙與波陀噶爾。是二邦者。非獨有南美腴礦之國乎。試入其地而訪

其俗則其貧陋。去波蘭不能以寸。若必以金銀之多寡。視人國之盛衰。將金銀之多且賤。莫茲二邦若。何則。金銀固由彼而後散諸各國者也。美礦之所出。彼全而收之。出國則有舟車之費。保險之費。卽開出邊關。亦有偷漏之費。故至各國者。終不若在彼之廉也。其國金銀之數與歲登之物產。比例爲多如此。而尙不免爲貧陋之國者。何也。則其治雖離乎據亂之規。而君民相與之際。猶未進於文明之實故也。金銀之多且賤。既不足爲富教之徵。反是而少且珍。亦不足爲貧陋之驗矣。

雖然。有一類焉。使其價過賤。則以決其國之貧。其民之野。十可以得其七八也。如牛羊。如雞豚。如雉兔。使其物甚賤。則由之而可推者有三。知其國之田狹。而山林叢薄之廣。一也。地價甚微。而未闢之地猶多。二也。其積畜與人民之數。與其地不相副。三也。蓋物值之貴。所由來二途。或以戶口之蕃。民生之進。或由礦產之多。易中之溢。二者不相覓也。由易中溢者。物值之騰。徧於百貨。或參而增一。或伍而增一。其所增之率。必與銀本值之所減者同。由民生進者。則入市之貨。騰跌不齊。卽其悉騰。騰率亦

異此如本棋英國諸產所貴至多而麥價所騰者甚少知不止因於銀跌矣蓋麥價本棋六十四年以來較之前棋尙爲稍減此不僅吾英溫則市紀爲然蘇格蘭各部司均（主平市價之官）之所著錄法蘭西梅山斯杜不黎二家之所討論皆相照合食貨一事向爲繁碎難稽今之確鑿如此殆前人之所無者至於晚近十餘稔麥價之大則天時使然不由銀跌益無疑義觀此則知時俗之說至爲不根而非考諸實事者矣

或曰同是銀也在前棋則所易者多在近世則所當者少此之事效見前者也小民勤苦歲進幾何乃握銀入市終於受損斤斤然審其事之起於銀多抑其效之由於物貴二者雖分於小民固何益乎應之曰是固然今夫言計者於一物價之低昂必明辨博咨至於得所由然而後已者非曰以此之爲彼小民將知買賤而售貴也吾聞爲治之道視已成事知所由然之故而後有以爲後事之師故於民生之進退務知進退之所以然此最切之學也今者百物之價降而日昂此其故或由於銀賤或

由於民業之蒸。使由於銀賤。則可推而知者。不過美礦之盛旺。而吾國財之實境。與夫地利民力之所歲登。若波蘭波陀噶爾之日退可。若荷法諸邦之漸進可。舉無以定之矣。使由於民業之蒸。則吾國百年之中。地力必盡。田野必闢。嘉穀之農必益多。倉箱之積必益盈。治化必日益休。風俗必日益美。胥可一言斷之矣。所關顧不大耶。且一國之財。土地終爲其大分。而爲最恆最重之民依。使吾黨之勤於此。而得其定論。有益來葉。豈可數計。不然。吾何取於勞精苦思。而爲無益之分別耶。

案後之計學家。皆謂土地人民。雖生事所必資。而不得名爲國財。國財在所積貯。與其民之能事。今斯密氏以土地爲國財大宗。蓋當時計學家之說。後賢所不由也。

且其用不止此。輒近努力小民。每以糧食之日貴。訟言庸率之宜加。聽者莫衷其說。此亦今日言計者之一大事也。使前說明。則庸之宜加與否。可一言決矣。蓋使其事由於銀賤。則力庸之率。自所宜加。而加宜適如銀價之所賤。使不由此。而由於土地

之日。關農事之日精。則庸之增否。與增之比例。必審計而後得其平。不若前者之易易矣。今夫民食非他。穀與蔬肉已耳。耕牧之利既均。則膳膳之價必昂於往日。然而肉食貴矣。而瓜蔬之價。將以其物之日穰而日賤也。彼芻豢之所以貴者。因區中耕之壤以爲牧。牧之利必均。耕農與田主乃勸爲之。農之贏主之租皆不下於耕。而後可。而瓜蔬之所以賤者。因其地沃而所植蕃。地沃故畦畝省而用力舒。植蕃故薯蕷、蹲鴟、蕪蔣、印稻、一、玉米、西人呼爲印度米、一、種皆外來。移植英地。裨益民生者至鉅。且求者日多。則供者日奮。若蘆菔、椰菜。昔之種以畝者。今則種以耒矣。故農事日精。民食有其不得不高。亦有其不得不賤。衡量二者之間。而審其相補之何如。何物於此民爲急。何物於彼民爲輕。而後有以定其庸之加率。此非靜謐之士固不能矣。百年來吾英膳膳之價。舍葷肉而外。固莫不增。然至此殆將極而不過。設他日者。他畜之價又賤。如雞豚。如鵝鴨。如雉鹿。如魚鼈。於小民固無傷也。何則。肉食之所費。不敵其蔬菜薯蕷之所贏也。最後數年。以天時不齊。麥價陡高。誠編氓之所苦。然使歲僅

中收則麥價平。有含哺之樂。他物雖貴。無害於民。故民生今日所困於生貨價高者。漆漆而受累於熟貨稅重者。粵深若鹽。若鹹。若皮革。若麩。麩。酒漿（謂麥酒）之數者。皆民生日用所不可無。而常困於賦稅。則人事之不感。而非天時地利所馴致者矣。故吾乃繼今而言熟貨。

案近百年來。英國肉價日貴。而蔬穀之價日平。戶口降而益蕃。是農事日精。民食日高之言益信矣。

以下論民業日進。其效見於熟貨者。

民之生業果進。熟貨之價莫不趨廉。此其故不難知也。手足巧習。機械益精。其分功部署之法亦日善。用力寡而成功多。不如是則無所謂進矣。雖此時功庸之率莫不增多。而二者相較。常大有餘。此熟貨之所以賤也。有一二事焉。以其坯樸之材日貴。則民業雖進。亦有不見廉者。如梓匠之事是已。若其材所貴者微。則其價亦日落。本租以還。熟貨之降賤者。莫著於下金之成物。時表之內機。昔之以二十鎊售者。乃今

不過二十先令矣。是所減者二十倍也。他若刀劍、若鎖鑰、凡蒲明罕與薛非勒二部之所出，莫不如此。特未若時表之多耳。是二部之所產，令歐洲他國爲之，雖再倍其值，所不能也。此他國工所自言者。蓋其物分功之密，機械之精，若不可加，故能成物之廉如此。

綢緞之業，價減亦微。三十年來，呢質日精，其價亦比例而貴。或謂山川西班牙羊毛，其約克沙所織，用本國羊毛，則其價見減。此皆未爲定論。第其價所不見廉者，百年之中，綢緞之功進者甚少，所用機器亦不逾前。然終有少進，其價亦稍減也。若取其遠者與今較之，則織事之精粗，呢價之廉奢，皆大可見矣。一千四百八十七年，當英王顯理第七之四載，令曰：凡國中所有呢，無論上上赤經，抑他經法，其零售價每碼不得過十六先令。違者依所售碼數，碼罰四十先令。由是知所稱每碼十六先令，抵今幣之二十四先令者，爲當時常價。而市中之價過此者有之。今上上呢價，不過碼二十一先令。是卽品色相等，呢價所減已多。況古佳呢不及今之中品，而以真值論。

則其時之十六先令爲麥二括打有半以今平價每括打二十八先令言是猶三鎊六先令六便士也是則古今呢價之差古三鎊有餘者今則一鎊其所減三倍不啻矣

熟貨市價代減粗者已甚精者尤多一千四百六十三年當英王義都活第四之四十三載令曰凡田傭若僮僕若郊鄙之工其所衣服呢價每碼不得過二先令此今幣四先令也今約克沙成屬價如此者固是佳品非當日田傭賤工之所能望且二先令古爲麥二布歇落有半在今值八先令九便士然則當日每碼之呢小民所以爲易者猶今之八先令九便士可謂奇貴而當時制令如此則非不常之事可知又同時令云小民不得服織襪其價乃十四便士於今幣爲二十八便士以麥課之則抵今五先令三便士使今日小民有以此數買一雙襪者人將云何吾聞義都活第四時歐洲少知織襪者其所用皆以布若屬縫合爲之此織襪之所以貴也英人用織襪自額理查白君王后始聞乃西班牙使者之所獻也觀前事知細貨之價所降賤

者尤多矣。

案額理后始以絲縷自織機。非始服織機也。斯密所云少誤。

織造之業。無間精粗。皆古迄今遠。蓋二百年來。織造之業。機器之用。有大進者三。而小者不計矣。其三維何。一曰紡機。二曰經緯之機。三曰碾機。其在紡機者。則改紡輪爲排簪之架。已事半而功倍矣。益以織機之用。持帶引緒。經緯理極。化織事之至繁者爲極簡。又前者已成匹段。必入水蹙踏而後堅緻。需力多而歷時久。自碾機出而功省布密。蓋十六棋已前。英倫暨歐洲北部諸邦。水碓風輪罕知其用。知者獨羅馬舊邦之義大里耳。製造之業。古餘今良在此。古貴今廉亦在此。其成物也。勞費既滋。其登市也。索賴自奢。不易之理也。當日英倫工業。與今淺化不進之國正同。一切粗礪之熟貨。大抵家而爲之。無唐肆大廠之事。且脩之於農牧之隙。雖收成貨之利。不必視爲專業以資生也。故其勢能廉。至於精細之功。則因古英所無有。必富厚鄰國如伏蘭德者。而後脩之。彼則資生專業。其勢不得甚廉。且由外而入。則有邊關之稅。

雖其時護商之法未行。而國中長者貴兒。居養甚豫。遠方異物。欲其輻湊。未必爲重。征使之裹足。而征而價增。則所不免者也。由是知織造之貨。其價稍者降多。粗者降少。蓋粗者由廉降廉。所以見少。而精者本貴之賤。所以見多也。

案此與今英情境。固大不侔。今英一切熟貨。無不降而日廉。機器之用。仟佰於昔。分功之細密廣遠。幾於不可追求。且舟車大通。懋遷有無。徧諸大地。則資財坏壞。亦無由貴。故製造之事。力庸增長。雖已數倍往日。而物之廉賤自如。此其爲功。豈僅計學一端而已。若測算。若格物諸學。皆實爲之。培庚有言。民智卽爲權力。豈不信哉。

以下通結本篇論租

此篇本釋租之言。而益以二金消長之所旁逮。物產貴賤之所類推。遂使文辭尤長。然尙有未盡者。則謂民至合群成國。其中一切進化利民之事。凡可使地產日增。民生日裕者。無一焉非有土者之大利。其爲利也。或徑而得之。或紆而後見。要皆使租

稅之日多。地主取功致物之權日重而已。

自其收利之徑者而言之。則爲之而租增利饒者。莫捷於田野之治關。田野治關。所獲加多。所分之租。比例而鉅。此最易見者也。且此產價值增多者。田野治關之第一效也。而地產值增。則田野亦必以愈關。故始也地產值增。爲田野治關之果。而繼也地產值增。轉爲田野治關之因。夫二事相爲因果。如牧事以牛羊價昂。而地租遂長。且其所長。常不止於價昂之比例。卽此理也。夫田治。彼地主之分租既多。而產貴。則所分之真值又長。是地主之利再進也。且利之因價昂而進者。其產之固無俟加勞費也。故發財之農人。勞力之佃者。多一其常贏常庸而已足。則農佃得其少分。而田主享其大分。又何疑焉。

更自其好而見者言之。物產既充。國上之熱貨必賤。蓋分功繁。民增巧習。而爲之者日充。田租加多。異而無以異也。分於田者。爲一身一家之奉而有餘。則出之以與國。

入爲易。其所易者。十八九皆熱貨也。而熱貨

又適廉如此。則地主之利又進而生事必需之餘。舉凡適意娛情華炫玩好之事。相因起矣。且積貯豐盈。生之者衆。故其國無游民。無游民則緣畝者多。積貯充則食功者衆。物產滋而民獲其依。則租稅雖深不病。故曰無所往而非有土者之大利也。反是而觀。則田野荒者必生貨日以賤。熟貨日以昂。積貯蕩然而民生皆竄。其爲有土之大害。豈待言哉。是故善國租重而民樂。罷國租輕而民煩。

案斯密氏此論。與前者言地產之宜貴不宜賤。皆理財精語。學者所不可不知。原富一書。其有功生民。開悟來學。大抵此等處耳。

又案生財之術。益巧益疾。如講田法用機器。善分功之爲。固通國之公利。使生齒之繁。不過則力作小民。獲益最廣。所患者民愈愚。則昏嫁愈以無節。故民智未開之日。生業之進。終不敵其生齒之蕃。雖有善政良規。於國計不過暫舒而終蹙。此則雖有聖者。所無如何者矣。

今者綜而籌之。則一國之內。地利之所歲出。民力之所歲登。無論以土物言。抑以所

常之泉幣言自然之勢。實區三塗曰有地之租曰勞力之庸曰發貯者之贏息三者民之所歲入所賴以養軀命繕家室長子孫者也。然而國之財賄物力固於三塗焉取之而三塗之利害與通國之休戚則有合有離。是又不可不區以別之也。夫地主之利害與通國之休戚相爲關通已概見於前論。國利而地主不利國害而地主不害者未之有也。當國家有所廢興群喙盈廷各自爲政用有地者之說常多是而少非何則人意多出於自營此之自營適與公利相合故也。所慮者學識之不明更事之太淺則亦有時焉不可用矣。蓋三塗之衆此最逸居心手不勞以租自贍往往吝以疾苦而不知問以盈絀而莫辨。席豐履盛無所用心則輿論一政之施窮源竟委所收效於事後者云何。斯無望已。其擅利勢以陵人自是而復諫則又一事也。若夫勞而後食之理其利害之與一國相關者殆與前庸無以異。大抵庸率最優莫若進治向富之國中。立不進所得將微。故國勢進盛之秋大利固歸於產主及其衰退其家則尤酷者。又莫若勞民也。顧其人智識淺淺難與計事與地主所因雖異其

效則同。所謂與群休戚之理。儲者末由知也。終身動動。固無有考道問學之一時。且山其地勢以成心習。即使慧黠過人。爲其佼佼。亦難使操國論而執事權也。是故群有大議。小民之所呼籲者。世常弁髦置之。其有時挾衆喧嚷。則往往爲狡者之所指。喉。而其所持之說。甚且與其衆之私利相逕庭也。夫亦可閔也已。

其三則有發財逐利之家。質儲鳩功之主。自無母財。則贏利不生。故其衆爲有國者所不可廢。操奇計贏。心計獨精。而勞力執事之夫。待其餽養指揮。而後有收利生財之效。獨是贏息之進。與租庸殊。租庸國休俱休。國戚亦戚者也。贏息之利。與國相反。民貧而後子錢加。國彌富則息率彌微。國治衰退民生困窮。息率彌大。至其極高。其國與群殆將亡而散矣。故彼與群相待之際。異於前者之二民也。工魁賈役財最多。以其殷實。常爲一國之所重。且計慮精審。爲田主工傭所不及。持說巧密。信從者多。然其意之所主。常以其業之利害爲先。而一群之甘苦爲後。則難用也。譬如今之大賈。常謂國宜廣銷場。而狹市競。而後國富乃蒸。不知云廣銷場。固邑野二業之大。

利而狹市競。則壟斷辜權者興。物價日騰。資物產者將失廉而得貴。而小民之生計日艱。此與無名之賦又何殊焉。於彼誠利矣。而於群何益乎。故商政之議。而出於商。不可不諦聽而深察之也。彼非樂於害群也。一家之私利。與一群之公利相違。則逐一己之利。資於群。不能無損及其已甚。顧利否耳。雖因民病國。何憚焉。

案斯密謂役財者之利害。常與國群之利害相反。言稍過當矣。其謂叔季末流。子錢日鉅。夫豈不然。然此特保險費多。非真贏也。至於敝極之時。則強梗詐僞。侵欺盜起。彼役財者庸有利乎。故亂國之厚息。不若治國之薄贏。政謂此耳。總之生財之術多門。而民富必基於政美。使刑罰不中。法令冒竄。則倉庾筐篋中物。廩廩乎且不可恃。況乎所仰望而未收者耶。必謂貧國退治而後子錢日大者。亦非鑒言。進境之國。地廣物蕃。可興之利未艾。當此之時。民求母財之用最殷。以其遺利之多。故子錢之酬亦厚。此政贏息最大時也。斯密前者釋贏之篇。所舉北美墾地。事政如此。豈忘之耶。吾意斯密之爲此言。意中必有所指。懲議院之過聽。遂不覺其

詞之失中。計學所明之理。宜爲千世立程。不得以一時之用心。使其理失實而有漏也。中國此時資貸子錢亦重。此半坐民不相任。半坐立事方多。使繼今以往鐵路宏開。遺利歲出。子錢之率。勢必大增。使不大增。必由二故。中國自立銀號。章程詳善。民出滯財。無所疑慮。一也。殷實之民。儲財外國銀號。經其擇保出借。亦可無憂。二也。由前則中國之利。由後則中國之損。主國計者其審焉。

又案釋租爲全書最繁重之篇。其中雖不乏精湛之言。而於田租源委性情。顧均未盡。其論金銀二貨之消長。物產三類之蕃滋。與租涉者蓋寡。此在後之作者。方將特起篇目。未必靡之釋租之中也。故後賢揚摧此書。僉謂此篇最爲斯密氏綏短汲深之處。其言未盡過也。格物窮理之事。必道通爲一。而後有以包括群言。故雖支葉扶疏。派流糾縈。而循條討本。則未有不歸於一極者。斯密氏之言租也。不特不見其所謂道通爲一者。且多隨事立例。數段之後。或前後違反而不復知。如篇首謂地有主人。租名乃起矣。是其多寡厚薄之數。純出於田主之所爲。乃入後

又言租以地產豐穡農力高下爲差如是則多寡厚薄之數又若非田主所能爲矣於一業則云租者物價之一分租長則價加租因而價果也於他業又謂租之能進由價之昂租果而價因也即其區物產之有租無租其說亦非至確無他理未見極則無以別衆說以歸於一宗卽有與旨名言間見錯出而單詞碎義固未足以融會貫通也後此言計之家思所以補闕拾遺爲之標二義焉而求其極其一曰知物所以究租之爲物所與他利不同者爲何其一曰求故所以討租之厚薄升降起於何因其說於此多所發明而英之計學家則理嘉圖與其弟子穆勒父子爲職志雖德美諸家於理嘉圖租例尙多掎擥而當世碩師如倭克爾馬夏律諸公爲之論定折衷而後知其例之必不可廢今以其例之所關宏鉅乃取穆勒雅各釋租之說譯附是篇以俟學者之攬擇並以規學問之事講而益密彼前賢常畏後生也

附穆勒雅各釋租

田腴瘠不同。自山田。磽确沙田。壤疏澤田。斥鹵之幾。於無所收等而上之。黃埔黑
墳。上腴之壤。性品之殊。有不可以猝數者。其產穀也。雖在同田。其多寡殊。其難易
判。譬如有田。始收十石。繼而倍之。再進而三之。其最初之十石易也。其進求之十
石難。其更進之十石。愈難。每進之所收。其勞費必深於前者。故例曰。畝田增收。後
收之費。深於前費。

國之始闢。土之始耕。所斥母財。收利相埒。洎夫腴田盡耕。母充其量。後有繼者。事
乃異前。故國土出穀之多。其量皆有所域。過限求進。勞費加前。故田功用本之情。
可區爲二。一曰大還。一曰小還。大還利厚。小還利薄。

小還之由。致之者二。或母施於新田。其土之腴。次於已墾。或施之舊壤。其用母已
充。二者用母同。而利皆趨薄。故曰小還。民之斥財而求利也。則以新舊之難易。勞
逸爲歸。假如施之舊耕。僅添八石。別耕次腴。可致九石。彼必舍舊謀新。無疑義也。
案此篇所略田畝。當兼腴瘠便左而言。其義始備。

今設時地之腴瘠爲上上上中上下中上諸等而田先後所施之母降而收利
愈薄者命之爲初度次度三四等度自其初而溯之當一群之始合一國之肇興
也凡無有能生之田勢必莫之爲望降而有望者矣而田餘於民所耕者皆上上
未耕者無所出有欲耕之者皆可奄其地而名爲己田當此之時田固無租雖已
經焚闢斬刈之田與夫萊汙荒穢者有異民耕前田於已作治者恆有所納然其
納者固非租也租者緣地而後有此之所納緣人之勞費而後有則等諸用人之
力而予之以庸用人之財而予之以息是固庸也息也而非租也故曰當此之時
田固無租

群合而羣乳浸多民食之所耗日廣上上之田轉瞬盡闢苟求足食不能不進耕
上中抑其次度母財而益耕舊治之上上者之二事起乃入小還

當降耕上中時假有人焉具若干母財以治此田其歲收條及八石而治上上者
例得十石則彼或求治上上祛二石以易用地之權抑姑治上中收八石而無所

費二者之事於具母者爲利正同。但設爲其前耕有主之田率什二以償主者。則租之名物於此基矣。

更假有人焉。以謂具母而降耕上中。不若以此爲次度母財。而仍耕上上之爲便。顧其受母之量已充。大還之限已至。故初度之母收十石者。次度同母僅收八石。此其事效與前乃同。蓋自上上諸田受母之量既充。大還之限已極。十石之贏必無從得。則具母治田之家。勢必以八石者爲贏利之通率。以八石爲通率。則主上上者固可與具母治田者爲約。而得其浮於八石者以爲租。故曰其與前同也。

循是爲推。則知租之所增。以治田遞用之母財收利之降減爲比例矣。設究其說。他日戶口愈蕃。民食愈亟。上上上中都已壅盡。不得已而降耕上下。其所收僅及六石。如此則上中之壤必與升科爲率二石。其上上諸租同時必進二而爲四矣。假其卽舊加母以求多收。則爲第三度母。其效亦與別地降耕者同。上中之主得二上上之主得四。然則租之物情大可見矣。民之役財以治田也。或用之異所。而

有肥磽之殊。或用之同壤。而有先後之異。其計母課還。昔有大小。時至利分。其最小者。則爲役財之家。贏利之通率。彼非不欲多也。人競於求利。欲增益毫末而勞不能也。過通率而有餘。則皆主其地者之所獲。是故租者可一言而界其說也。治田之租。大小還之較云爾。

卽前之三租而明之。國田逆耕上下之時。則出八石之上中。其租爲二石。出十石之上上。其租爲四石。使不別地爲耕。而母財悉施於上上。則以初度之收十石。次度之收八石。以與三度之六石爲較。則初度之贏四。次度之贏二。合而征之。得六石也。

租之爲例。其賅簡如此。而爲用則至闊。顧彼持論之家。尙以是爲不足者。則以謂田至各有主名之世。無不租而耕者。雖蘇格蘭極巖山田。治之者必有所納。厚薄雖異。爲租則同。前說謂最下之田無租。無乃有未盡歟。

一例之立。難者叢生。而察其難端。有爲本例所深病者。有與本例實無損者。苟其

無損則難者之蔽。恆山二因。審理未精。不悟已之所持。無關立例之宏旨。抑守舊不化。遇有新理。樂攻擊而事吹求。今如前難所云蘇境山田未嘗無租。固也。而所謂千頃之田。歲納五鎊。析而著之。每頃之租。不過一便士之數。而每頃耕播之資。不下十鎊。則孰多課少。其與於無租者幾何。固知此之區區立例者。雖心知其然。不暇計矣。

矧夫難者之言。固非實耶。難者徒知蘇格蘭事耳。不知宇內他邦。不耕無租之田。所在多有。使見亞拉伯之壤。自流沙不毛。至於沃野上腴。名品差殊。不可臆列。有地能生矣。而稔不償勞。則永無墾者。有地墾矣。而歲收微薄。養傭之外。羌無餘糧。則雖耕而不租者也。

國於員輿之上。其疆域稍廣者。皆有耕而不租之田。耕而不租者。其地之所出。僅足以敷勤動者之食。而不能餘也。必升其租。其田立廢。吾英境內。亦有此田。山石犖确。叢薄蒼蘚。而外無或能生。蘇格蘭蘇山之眈。無不納租。固也。而不知雖至劣。

薄之山田。其中皆雜有其腴之澗壑。佃者動受數百頃於其間。乃計頃而納至薄之賦。取盈補糴。通其有無。苟執此而云石田有租。不大謬耶。